

INFO



Informativni časopis Općine Novi Grad Sarajevo | decembar 2019. godina | Broj 24



Počinje postavljanje konstrukcije mosta iznad željezničke pruge na 9. transverzali

Jednoglasno usvojen Nacrt budžeta Općine Novi Grad Sarajevo za 2020.godinu

Počela rekonstrukcija vrtića "Vjeverica"

Još jedan stadion sa umjetnom travom gradi se u Centru "Safet Zajko"














CENTAR SAFET ZAJKO

REKREACIJA, SPORT I EDUKACIJA



SADRŽAJ:

	Općinsko vijeće	4
	Kabinet načelnika	14
	Privreda	21
	Infrastruktura	30
	Obrazovanje	64
	Kultura	71
	Sport	81
	Obilježavanja	88
	Ostale vijesti	100

TELEFONI ZA HITNE INTERVENCIJE:

HIGIJENSKI SERVIS
+ 387 61 22 99 40

DEŽURNI INSPEKTOR
+ 387 61 22 99 49

IMPRESUM:

IZDAVAČ:

Općina Novi Grad Sarajevo
Tel.+387 33 291 100, 291-313
E-mail: ngsabih.net.ba
www.novigradsarajevo.ba

AUTOR I UREDNIK:
DTP

Amina Vatreš-Nezirević
Vahidin-Nino Pršeš

VAŽNIJI TELEFONI I E-MAIL ADRESE

Služba za poslove Općinskog vijeća

033 291-130, fax. 033 291-271
vijece@novigradsarajevo.ba

Služba kabineta Općinskog načelnika

033 291-100 033 291-103; fax. 033 291-278
infonovigrad@novigradsarajevo.ba
ngsa@bih.net.ba
aminapress@novigradsarajevo.ba

Služba za privredu i lokalni ekonomski razvoj

033 291-122
privreda@novigradsarajevo.ba

Služba za urbanizam, imovinskopravne, geodetske poslove i katastar nekretnina

033 291-120; fax. 033 291-224
urbanizam@novigradsarajevo.ba
033 291-279
imovinska@novigradsarajevo.ba

Služba za opću upravu

033 291-233;
opcauprava@novigradsarajevo.ba
maticniured@novigradsarajevo.ba
cern@novigradsarajevo.ba

Služba za obrazovanje, kulturu i sport

033 291 117
033 291 281; fax. 291 170
obrazovanjeirazvoj@novigradsarajevo.ba

Služba za boračka pitanja, rad, socijalna pitanja i zdravstvo

291-237; fax.291-164
boracka@novigradsarajevo.ba
033 291-173; fax. 291-173
radisocijalnapitanja@novigradsarajevo.ba
291-306; fax.291-281

Služba za investicije i infrastrukturu

033 291-116
investicijeikomunalno@novigradsarajevo.ba

Služba za finansije

291-234; fax.291-319
finansije@novigradsarajevo.ba
ngsafin@bih.net.ba

Služba za zajedničke poslove

033 291-107
sacira@novigradsarajevo.ba

Služba civilne zaštite

033 291-114
cz@novigradsarajevo.ba

Služba za lokalnu samoupravu

033 291-344
mz@novigradsarajevo.ba

Služba za inspekcijske poslove

inspekcija@novigradsarajevo.ba

Pravobranilaštvo Općine Novi Grad Sarajevo

033 291-162
pravobranilastvo@novigradsarajevo.ba





Vijećnici zatražili informaciju o istrazi ubistva policajaca Adisa Šehovića i Davora Vujinovića

Na 26. sjednici Općinskog vijeća Novi Grad Sarajevo, održanoj 18. jula, vijećnicima je prezentirana informacija o izvršenju budžeta Općine za period od prvih šest mjeseci ove godine.

Kako je istaknuto, izvršenje budžeta za prvu polovinu godine je 48 posto, što znači da je više od 20 miliona ostvarenih prihoda na pola godine što je sasvim zadovoljavajuće. Kada su u pitanju kapitalni izdaci na koje se uvijek najviše pažnje obraća izvršenje je oko 30 posto, a obzirom da je uveliko građevinska sezona, te da se svi poslovi plaćaju po njihovom okončanju, to je očekivani procenat i nešto je čak i veći u poređenju sa ranijim godinama. Realizacija projekata ide po planiranoj dinamici u većini stavki budžeta, a najveći općinski projekti kao što su izgradnja bazena na Dobrinji, te dogradnja osnovne škole Umihana Čuvidina u punom su jeku.



Zbog nemara MUP-a KS na čekanju projekti važni za sigurnost naših građana

Vijećnicima je data na znanje i informacija o stanju sigurnosti i aktivnostima Četvrtne policijske uprave u prvih šest mjeseci 2019. godine. Tokom rasprave vijećnici su između ostalog tražili da im se dostavi informacija o fazi u kojoj se nalazi istraga o ubistvu policajaca Adisa Šehovića i Davora Vujinovića koje se dogodilo na Alipašinom Polju, te da se dostavi izvještaj o realizaciji zaključaka koji su doneseni na vanrednoj sjednici Općinskog vijeća održanoj u oktobru 2018. godine tim povodom.

Na vanrednoj sjednici Općinskog vijeća donesen je niz zaključaka upućenih prema višim nivoima vlasti. Formirana je i radna grupa Općinskog vijeća za saradnju sa Četvrtom PU koja je zajednički usaglasila projekte koje je neophodno realizovati za bolji rad ove policijske uprave. Poseban akcenat bio je na uspostavljanju video - nadzora na području naselja Dobrinja prema Istočnom Sarajevu kao i na frekventnim raskrsnicama i parkinzima na području Novog Grada.

Općina je obezbjedila i sredstva za njihovu

realizaciju, te je sačinjeni sporazum u junu mjesecu upućen prema Ministarstvu unutrašnjih poslova KS na potpis, no isti još uvijek nije potpisan sa njihove strane, a kako smo dobili informaciju ista je situacija i u drugim općinama u kantonu.

Shodno odluci sa ove sjednice vijeća predsjedavajući Općinskog vijeća dr. Rusmir Baljić uputit će dopis prema MUP-u KS u kojem će se tražiti da se što prije potpiše dostavljeni sporazum kako bi se sredstva izdvojena iz budžeta mogla realizovati, obzirom da je riječ o projektima od značaja za sigurnost naših građana.



120.000 KM za održivi povratak

Vijeće je usvojilo i Odluku o dodjeli sredstava iz budžeta Općine Novi Grad Sarajevo u svrhu održivog povratka u 2019. godini, za što su izdvojena sredstva u iznosu od 120.000 KM. Grant za pomoć povratnicima u prijeratna mjesta prebivališta, Općina Novi Grad Sarajevo realizuje već duži vremenski period. Radi se o projektima elektrifikacije, priključaka vode, izgradnje i uvezivanja putne infrastrukture, kupovinu stoke, motokultivatora i drugih mašina, te nabavku građevinskog materijala.



Omogućena legalizacija za više od 200 kuća u naselju Buća Potok

Općinsko vijeće Novi Grad Sarajevo usvojilo je na 26 sjednici Odluku o usvajanju i izmjeni i dopuni Regulacionog plana „Buća Potok II“; zatim Odluku o izmjeni odluke o provođenju regulacionog plana „Buća Potok II“ i Odluku o izmjenama odluke o provođenju regulacionog plana „Buća Potok I“.

Riječ je tri značajna provedbeno - planska dokumenta koji imaju za cilj da našim građanima koji imaju izvedene, izgrađene objekte na području naselja Buća Potok stvore jednostavniji način za legalizaciju njihovih objekata. To se odnosi na objekte koji su predmet legalizacije, a ne za nove planirane objekte. Na ovaj način je riješen višedecenijski problem stanovnika Buća Potoka koji svoje objekte ranije nisu mogli legalizovati.

Usvajanjem Odluke o izmjeni i dopuni regulacionog plana „Buća Potok II“ došlo je do sužavanja profila naseljskih saobraćajnica, čime je zadržano i sačuvano 35 objekata koji su ranije bili predviđeni za djelomično ili potpuno uklanjanje, a ovom izmjenom stvorene su pravne pretpostavke za njihovu legalizaciju.

Usvajanjem Odluke o izmjeni odluka o provođenju regulacionog plana „Buća Potok I“ i „Buća Potok II“ stvoreni su preduslovi za legalizaciju 180 objekata. Naime, omogućena je legalizacija izgrađenih objekata iznad zone snabdijevanja iz gradskog sistema vodosnabdijevanja (kota 655 mnm) pod uslovom da je obezbijeđeno alternativno snabdijevanje vodom putem lokalnih izvorišta ili drugih izvora, a uz kontinuirano praćenje kvaliteta vode od strane Općine Novi Grad Sarajevo. U pitanju su objekti u rubnom dijelu naselja Buća Potok koji su već ranije izgrađeni, a koji su predmet legalizacije, zadržani i evidentirani, a koji usvajanjem ovih odluka stiču preduslove za legalizaciju.



Poseban odsjek za legalizaciju

Zbog velikog broja predmeta legalizacije koji se vode u Općini Novi Grad Sarajevo, formiran je poseban Odsjek koji se u okviru Službe za urbanizam stambene, imovinsko – pravne, geodetske poslove i katastar nekretnina bavi ovom problematikom. Također, fizičkim osobama data je mogućnost za obročno plaćanje utvrđene naknade za pogodnost lokacije - rente, te je poduzet niz drugih radnji kao što je i kontinuiran rad na provedbeno - planskoj dokumentaciji.





TEMATSKA SJEDNICA OV NOVI GRAD

Nadležnim institucijama upućen apel za hitno rješavanje problema gradske deponije

Općinsko vijeće Novi Grad Sarajevo održalo je, 12. septembra, tematsku sjednicu na kojoj je razmatrano krajnje alarmantno stanje gradske deponije Smiljevići, koja se nalazi na teritoriji općine Novi Grad, a kojom upravlja KJKP „Rad“. Nadležnim institucijama upućen je apel za hitno rješavanje problema deponije koja zbog nepropisnog rada i nesnosnog smrada koji se širi okolnim naseljima, godinama stanovnicima predstavlja problem, ugrožavajući njihovo zdravlje.

Osim vijećnika Općinskog vijeća Novi Grad Sarajevo i predstavnika Općine, sjednici su

prisustvovali zastupnici u Skupštini Kantona Sarajevo, federalnog Ministarstva okoliša i turizma, Ministarstva prostornog uređenja F BiH, kantonalnog Ministarstva prostornog uređenja, građenja i zaštite okoliša i Ministarstva komunalne privrede KS, Zavoda za planiranje razvoja KS, Zavoda za javno zdravlje KS, predstavnici sedam mjesnih zajednica u blizini deponije, te predstavnici Udruženja „Eko akcija“ i mediji.

Nije u funkciji prečistač procjednih voda iz tla deponije

Između ostalog, jedan od uslova za izdavanje dozvole je stavljanje u funkciju prečistača za procjedne vode koji već duži period ne radi. Istaknuta je činjenica da nadležne institucije ni nakon vapaja stanovnika naselja oko deponije, više urgencija i blokade rada deponije od strane građana, nisu poduzele nikave mjere na rješavanju ovog velikog problema, kao i da stalno slušaju prazne

priče o tome kako se rade studije, pravilnici i zakoni, a da se na uređenju deponije ništa ne radi. Uz to, rečeno je, da je zanemarena i činjenica da je deponija namijenjena samo za odlaganje kućnog otpada, te da se na deponiji odlaže i otpad animalnog porijekla, medicinski, građevinski i druge vrste otpadnog materijala, što dodatno zagađuje zemlju, zrak i vodu.



Zijada Krvavac

pomoćnica ministra prostornog uređenja, građenja i zaštite okoliša Kantona Sarajevo



Anes Podić

predstavnik Udruženja Eko akcija

Protiv proširenja deponije

Burnu reakciju prisutnih izazvala je informacija koju je iznijela pomoćnica ministra prostornog uređenja, građenja i zaštite okoliša Zijada Krvavac, da su u toku aktivnosti na proširenju deponije. Stav Općine Novi Grad i Općinskog vijeća po tom pitanju je da se kategorično protive bilo kakvom proširenju deponije.

„Stav Općine je da se protivimo bilo kakvom proširenju deponije. Nije mi jasno kako se može ići u proširenje deponije koja nema ni okolinsku dozvolu, te kako se može ići u postupak ako ni ovo što postoji ne funkcioniše. Smatramo da je ona eksploatisana, jer se eksploatiše više od 50 godina i da se više ne nalazi na periferiji grada kao što je to bilo u vrijeme njene izgradnje, te da treba tražiti drugu lokaciju na teritoriji Kantona Sarajevo, na kojoj bi se gradila deponija, a koja nije blizu naseljenih područja“, kazao je načelnik Semir Efendić.



Rad bez okolinske dozvole

Uzimajući u obzir činjenice da se odlaganje gradskog otpada ne vrši na propisan način i u skladu sa ekološkim standardima zbog čega građani Novog Grada najviše trpe, vijećnici su od nadležnih zatražili odgovor na pitanje kako deponija koja nema okolinsku dozvolu i ne funkcioniše po propisima uopće može raditi i ko je dozvolio njen rad? A da deponija već duži vremenski period radi bez okolinske dozvole potvrdila je Suada Numić, predstavica Federalnog ministarstva okoliša i turizma. Ona je kazala da je na zahtjev Općine Novi Grad Sarajevo ovo ministarstvo zatražilo da se preispita stanje na gradskoj deponiji, te da je zbog neispunjavanja ekoloških standarda postupak izdavanja dozvole prekinut, dok se nedostaci ne otklone.

Zaključci

Nakon višesatne diskusije doneseno je 16 zaključaka, a između ostalih: da se donese odluka o formiranju radnog tijela - stručnog tima za praćenje stanja u Gradskoj deponiji (Regulacionom centru za upravljanje otpadom Smiljevići), da se Skupštini i Vladi KS uputi inicijativa za izmjenu i dopunu Zakona o komunalnoj čistoći, komunalnim djelatnostima i posebnih propisa shodno Planu upravljanja otpadom KS i drugih zakona koji se tiču ove oblasti, da se resorne općinske službe uključe u izmjene navedenih zakona,

Najmanje što se zahtjeva od upravitelja deponije KJKP "Rad" jeste da ona funkcioniše po propisanim uslovima. Prije tri godina kada je obustavljen saobraćaj prema deponiji tada su građanima data obećanja da će se kontinuirano izdvajati sredstva za izgradnju sanitarnih ploha na kojima se odlaže otpad, međutim od toga ništa nije urađeno, a građani imaju isti problem. Ko je odgovoran za to da deponija uopće radi bez okolinske dozvole i zašto se ne zakaže hitna sjednica Skupštine KS i odobre sredstva neophodna za njenu sanaciju kako bi ispunila uslove za izdavanje dozvole, samo su neka od pitanja učesnika današnje tematske sjednice.

da se podnese krivična prijava protiv odgovornih osoba zbog nepostojanja okolinske dozvole, da se hitno pokrene i finansira izrada analize zagađenosti tla u naseljima koja se nalaze u blizini deponije, da se uspostavi sistem naplate okolinske rente koja će pripadati Općini Novi Grad, a koristiti se za potrebe RCUO Smiljevići.

Također, jedan od zaključaka sjednice je i da se od Skupštine i Vlade KS zatraži stalno zasjedanje po pitanju deponije i prekid



Suada Numić

predstavica Federalnog ministarstva
okoliša i turizma

provođenja aktivnosti na širenju deponije Smiljevići, zatim nezavisna kontrola kvaliteta pokrivanja deponije na način da se izmjere koncentracije gasa, ponovno pokrivanje dijelova deponije za koje se utvrdi da nisu propisano pokriveni, izgradnja spalionice za životinjski otpad, uspostava agencije za zaštitu okoliša na nivou KS-a, da se u budžetu Kantona Sarajevo za 2020. godinu planiraju sredstva u iznosu od milion KM za završetak ucjevljenja Lepeničkog potoka u Zabrdju itd.

Data saglasnost za izgradnju parkinga u ulici Bajrama Zenunija

Općinsko vijeće Novi Grad Sarajevo, na sjednici održanoj 26. septembra, dalo je saglasnost za izgradnju parkinga sa oko 120 mjesta u ulici Bajrama Zenunija u naselju Alipašino Polje. Donesen je zaključak kojim se Službi za urbanizam, stambene, imovinsko - pravne, geodetske poslove i katastar nekretnina daje saglasnost da pribavi mišljenje Zavoda za planiranje razvoja Kantona Sarajevo u cilju donošenja urbanističke saglasnosti i odobrenja za građenje parking prostora u pomenutoj ulici.

Istaknuta je potreba za izgradnjom novih i uređenjem postojećih parking prostora u urbanim naseljima, kao i to da Općina Novi Grad već duži period radi na realizaciji nekoliko projekata, s ciljem rješavanja problema nedostatka parking prostora u naseljima koja su projektovana i građena u vrijeme kada je bilo znatno manje vozila.

Više od 600 novih parking mjesta

Započet je projekat izgradnje potpuno novih parkinga, a planirano je da se u ovoj godini na području Novog Grada izgradi više od 600 novih parking mjesta. U B fazi Alipašino Polja planirana je izgradnja dvoetažne garaže sa oko 320 parking mjesta. Izgradnja parkinga u ulici Bajrama Zenunija planirana je u sklopu projekta izgradnje novih parkinga. Nadležna općinska služba izradila je projektnu dokumentaciju i prijedlog za izgradnju parking prostora predstavila građanima koji su ga prihvatili na zboru održanom u junu ove godine. U budžetu Općine osigurana su i sredstva za njegovu izgradnju. Prethodno je Općina Novi Grad uradila Elaborat za potrebnim kapacitetima mirujućeg saobraćaja, kao i Elaborat za izgradnju potpuno novih parkinga.

Vijeće je usvojilo i izvještaj 23. tradicionalne manifestacije „Novogradski dani 2019.“ održane od 31. maja do 30. juna, u sklopu koje je održano 38 kulturno – zabavnih i sportskih manifestacija kojima je prisustvovalo više od 25.000 građana. U sklopu te manifestacije održano je obilježavanje značajnih događaja i ličnosti iz perioda odbrambeno – oslobodilačkog rata od 1992 – 1995. godine. Usvojen je Program i plan aktivnosti za izradu izmjena i dopuna Regulacionog plana „Alipašin most - VII“ čime su se stekli uslovi za izradu prijedloga izmjena i dopuna RP „Alipašin most VII“, a vijećnicima je prezentirana i informacija o izgradnji i stanju spomen – obilježja na području općine Novi Grad.



Za donošenje zakona neophodna saglasnost lokalnih zajednica

Javna rasprava o Nacrtu zakona o lokalnoj samoupravi, kojeg je Skupština Kantona Sarajevo usvojila bez saglasnosti lokalnih zajednica 24.07.2019. godine, održana je 10. oktobra, u zgradi općini Novi Grad Sarajevo. U javnoj raspravi učestvovali su predstavnici Općine Novi Grad, savjeta mjesnih zajednica sa područja općine Novi Grad i vijećnici Općinskog vijeća, a prisustvovali su i zastupnici u Skupštini KS-a. Iako su bili pozvani, niko od predlagača Nacrta ovog zakona Vlade Kantona Sarajevo, odnosno Ministarstva pravde i uprave Kantona Sarajevo, nije

prisustvovao javnoj raspravi u jednoj od najvećih lokalnih zajednica u državi BiH. No bez obzira na to javna rasprava je održana, izneseni su stavovi i mišljenja na predloženi Nacrt zakona, a doneseni su i zaključci koji će u skladu sa zakonskim procedurama biti dostavljeni Ministarstvu pravde i uprave KS. Raspravom je rukovodila Mersa Kustura, sekretar Općinskog organa uprave Općine Novi Grad Sarajevo koja je detaljno obrazložila manjkavosti predloženog Nacrta zakona o lokalnoj saoupravi. U uvodnom izlaganju Mersa Kustura je kazala da je Nacrt

zakona na koji se čekalo od 2007. godine jako štur, neprecizan, nejasan, ne utvrđuje jasno, nedvosmisleno i precizno nadležnosti jedinica lokalne samouprave, čak štaviše u mnogim segmentima bi zakomplikovao provođenje utvrđenih nadležnosti, te ga je neophodno doraditi uz konsultacije svih jedinica lokalne samouprave u Kantonu Sarajevo i u saradnji sa Savezom općina i gradova FBiH.



Pitanje vodovodnog sistema treba ostati na nivou Kantona

Prema evropskoj Povelji o lokalnoj samoupravi i prema Federalnom zakonu o principima lokalne samouprave jasno su definisane nadležnosti jedinica lokalne samouprave, nažalost u Sarajevu već dugo to nije tako, jer je Kanton preuzeo većinu nadležnosti. U jednom dijelu tih nadležnosti to nije moguće drugačije postaviti kao što je pitanje vodovodnog sistema, koji je integralan i njime ne može upravljati niti jedna općina, pa čak ni Grad Sarajevo. U tom smislu postoji jedan broj funkcija koje bi morale ostati na nivou Kantona.

Prijedlog zakona usaglasiti sa lokalnim zajednicama

Tokom javne rasprave doneseni su i zaključci, a jedan od njih je da se prijedlog zakona o lokalnoj samoupravi mora usaglasiti sa lokalnim zajednicama u Kantonu Sarajevo, kao i da se on ne može donijeti bez zakona o pripadnosti javnih prihoda KS, odnosno da u proceduru usvajanja treba da ide u paketu sa tim zakonom. Obzirom da je trenutno situacija takva da općine u pojedinim kantonima u FBiH imaju 50 posto sredstava od poreza na dohodak, dok općine u Sarajevskom kantonu nemaju ništa ili im pripada tek jedan posto sredstava od poreza na dohodak, što znači da Kanton Sarajevo godišnje uzme oko 150.000.000 KM prihoda poreza na dohodak.



Precizno definisati nadležnosti Kantona, Grada i općina

Učesnici javne rasprave iznijeli su konačan stav da bi bilo bolje da se zakon o lokalnoj samoupravi, koji bi trebao doprinjeti efikasnijem funkcionisanju općina, Grada i Kantona, ne donosi ukoliko bi se donio u formi kako je predložen u Nacrtu, jer bi došli u još goru situaciju od sadašnje. Rečeno je da se nadležnosti moraju precizno i detaljno utvrditi po nivoima, da se najprije definiše ono što sva tri nivoa mogu raditi zajedno, pa tek nakon toga da se definišu pojedinačne nadležnosti. „Ukoliko se ove smjernice ne ispoštuju od Kantona Sarajevo napraviti ćemo Mostar u kojem ćemo u jednom momentu imati još goru situaciju nego što je sada. Imamo situaciju koju je neophodno urediti posebno zbog tri nivoa - općina, Grada i Kantona, koja je sada neuređena i svi se za sve pitaju, a zbog čega ide sve sporo i mi smo potpuno zakrčeni i naš razvoj ide sporo. Kako vrijeme prolazi Kanton je sve manje efikasan u svim svojim poslovima koje radi, a predloženim zakonom stvari bi bile sve gore“, rekao je općinski načelnik Semir Efendić. Međutim, naglasio je da su prije desetak dana načelnici općina imali sastanak sa ministricom pravde i uprave KS-a Lejlom Brčić na kojem je ona dala obećanje da prijedlog zakona neće ići u proceduru prije nego se usaglasi sa lokalnim zajednicama, jer se on radi s ciljem boljeg funkcionisanja lokalne samouprave u Kantonu Sarajevo, te da bi donošenje tog zakona bez saglasnosti lokalnih samouprava bilo potpuno suludo.

Općinama dati uređenje saobraćaja u mirovanju, lokalnog saobraćaja, javne higijene...

Isto tako postoji jedan dio poslova koji treba da budu u nadležnosti Grada Sarajeva, kao što je donošenje urbanističkih planova, osnivanje i upravljanje institucijama kulture kojima sada upravlja Kanton, ali i onih čiji status nije definiran. Jedinicama lokalne samouprave po zakonu treba pripasti pitanje uređenja saobraćaja u mirovanju, lokalnog saobraćaja, javne higijene, održavanja parkova, imenovanje ulica itd. to su pitanja koja mogu raditi jedinice lokalne samouprave. Također, općine trebaju imati i ulogu osnivača ustanova predškolskog i osnovnog obrazovanja i sl, dok bi se obrazovnim sistemom trebalo baviti nadležno ministarstvo.





Jednoglasno usvojen Nacrt budžeta Općine Novi Grad Sarajevo za 2020. godinu u iznosu od 38.971.000 KM

Općinsko vijeće Novi Grad Sarajevo na sjednici održanoj 31. oktobra, jednoglasno je usvojilo Nacrt budžeta Općine Novi Grad Sarajevo za 2020. godinu u iznosu od 38.971.000 KM.

Nacrt budžeta upućen je u javnu raspravu u trajanju od 21 dan, do kada će svi zainteresirani subjekti, savjeti mjesnih zajednica i svi građani imati mogućnost učestvovati u javnim raspravama koje će se održati u svim mjesnim zajednicama na teritoriji općine Novi Grad i iznijeti svoje prijedloge, sugestije i primjedbe, te time dati doprinos da budžet Općine za narednu godinu bude što kvalitetniji. Nakon provedene javne rasprave konačan prijedlog budžeta bit će dostavljen Vijeću na razmatranje i usvajanje.



Za kapitalne projekte 16.770.000 KM

Prema planiranom budžetu i u narednoj godini na području općine Novi Grad Sarajevo bit će nastavljena realizacija velikog broja kapitalnih projekata, a ova lokalna zajednica finansirat će ih bez kreditnih zaduženja. Skoro polovina sredstava, odnosno 16.770.000 konvertibilnih maraka planirana je upravo za kapitalne projekte.

To se prije svega odnosi na nastavak izgradnje sportske dvorane sa pratećim sadržajima i proširenje kapaciteta škole „Umihana Čuvidina“ u Boljakovom Potoku za šta je planirano 1.200.000 KM. Izgradnju tog sportskog centra, čija je ukupna vrijednost 5,1 milion KM, do sada je samostalno finansirala Općina Novi Grad sredstvima od 2 miliona KM. Kantonalno ministarstvo obrazovanja, nauke i mladih koje je nadležno za osnovno i srednje obrazovanje za sufinansiranje ovog projekta planiralo je 500.000 KM iz kreditnih zaduženja, ali ta sredstva još nisu operativna.

Na sjednici je istaknuto da je potrebno značajnije uključivanje Kantona Sarajevo u ovaj projekat, kako bi se kompleks završio u idućoj godini.

Općinski načelnik Semir Efendić kazao je da ukoliko Kanton u budžetu za narednu godinu ne izdvoji značajnija sredstva za dovršetak


ovog projekta, Općina će rebalansom budžeta osigurati nedostajuća sredstva, kako bi se učenicima i nastavnicima škole što prije osigurali bolji uslovi za odvijanje nastavnog procesa, jer trenutno rade u otežanim uslovima.



Izgradnja dvoetažne garaže i parkinga na Alipašinom Polju

Nacrtom budžeta za iduću godinu planiran je milion KM za nastavka izgradnje Sportsko – rekreacionog centra sa otvorenim bazenima na Dobrinji. Značajna finansijska sredstva planirana su i za nastavak projekta rješavanja problema saobraćaja u mirovanju. 1.430.000 KM planirano je za izgradnju dvoetažne garaže u B fazi Alipašinog Polja i nastavak obnove javne rasvjete na parkinzima, a u A fazi Alipašinog Polja gradit će se veći parking.

Osam stotina hiljada konvertibilnih maraka planirano je i za rekonstrukciju i proširenje ulice Džemala Bijedića koja uskoro počinje, a realizira se zajedno sa Kantom Sarajevo. Bit će nastavljena i sanacija i asfaltiranje lokalnih i nekategorisanih cesta, za te radove predviđeno je 1,3 miliona KM, a za izgradnju i rekonstrukciju vodovodne i kanizacione mreže 1.995.000 KM, kao i 650.000 KM za izgradnju šetnice uz rijeku Dobrinju i uređenje šetališta i trga u ulici Bulevar branilaca Dobrinje. Oko 25 posto budžeta planirano je za tekuće grantove kao što su stipendiranje učenika, studenata i sportista, te socijalne programe, pomoć u liječenju teško oboljelih građana i sl.



Sredstva za početak izgradnje spomen – obilježja na Golom brdu

Planirana su i inicijalna sredstva za početak izgradnje spomen – obilježja na Golom brdu, na Žuči, gdje je planirana izgradnja „Memorijalnog kompleksa“. „Obzirom da je Fond memorijala Kantona Sarajevo trebao raditi na izgradnji Memorijalnog centra na Žuči, a kako se do sada još ništa nije pokrenulo, odlučili smo da mi kao lokalna zajednica krenemo u izgradnju tog monumentalnog spomen – obilježja“, kazao je općinski načelnik Semir Efendić.

Na dnevnom redu današnje sjednice bila je i

Informacija o izvršenju budžeta za proteklih devet mjeseci tekuće godine. Istaknuto je da se svi projekti koji su bili planirani realiziraju, te da se očekuje da će izvršenje budžeta za 2019. godinu u konačnici biti oko 90 posto. Usvojeni su i Prijedlog odluke o izmjenama i dopunama RP „Bojnik II“, Prijedlog odluke o osnivanju Zdravstvenog savjeta Općine Novi Grad, zatim Prijedlog odluke o izmjeni Odluke o građevinskom zemljištu.



Odata počast preminuloj zamjenici predsjedavajućeg OV Novi Grad Miri Jurić

Prije početka radnog dijela sjednice, vijećnici, predstavnici Općine Novi Grad Sarajevo sa načelnikom Semirom Efendićem i ostali prisutni, odali su počast nedavno preminuloj zamjenici predsjedavajućeg Općinskog vijeća Novi Grad Miri Jurić, koja je obavljala i funkciju zamjenice predsjedavajućeg Gradskog vijeća Grada Sarajeva.

Povodom sedam dana od njene smrti, Mirine kolege sa kojima je saradivala tokom svoje političke karijere oprostili su se još jednom od kolegice, istakavši da je bila veliki čovjek, prijatelj i visikomoralna osoba. Ovom prilikom načelnik Semir Efendić i Općinsko vijeće uputili su izraze suosjećanja sa porodicom i prijateljima Mire Jurić.

Mira Jurić preminula je 24. oktobra u Sarajevu. Bila je dugogodišnja zastupnica u Skupštini KS i delegat u Domu naroda Parlamenta FBiH. Prije dvije godine imenovana je za zamjenicu predsjedavajućeg Gradskog vijeća Sarajeva ispred Kluba vijećnika USD-BOSS, a bila je i vijećnica u Općinskom vijeću Novi Grad. Bila je predsjednica Unije socijaldemokrata BH, a osim u politici, Jurić je dugo godina radila i u Sarajevskoj pivari.

Na današnjoj sjednici Općinskog vijeća pokrenuta je inicijativa da se Miri Jurić posthumno dodijeli općinsko priznanje Zlatna plaketa "Safet Hadžić", za dugogodišnji doprinos u radu i razvoju lokalne zajednice.



Sredstva planirana Nacrtom budžeta Kantona Sarajevo za nabavku helikoptera preusmjeriti u sanaciju deponije Smiljevići

Općinsko vijeće Novi Grad Sarajevo, na svojoj 29. sjednici, održanoj 28. novembra 2019. godine, usvojilo je Izmjene i dopune budžeta Općine Novi Grad Sarajevo za 2019. godinu u iznosu od 48.146.000 KM, čime su osigurana sredstva za nastavak realizacije kapitalnih projekata, podršku održivom povratku i socijalne programe.

U izmjene i dopune budžeta uključeno je oko šest miliona KM, koja su, po izvještaju o izvršenju budžeta za proteklu godinu, bila sastavni dio već ugovorenih projekata. Pored toga, uključen je i dio sredstava za koja su postignuti sporazumi sa Kantonom Sarajevo i Federacijom BiH.

Rebalansom budžeta povećan je iznos sredstava za rekonstrukciju vrtića „Vjeverica“, koja je započela prije nekoliko dana. Također, povećana su sredstva za 500.000 KM od Ministarstva obrazovanja, nauke i mladih KS za izgradnju sportske dvorane i dogradnju škole „Umihana Čuvidina“ u Boljakovom Potoku.

„Ta sredstva nisu dovoljna za završetak ovog kapitalnog projekta, jer će izgradnja objekta koštati više od pet miliona KM. Očekujem da će Ministarstvo u idućoj godini izdvojiti barem milion konvertibilnih maraka kako bismo ovaj objekat završili i stavili ga u funkciju od iduće školske godine“, kazao je načelnik Semir Efendić.

Uvrštena su i sredstva za troškove ispitivanja



kvaliteta tla u blizini deponije Smiljevići. Ispitivanje zemljišta je značajno jer će se s aspekta struke dati odgovor na pitanje mogućnosti uzgoja određenih poljoprivrednih kultura u neposrednoj blizini deponije i kako bi se građanima mogla uspostaviti neka vrsta pravila u tom smislu i spriječilo izazivanje eventualnih zdravstvenih problema.

Rebalansom budžeta osigurana su dodatna sredstva i za podršku Odbojkaškom klubu Novi Grad za plasman ženske ekipe u Premijer ligu BiH, za sufinansiranje početnika u biznisu, kao i sredstva za plaćanje osiguranja zdravstvene zaštite za osobe starije od 65 godina i osobe u stanju socijalne potrebe i sl.

Zlatna plaketa „Safet Hadžić“ posthumno Miri Jurić

Vijeće je donijelo Odluku da se najveće općinsko priznanje Zlatna pojedinačna plaketa „Safet Hadžić“ posthumo dodijeli nedavno preminuloj zamjenici predsjedavajućeg Općinskog vijeća Novi Grad Sarajevo Miri Jurić. Plaketa se dodjeljuje za izuzetan doprinos u razvoju lokalne zajednice.

Zlatna plaketa bit će dodijeljena i direktoru Osnovne škole „Fatima Gunić“ Hajrudinu Čupriji za izuzetan doprinos u obrazovnom sistemu na području općine Novi Grad.

Kolektivna Zlatna plaketa „Safet Hadžić“ dodijelit će se Javnom preduzeću „Olimpijski bazen Otoka“ d.o.o. Sarajevo za doprinos u

razvoju sporta i rekreacije na području općine Novi Grad.

Srebrna pojedinačna plaketa „Safet Hadžić“ bit će dodijeljena i Vedranu Zubiću, profesoru geografije u JU Gimnazija Dobrinja, za poseban doprinos u obrazovnom sistemu, dok će Srebrna kolektivna plaketa biti dodijeljena Gorskoj službi spašavanja Novi Grad za spašavanje i unapređenje sigurnosti građana na području općine Novi Grad Sarajevo.

Priznanja će biti uručena na svečanoj sjednici Općinskog vijeća, u povodu 16. decembra - Dana Općine Novi Grad Sarajevo.



Od Kantona Sarajevo zatraženo izdvajanje sredstava za rješavanje problema Lepeničkog potoka i deponije Smiljevići

Vijećnicima je prezentirana Informacija Komisije za prostorno uređenje i zaštitu okoliša OV Novi Grad o stanju deponije Smiljevići, u kojoj su navedena obrazloženja o realizaciji zaključaka donesenih na tematskoj sjednici Općinskog vijeća, održanoj 12. septembra ove godine, povodom hitnog rješavanja problema deponije Smiljevići. Konstatovano je da većina zaključaka,

donesenih na tematskoj sjednici, nije realizirana. S obzirom na to, da jedan od zaključaka te sjednice da se u budžetu Kantona Sarajevo za 2020. godinu planiraju sredstva u iznosu od milion KM za završetak ucjevljenja Lepeničkog potoka u Zabrdju, nije realiziran, usvojena je inicijativa vijećnice Elze Gaković, da se u budžetu Kantona Sarajevo za iduću godinu planiraju sredstva kako bi se

u 2020. godini završilo ucjevljenje preostalog dijela Lepeničkog potoka, koji protiče kroz gusto naseljeno područje Zabrdja, a u koji se slijevaju procjedne vode iz tla deponije. Također je usvojena i inicijativa vijećnika Samira Čajića, kojom se od Vlade KS traži da se sredstva planirana Nacrtom budžeta KS za kupovinu helikoptera usmjere za saniranje deponije Smiljevići.



Alen Zorlak imenovan za predsjednika OIK-a

Vijeće je donijelo Odluku o imenovanju Adnana Keče za Općinskog pravobranioca u općinskom pravobranilaštvu Općine Novi Grad Sarajevo na mandatni period od četiri godine sa mogućnošću ponovnog imenovanja. Također, vijeće je donijelo Odluku o imenovanju Alena Zorlaka za predsjednika Općinske izborne komisije Novi Grad Sarajevo, a ova Odluka stupa na snagu po dobijanju saglasnosti od Centralne izborne komisije Bosne i Hercegovine.

Donesena je i Odluka o dopuni Odluke o upravljanju, korištenju i održavanju sportskih, kulturnih, komunalnih i drugih nekretnina kojima raspolaže Općina Novi Grad Sarajevo, kao i Odluka o pristupanju izradi urbanističkog projekta „Rezidencijalno naselje Bojnik“.

Vijeće je usvojilo i Nacrt programa rada Općinskog vijeća Novi Grad Sarajevo za 2020. godinu. Prihvaćen je i Izvještaj o realizaciji Akcionog plana za djecu Općine

Novi Grad Sarajevo za period mart 2018. – mart 2019. godine. Sjednici su prisustvovali i predstavnici Udruženja „Naša djeca“ Sarajevo i dječijeg parlamenta Općine Novi Grad - Adi Memić, Iman Jabučar i Ilma Brezac, koji su se obratili prisutnima i iskazali zahvalnost Općini i Općinskom vijeću na podršci i realizaciji projekata kojima se stvaraju uslovi za bolje obrazovanje i življenje djece i omladine u ovom Gradu.



Delegacija Sjevernog Kipra, sa načelnicima sedam kiparskih općina, boravila u posjeti Općini Novi Grad i Bosni i Hercegovini



Načelnik Općine Novi Grad Sarajevo Semir Efendić bio je domaćin delegaciji iz Republike Sjeverni Kipar, koja je 18. i 19. novembra boravila u Bosni i Hercegovini.

U delegaciji koju je predvodio Mahmut Özçınar, predsjednik Unije turske Republike Sjeverni Kipar bili su načelnici sedam kiparskih općina, a posjeta je organizirana u okviru saradnje lokalnih zajednica, članica Unije općina turskog svijeta (TDBB).

Razgovarali su o jačanju odnosa kroz uspostavu saradnje, prije svega u oblastima obrazovanja i razvoja turizama.

Prijem za delegaciju upriličen je u zgradi Općine Novi Grad, nakon čega se delegacija susrela i sa gradonačelnikom Sarajeva Abdulahom Skakom, u sarajevskoj Vijećnici. Upriličen je obilazak sarajevske žičare i Trebevića, a potom i stare jezgre Sarajeva i kulturnih znamenitosti glavnog grada BiH.

Pored Sarajeva, delegacija je posjetila i općine Prača i Goražde, koje su članice TDBB organizacije, kao i Višegrad i Foču, gdje su imali priliku vidjeti prirodne ljepote i kulturno- historijsko nasljeđe naše zemlje.





Sjednica UO TDBB u gradu Balikesir

U turskom gradu Balikesir, krajem jula, održana je prva radna sjednica Upravnog odbora Unije općina i gradova turskog svijeta (TDBB) nakon Izborne skupštine i konstituiranja novog saziva UO TDBB-a kojim od maja predsjedava gradonačelnik Konye Ibrahim Uğur Altay.

Sjednici je prisustvovao i načelnik Općine Novi Grad Sarajevo Semir Efendić, gdje se razgovaralo o planovima za naredni trogodišnji period, te je dogovoreno da bi se najmanje dva zasjedanja UO godišnje trebala održavati u nekoj od općina članica Unije izvan Turske.

Na Dnevnom redu Upravnog odbora i ovaj put se našlo nekoliko tačaka vezanih za Bosnu i Hercegovinu, a najvažnija je svakako bila otvaranje Kulturno - edukacionog centra u Glamoču, čiju izgradnju je u finansirao TDBB zajedno sa općinama članicama, te finansijerima partnerima iz BiH.

Kulturno-edukativni centar je jedan od najvećih projekata TDBB-a, a njegova vrijednost je oko 500.000 KM.

Na sjednici je bilo govora o nekoliko projekata čija realizacija je ranije inicirana, te su članovi Upravnog odbora TDBB-a informirani o spremnosti Direkcije vakufa Republike Turske da finansira obnovu kamenog mosta u Goraždu za šta je zahtjev ranije dostavljen od strane Vlade Bosansko-podrinjskog kantona Goražde. Međutim da bi se krenulo u realizaciju ovog velikog projekta potrebno je da se od strane Bosansko-podrinjskog kantona, Vakufske direkcije BiH i Općine Goražde dostavi potrebna dokumentacija vezana za restituciju dijela zemljišta na lijevoj i desnoj obali mosta koje je nacionalizovano 50-ih godina prošlog stoljeća, a koje bi bilo potrebno vratiti u posjed vakufima kako bi se moglo krenuti u projekat čija vrijednost se procjenjuje na oko 5 miliona eura.

Obnova kamenog mosta u velikoj mjeri bi doprinijela turističkoj ponudi Bosne i Hercegovine i grada Goražda, kao i obnove mostova na Neretvi, Čuprije u Konjicu, ali i Starog mosta u Mostaru. Zanimljivo je da je kameni most preko Drine u Goraždu izgrađen 20 godina prije višegradskog mosta Mehmed - paše Sokolovića, čiju obnovu je također finansirala Turska putem razvojne agencije TIKa.

Načelnik Efendić razgovarao je i sa predsjednikom Udruženja općina Albanije Haxhimali Agronom o mogućnosti uspostavljanja saradnje sa lokalnim zajednicama u BiH.



„Drago mi je da sam sa načelnicima kiparskih općina posjetio BiH, u kojoj boravimo na poziv Općine Novi Grad Sarajevo, a posjetili smo i ostale općine koje su članovi Unije općina turskog svijeta, kao i one koje imaju bratske odnose sa kiparskim općinama. Došli smo da vidimo šta možemo zajednički uraditi u sferi obrazovanja, kulture i drugim sferama života. Treći put sam u posjeti BiH, i mogu reći da svaki put kada dođem vidim ovdje veliki napredak“, izjavio je Mahmut Özçinar.

Ovom prilikom načelnik Efendić izrazio je zadovoljstvo posjetom kiparske delegacije, te je istakao spremnost za unapređenje odnosa između najveće Općine u BiH i općina Sjevernog Kipra.

Dodao je da je inicijativa za obostranu posjetu općina Sjevernog Kipra Bosni i Hercegovini, kao i općina iz naše zemlje Sjevernom Kipru nastala prije pola godine, te da su gosti zadovoljni planom obilaska BiH. Neki od njih su prvi put vidjeli Goražde, rijeku Drinu i kulturno-historijske znamenitosti kojima taj dio naše domovine obiluje.

Gosti su obišli i Centralno spomen-obilježje šehidima i poginulim borcima kod zgrade Općine Novi Grad, gdje su odali počast najhrabrijim sinovima naše domovine.



Načelnik Općine Bužim Mersudin Nanić u uzvratnoj posjeti Općini Novi Grad

Načelnik Općine Bužim Mersudin Nanić sa saradnicima je boravio u uzvratnoj posjeti Općini Novi Grad Sarajevo. Posjeta je uslijedila nakon posjete načelnika Semira Efendića ovoj najmlađoj lokalnoj zajednici u Unsko – Sanskom Kantonu i šire u aprilu ove godine.

Dvojica općinskih načelnika razmijenili su iskustva u realizaciji projekata i dogovorili buduću saradnju u smislu podrške Općine Novi Grad u realizaciji projekata koji se odnose na obilježavanje svega onoga što se dešavalo na prostoru općine Bužim u periodu agresije na BiH.

„Mi smo u aprilu bili kod njih, načelnik Nanić trenutno je najmlađi općinski načelnik u BiH, a s obzirom na to da sam ja u prošlom mandatu bio jedan od najmlađih bh. načelnika, na neki način imamo zajedničko iskustvo. Osim toga povezuje nas susretanje sa našom administracijom, sa problemima u našoj državi koje treba rješavati kako bi se realizovali projekti od interesa za razvoj dvije lokalne zajednice i njene građane“, kazao je načelnik Efendić.

Osim toga, dvije općine imaju poveznica iz perioda agresije na našu zemlju, a jedna od njih je herojska borba protiv agresora i heroji odbrambeno - oslobodilačkog rata. Jedan od devet bh. heroja

Izet Nanić je iz Bužima, dok su Safet Hadžić i Safet Zajko iz Općine Novi Grad, koja će pomoći u realizaciji projekata za obilježavanje godišnjice čuvene 505. Bužimske brigade 5. Korpusa Armije RBiH i pogibije njenog komandanta generala Izeta Nanića.

Načelnik Nanić istakao je zadovoljstvo saradnjom dviju lokalnih zajednica ističući obostranu želju za unapređenjem razvoja Općine Bužim. „Jedan od načina je primjer Općine Novi Grad, gdje iz njihovog iskustva možemo primjenjivati projekte kakve su oni već realizirali obzirom da smo mi najmlađa općina u Kantonu, a i šire, ovakvi sastanci pomažu, a načelnik Efendić želi da pomogne razvoju općine Bužim i države BiH“, rekao je Nanić.

Prije sastanka delegacije su obišle Centralno spomen - obilježje kod zgrade Općine i proučili Fatihu šehidima i poginulim brcima Novog Grada.

Tokom susreta je razgovarano je i na koji način Općina Novi Grad namjerava širiti kompleks Centralnog spomen – obilježja, te je dogovorena podrška u implementaciji projekta multimedijalne prezentacije biografija svih poginulih Općine Bužim, po uzoru na Općinu Novi Grad koja radi na pripremi tog projekta.



Načelnik Efendić primio muftiju zagrebačkog Aziza ef. Hasanovića

Muftija zagrebački doc. dr. Aziz ef. Hasanović i predsjednik Mešihata Islamske zajednice u Republici Hrvatskoj posjetio je Općinu Novi Grad Sarajevo, gdje se sastao sa načelnikom mr. Semirom Efendićem i pomoćnikom načelnika za boračka pitanja, rad, socijalna pitanja i zdravstvo Tajibom Delalićem.

Tokom sastanka razgovarano je o aktuelnim projektima koji se realiziraju na području općine Novi Grad Sarajevo. Muftija Hasanović posebno je izrazio interesovanje za postignuti napredak i brz razvoj ove lokalne zajednice u proteklom periodu u svim oblastima.

Tokom susreta razgovarano je i o mogućnostima uspostavljanja komunikacije i saradnje sa općinama sa prostora Hrvatske, obzirom na to da je zagrebačko muftijstvo zaduženo za cijelu Republiku Hrvatsku, te da Novi Grad nema niti jednu bratsku općinu u toj susjednoj državi. U tom smislu dogovoreno je da se u narednom periodu uspostave određeni kontakti sa općinama iz Karlovačke županije kako bi se ostvarila saradnja sa lokalnim zajednicama u Hrvatskoj u kojima živi značajan broj Bošnjaka.

Muftija zagrebački Aziz ef. Hasanović zahvalio je načelniku Efendiću na prisustvu iftaru i bajramskom prijemu, koji je 3. juna ove godine održan u Zagrebu, a kojem je prisustvovao i hrvatski politički vrh.



Predstavnici Sindikata policije Kantona Sarajevo kod načelnika Efendića

Općinu Novi Grad Sarajevo posjetili su predstavnici Sindikata policije Kantona Sarajevo Sadik Ećo, predsjednik Upravnog odbora, Damirel Alihodžić, predsjednik Skupštine i Almir Obuća, sekretar Sindikata policije.

U razgovoru sa načelnikom Semirom Efendićem iskazali su zahvalnost na pruženoj podršci u organizaciji obilježavanja Prve godišnjice od brutalnog ubistva policijskih službenika Četvrte PU Novi Grad, Adisa Šehovića i Davora Vujinovića, ubijenih na službenoj dužnosti 26. oktobra prošle godine na Alipašinom Polju. Tom prilikom načelniku Efendiću uručili su zahvalnicu i simboličan poklon.

„Općina Novi Grad, na čelu sa načelnikom Efendićem, puno nam je pomogla u organizaciji obilježavanja godišnjice ubistva naših kolega, od ustupanja sportske dvorane, tehničke i drugih vidova podrške. Ovo je prilika da se zahvalimo načelniku i Općinskom vijeću na pomoći porodicama poginulih policajaca. Općina svakog mjeseca uplaćuje određenu finansijsku pomoć za porodice naših ubijenih policijskih službenika Adisa i Davora, kao i za njihove roditelje“, kazao je Ećo.

Podsjetio je da je odmah nakon tragičnog događaja, Općinsko vijeće



Novi Grad Sarajevo, na vanrednoj sjednici, donijelo zaključak da se formira poseban fond za pomoć roditeljima ubijenih policijskih službenika i suprugama sa djecom, što je i učinjeno.

Također je naveo da ova lokalna zajednica svake godine izdvaja grant za podršku u radu Četvrte PU Novi Grad, te da je u ovogodišnjem budžetu za tu namjenu izdvojeno 300.000 KM.

Podsjetimo, godišnjica ubistva Adisa i Davora obilježena je održavanjem Memorijalnog turnira u malom nogometu u kojem je učestvovalo 26 ekipa iz policijskih agencija u BiH, te otkrivanjem spomen-obilježja na mjestu njihove pogibije, u Geteovoj ulici, na Alipašinom Polju.

MARINKO BOŽOVIĆ, NAČELNIK OPĆINE ISTOČNA ILIDŽA POSJETIO OPĆINU NOVI GRAD SARAJEVO

Dvije općine namjeravaju zajednički obnoviti trg na Dobrinji

Načelnik Općine Novi Grad Sarajevo Semir Efendić sastao se sa načelnikom Općine Istočna Ilidža Marinkom Božovićem koji je sa načelnikom za urbanizam Nenadom Perjanom posjetio Općinu Novi Grad Sarajevo.

Obzirom da je Istočna Ilidža Općina sa kojom Novi Grad graniči, razgovarano je o zajedničkoj saradnji dvije lokalne zajednice u oblasti rješavanja saobraćajne infrastrukture i poboljšanju sigurnosti građana dviju općina. U tom smislu dogovorena je zajednička saradnja na rekonstrukciji trga Sabora bosanskog, koji se nalazi na samoj granici dva entiteta na Dobrinji 4 i trga u dijelu Istočne Ilidže.

Trg je u upotrebi duže od 30 godina i u lošem stanju, a svakondnevno ga koristi veliki broj stanovnika obje općine. Potrebno je uraditi njegovu kompletnu rekonstrukciju. Obzirom da se jedan dio trga koristi za motorna vozila, taj dio će biti riješen za funkciju saobraćaja, dok će se u drugom dijelu planirati drugi sadržaji koje će biti moguće uklopiti u postojeći ambijent, kao što su igralište, klupe za odmor i drugi sadržaji za građane.

„Dogovoreno je da se u narednom periodu usaglasi jedno idejno rješenje za cjelovitu rekonstrukciju trga na teritoriji obje općine. Naše nadležne službe zajednički će obići teren i uraditi idejno rješenje, kako bi u narednom periodu bili spremni za rekonstrukciju trga i da bi u općinskim budžetima za narednu godinu planirali neophodna

sredstva. Radi se o projektu značajnom za stanovnike obje općine“, kazao je načelnik Efendić.

Jedna od tema sastanka bila je i postavljanje videonadzora, iz sigurnosnih razloga. S obzirom na to da će kamere biti postavljene u kontaktnoj zoni, bitno je da se zajednički usaglase pozicije i prostor koji će videonadzor pokrivati.

Ovom prilikom je načelnik Božović zahvalio menadžmentu Općine Novi Grad na prijemu, ističući spremnost za realizaciju projekta koji je od izuzetne važnosti za stanovnike obje općine.





Delegacija turskog grada Konje u posjeti Novom Gradu

Načelnik Općine Novi Grad Sarajevo Semir Efendić sa saradnicima ugostio je delegaciju iz Konje, koju je predvodio gradonačelnik Ugur Ibrahim Altaj (Altay).

Gradonačelnik Alataj trenutno obavlja funkciju predsjednika Unije općina turskog svijeta (TDBB), a na tu funkciju izabran je u maju ove godine na Generalnoj skupštini održanoj u Istanbulu, kada je i načelnik Efendić izabran za člana Upravnog odbora TDBB-a.

U naoj državi delegacija je boravila povodom otvaranja kulturno – edukacionog centra u Glamoču, kojeg je Unija općina turskog svijeta (TDBB) dijelom finansirala.

Načelnik Efendić izrazio je zadovoljstvo što ima priliku ugostiti delegaciju iz grada Konje, te je pokazao spremnost za konkretniju saradnju.

Inače Konja i grad Sarajevo bratimljeni su već dugi niz godina, a na sastanku je predloženo da Općina Novi Grad Sarajevo uspostavi saradnju sa nekom od općina u sastavu Konje.

Nakon sastanka, članovi turske delegacije zajedno sa načelnikom Efendićem i njegovim saradnicima, obišli su Centar "Safet Zajko", te Dom oslobodilaca na Žuči, gdje su imali priliku pogledati izložbenu postavku eksponata ratnih brigada „Memorijal Dom oslobodilaca brdo Žuč“ koja je realizovana u saradnji sa JU „Muzej Sarajeva“.



Predstavnici Općine posjetili porodicu rahmetli hadži Ismeta Čengića



Načelnik Općine Novi Grad Sarajevo Semir Efendić i sekretar Jedinstvenog Općinskog organa Mersa Kustura posjetili su danas porodicu rahmetli hadži Ismeta Čengića.

U Sarajevu je, u 74. godini života, umro hadži Ismet Čengić. Ismet Čengić je bio dugogodišnji profesor, a u periodu od 1997. do 2000. godine obavljao je funkciju načelnika Općine Novi Grad Sarajevo. Hadži Ismet Čengić je bio i dugogodišnji član HO „Merhamet“ MDD i predsjednik Suda časti ove humanitarne organizacije. Njegovom smrću, „Merhamet“ je ostao bez iskrenog prijatelja i čovjeka koji je dao izuzetan doprinos u radu „Merhameta“ i njegovoj misiji dobročinstva.



Direktor Goethe-Instituta u BiH Martin Schumacher u posjeti Općini Novi Grad

Načelnik Općine Novi Grad Sarajevo Semir Efendić sastao se sa direktorom Goethe-Instituta u BiH Martinom Schumacherom, i tom prilikom razgovarao o budućoj zajedničkoj saradnji u različitim oblastima.

Martin Schumacher iskazao je interesovanje Goethe-Instituta za prostore na području općine Novi Grad Sarajevo u kojima bi se smjestila kompletna administracija Instituta, obzirom da trenutni prostorni kapaciteti ne ispunjavaju potrebe ove institucije. Schumacher je izrazio želju i za ostvarivanjem saradnje između grada Bonna i Općine Novi Grad Sarajevo, sa posebnim naglaskom na zajedničkom razvoju ideja na polju obrazovanja, kulture i sporta.

Općinski načelnik Semir Efendić, tim povodom, upoznao je direktora Schumachera sa dosadašnjim aktivnostima koje je ova jedinica lokalne samouprave realizirala u proteklom periodu. Nakon održanog sastanka direktor Goethe-Instituta Martin Schumacher posjetio je i Galeriju Općine Novi Grad Sarajevo.



Prijem za učenike OŠ „Meša Selimović“



Općinski načelnik Semir Efendić ugostio je učenike devetog i sedmog razreda Osnovne škole „Meša Selimović“ zajedno sa Isetom Trepalovac, profesoricom na predmetu društvo, kultura i religija. Načelnik je sa učenicima razgovarao o načinu funkcionisanja lokalne samouprave, o realizaciji brojnih projekata koji su privukli njihovu pažnju, posebno su ih zanimala sportska igrališta, kao i drugi projekti koji su implementirani na području ove lokalne zajednice, ali i oni koji su u fazi realizacije. U vrlo konstruktivnom razgovoru, učenici su se interesirali za svakodnevne obaveze općinskog načelnika, te razloge zbog kojih se Semir Efendić, kao vrlo mlad, odlučio za bavljenje politikom.

Odgovarajući na brojna pitanja učenika, načelnik Efendić je kazao da je još u srednjoj školi znao da će se baviti politikom, te da se u skladu sa svojim namjerama i školovao na Univerzitetu u Sarajevu i u Maleziji. On je također kazao da i oni trebaju slijediti svoje želje prilikom upisa na fakultete, ali da pri tome odaberu zanimanja sa

kojima će imati veće šanse za zapošljavanje.

Trepalovac je kazala da je nastavnim planom i programom iz predmeta društvo, kultura i religija planirano da učenici posjećuju vjerske i kulturne ustanove u BiH, ali da su učenici iskazali želju da posjete načelnika Općine Novi Grad Sarajevo, kao načelnika koji je na proteklim lokalnim izborima osvojio najveći broj glasova.

„Sama činjenica da je dobio povjerenje tolikog broja građana, govori o kakvom se čovjeku radi. On realizira brojne projekte, pomaže svim građanima, od onih koji se tek rode, mladih, do penzionera. Teško je nabrojati sve šta je urađeno, ali smo svjedoci toga da je Općina Novi Grad postala jedan grad, u pravom smislu te riječi, i mjesto ugodnog življenja“, zaključila je Trepalovac.

Tokom posjete djeca su imala priliku vidjeti i nekoliko idejnih rješenja za projekte koji se planiraju realizirati u narednom periodu u općini Novi Grad Sarajevo.

Općinu Novi Grad posjetio načelnik Općine Rudo, Rato Rajak

Načelnik Općine Novi Grad Sarajevo Semir Efendić sastao se sa načelnikom Općine Rudo, Ratom Rajakom, sa kojim je razgovarao o projektima koji se realiziraju na području te lokalne zajednice i održivom povratku u taj dio Istočne Bosne.

Tom prilikom Rajak se zahvalio na podršci projektima održivog povratka koju Općina Novi Grad kontinuirano realizira već nekoliko godina.

Sastanak je uslijedio nakon potpisivanja memoranduma za finansijsku pomoć pri realizaciji projekta sanacije lokalnog puta koji povezuje mjesto Bjeljevine sa naseljem Radoželje, kao i veliki broj sela koja gravitiraju tom području, a gdje uglavnom žive povratnici. Time će se riješiti dugogodišnji problem mještana ovog dijela mjesne zajednice Strgačina.

Inače, načelnik Rudog poznat je po tome da ga je Milorad Dodik u decembru prošle godine pokušao, putem opoziva, smijeniti sa pozicije načelnika, ali u tome nije uspio.



„Bingo“ gradi najveći i najmoderniji tržni centar u općini Novi Grad



Najveći investitor u maloprodajne objekte u Bosni i Hercegovini, Bingo d.o.o Tuzla, gradi veliki kompleks u ulici Džemala Bijedića, u općini Novi Grad, koji će se prostirati na 44.584 kvadratna metra.

Ovaj impozantni objekat gradi se na lokaciji koja je nekoliko godina bila zapuštena zbog odustajanja kompanije „Bauhaus“ od izgradnje svog trgovinskog centra. U toj zoni u značajnoj mjeri je zastupljena stanogradnja za kojom i dalje postoji najveća potražnja. Jednim ovakvim objektom koji zauzima veliki prostor, ali bez visoke gradnje, daje se dodatni kvalitet prostora u ovom dijelu grada, naročito zbog velikog broja parking mjesta planiranih uz sami objekat, oko 300 vanjskih parking mjesta i blizu 400 u samoj garaži objekta. Pored toga, planirano je da se u sklopu ovog objekta nalazi i multipleks kino koje će biti prvo u ovom dijelu grada, izgrađeno prema svim standardima, a koje će pored trgovine i ugostiteljstva biti dodatni sadržaj za veliki broj stanovnika koji žive u neposrednoj blizini.

Radi se o poslovnom objektu čija je namjena trgovina, kultura i zabava, a objekat će se sastojati od podruma i prizemlja. U prizemlju će biti hipermarket, restoran sa galerijom i vanjskom terasom, te ostali poslovni prostori, kulturni i zabavni sadržaj na površini od oko 6.000 kvadratnih metara. Osim navedenog, predviđena je zelena površina i saobraćajnica ispred objekta., a duž cijelog centra će biti šetalište. Kompleks je planiran da bude mjesto okupljanja, shoppinga i zabave za veliki broj Sarajlija. Planirani završetak prve faze je kraj decembra 2019., a u maju 2020. kompleks bi trebao biti u potpunosti završen, navode iz ove bh. kompanije.

Općina sufinansirala certificiranje osam novogradskih kompanija

Služba za privredu i lokalni ekonomski razvoj Općine Novi Grad Sarajevo, krajem 2018. godine, je raspisala, po prvi put, Javni poziv namijenjen privrednim društvima za sufinansiranje certificiranja proizvodnih procesa, proizvoda ili usluga s ciljem jačanja konkurentnosti kompanija na domaćem i stranom tržištu.

Ova mjera je uvedena na inicijativu privrednika i njihovih saznanja o značaju certifikata za brži razvoj kompanija, ali i ekonomski rast i razvoj. Pravo na sufinansiranje troškova certificiranja ostvarilo je osam novogradskih kompanija: Tvornica tehnološke opreme d.o.o., Kristal d.o.o., Institut za certificiranje sistema d.o.o., Proven d.o.o., Hydro - metal d.o.o., I&I Company d.o.o. Sarajevo, D. Inženjering d.o.o. Sarajevo, Brojler d. o.o. Sarajevo.

Tim povodom, predstavnici Službe za privredu i lokalni ekonomski razvoj Općine Novi Grad Sarajevo posjetili su certificirane kompanije i razgovarali sa menadžmentom o tehnološkim procesima koji se odvijaju u pomenutim kompanijama. Istaknuto je da su certificirane kompanije same uvidjele potrebu standardizacije rada radi povećanja konkurentnosti na domaćem i ino tržištu, te da su osjetili pozitivne efekte.

U 2019. godini Općina Novi Grad Sarajevo nastavit će sa podrškom kompanijama koje su certificirale radne procese u skladu sa međunarodno priznatim standardima, a s ciljem povećanja broja ovakvih kompanija i njihove promocije na teritoriji općine Novi Grad Sarajevo.





Podrška za 33 nova biznisa u općini Novi Grad Sarajevo



Od prošle godine, od kada se provodi nova podsticajna mjera sufinansiranja troškova samostalnih poduzetnika - početnika u biznisu, Općina Novi Grad Sarajevo sufinansira troškove poslovanja 196 novih obrtnika koji su registrirani na njenom području. Za tu namjenu iz ovogodišnjeg budžeta izdvojeno je 300.000 KM.

U zgradi Općine potpisani su ugovori sa 33 nova obrtnika sa širokim spektrom poslova kojima se planiraju baviti. Ovom podsticajnom mjerom Općina će dvije godine sufinansirati troškove njihovog poslovanja novčanim iznosom od 5.400 KM. To je podrška poduzetnicima koji prvi put osnivaju biznise u vidu obrta, trgovinske radnje ili ugostiteljstva.

Prisutnim obrtnicima dobrodošlicu su poželjeli Općinski načelnik Semir Efendić i šefica Odsjeka za lokalni ekonomski razvoj Hazima Pecirep. Istakli su da se radi o jednom od najboljih projekata iz oblasti privrede, odnosno jednoj od devet podsticajnih mjera koje provodi Služba za privredu i lokalni ekonomski razvoj.

„Općina će dvije godine finansirati njihove troškove, što je za njih vrlo važno. Stara izreka kaže da je svaki početak težak, a mi ga kao lokalna zajednica nastojimo olakšati. Do sada su kroz ovaj program naši sugrađani pokrenuli 200 biznisa i dobar podatak je taj da je od njih 200 samo 6 odustalo, jer su našli neki drugi način zaposlenja. Za nas kao Općinu je važno da imamo tako velik broj ljudi koji žele da pokrenu vlastiti biznis i da riješe pitanje svog zaposlenja. Oni popravljaju ukupnu sliku naše privrede, ali i pitanje zaposlenosti, odnosno nezaposlenosti. Drago mi je kada vidim da su tu većinom mladi ljudi i da su se ohrabрили na jedan takav korak. Velika je stvar kada neko sam krene rješavati neko pitanje u svom životu, a naročito pitanje zaposlenosti“, rekao je načelnik Efendić.

Prilika za zaposlenje

Novi Grad je velika općina, sa puno stanovnika i to veliko tržište je prilika za sve one koji su nezaposleni da kroz neku svoju poslovnu ideju dođu do zaposlenja, ali i prosperiteta, jer neki od tih biznisa mogu ostvariti prihode kakvi se ne mogu ostvariti nekim drugim zaposlenjem.

Ahmet Adrović biznisom se baviti 15 godina. Posao je započeo osnivanjem firme za prodaju auto dijelova, boja i lakova, međutim,

vremenom se javila potreba za ugradnjom auto dijelova, a samim tim i za proširenjem kapaciteta, te su Ahmet i njegova supruga odlučili da pokrenu još jedan biznis, te su otvorili i auto servis. „U auto servisu smo zaposlili jednu osobu, zahvaljujem Općini koja nam je olakšala poslovanje. To je podstrek za naš dalji rad, za naš posao, za naše ideje, da stvaramo i da se širimo. Ovim putem pozivam sve ostale koji nisu zaposleni da krenu u male biznise, to će im donijeti boljitak za kratko vrijeme“, poručio je Ahmet.

Ostanak u Bosni i Hercegovini

Nevres Softić odlučio je pokrenuti marketinšku agenciju i nije se pokajao. Umjesto da ode raditi vani gdje se rad, možda, više plaća, odlučio se, kaže, ostanu u Bosni i Hercegovini. „I evo, hvala Bogu, mogu kazati da je vrijedilo pokušati. S druge strane mi je drago što sam to pokrenuo ovdje u općini Novi Grad koja zaista ima sluha za mnoge poduzetnike koji odluče da sami kreiraju nešto u svom životu. Ovaj podsticaj uopšte nije beznačajan. Dakle, nekih 5.400 KM za dvije godine poslovanja i nije tako mala cifra, posebno zbog toga što isplata ide kvartalno i prati neke potrebe u toku poslovanja, što vas s druge strane tjera da radite“, priča Nevres i dodaje:

„Ono što me posebno oduševilo kad je u pitanju ovaj podsticaj je jednostavnost procesa, znate kako to inače biva, treba milion nekih papira, a ja se i ne sjećam da sam osim podnošenja zahtjeva trebao nešto da donesem od dokumenata, osim onoga što sam već imao i što je bilo dovoljno. Dakle, moj savjet svima onima koji razmišljaju o tome da napuste domovinu je da ipak pokušaju prije nego bilo šta urade ili donesu neku veliku životnu odluku“.

S obzirom da se prvi put susreo sa administracijom, jer prvi put radi za sebe, Softić naglašava da općinske službe rade ažurno, uposlenici su vrlo susretljivi, što mnogo znači u pokretanju poslova, te dodaje da je ovo odličan primjer kako lokalna zajednica može da pomogne. Napomenuo je da se ne radi samo o finansijskoj podršci početnicima u biznisu, već i o svakoj drugoj podršci u smislu konsaltinga koja se realizira putem Službe za privredu i LER i Centra za razvoj biznisa Općine Novi Grad.

Prilika za obuku i zaposlenje za 48 osoba sa evidencije Biroa za zapošljavanje Novi Grad



U Općini Novi Grad Sarajevo potpisani su ugovori sa 23 poslodavca koji će obučiti i zaposliti 48 nezaposlenih osoba koje se nalaze na evidenciji Biroa za zapošljavanje Novi Grad Sarajevo. Odabrane osobe imat će priliku da prođu obuku u firmama koje su ispunile uslove javnog poziva, a potom i da steknu prvo radno iskustvo u različitim oblastima počev od trgovine, prodaje, hotelijerstva, građevinarstva do proizvodne djelatnosti, postanu konkurentnije na tržištu i zaposle se. Odabir osoba za obuku i zapošljavanje vršit će poslodavac uz posredovanje JU Službe za zapošljavanje KS.

Za ovu namjenu iz budžeta Općine Novi Grad Sarajevo ove je godine izdvojeno 250.000 KM. Riječ je o jednoj od deset poticajnih mjera, koje ova lokalna zajednica provodi s ciljem razvoja privrede, lokalnog ekonomskog razvoja i povećanja zaposlenosti na svom području.

Na prijedlog Poslovnog savjeta i općinskog načelnika prije tri godine počela je realizacija ove mjere koja je u suštini detektovala jedan od

najvećih problema privrede i privrednika na području naše općine i cijele BiH, a to je nedostatak kvalitetne radne snage. Zbog toga je kreirana mjera „Sufinansiranje obuke nezaposlenih osoba za poznatog poslodavca“.

Jedna od potpisnica sporazuma, Ferida Hadžić, predstavnik je firme TMP - društvo za zapošljavanje slijepih i slabovidnih osoba, istakla je da se u njihovoj firmi javila potreba za zapošljavanjem tri radnika. „Obuka će trajati tri mjeseca, a odabrane osobe imat će priliku proći kroz proces proizvodno - uslužnih djelatnosti. To podrazumijeva određeni vid obuke u našoj štampariji, na različitim mašinama, kao i izradi papirnih salveta. Bit će angažirane na onim poslovima u kojima steknu najbolje vještine. Podrška Općine nam puno znači, jer je teško samofinansirati zapošljavanje u privrednim društvima kao što je naša zaštitna radionica, gdje su svi uposleni sa određenim procentom umanjene radne sposobnosti“, izjavila je Ferida.

Širenje kapaciteta poslovanja i nova radna mjesta u automobilskoj industriji

Načelnik Općine Novi Grad Sarajevo Semir Efendić sastao se sa predstavnicima proizvodnih i skladišnih kompanija ASA Šped i Veritas Automotive d.o.o.

Kompanija Veritas Automotive d.o.o kćerka je njemačke kompanije. U općini Novi Grad, gdje posluje, ova firma zapošljava 500 radnika, ostvarujući promet od 36 miliona eura.

Kompanije Veritas Automotive i ASA Šped partneri su od prvog dana poslovanja i planiraju proširenje kapaciteta poslovanja i nova radna mjesta.

„Samo u prvoj fazi djelovanja, od ukupno tri, planirano je 205 novih radnih mjesta. Pri završnoj fazi ovog paketa, zaposlenje će dobiti čak 805 novih uposlenika. Završnom fazom projekta proširit ćemo kapacitete na 15.100 kvadrata, kao i dodatni promet od 124 miliona eura“, kazao je Ervin Berbić, direktor Veritas Automotive kompanije. Direktor ASA Šped d.o.o. Abdulah Povlakić ovom prilikom ukazao je na važnost osiguravanja resursa i uslova za nesmetan rad svim

sudionicima u procesu širenja kapaciteta.

„Jako je važno imati dobru i kvalitetnu poslovnu saradnju sa klijentima, ali i predstavnicima lokalne zajednice. Naša kompanija kontinuirano radi na usavršavanju i proširenju poslovnih kapaciteta, tako da, osim proizvodnih, logističkih i drugih usluga, Asa Šped prati i razvoj svojih klijenata, te proširuje vlastite kapacitete. Kupili smo još jednu lokaciju u Rajlovcu površine oko 35.000 kvadratnih metara, a širenje ćemo nastaviti ubuduće“, kazao je Povlakić.

Eldin Hadžiselimović, direktor Asa Grupacije, koja inače zapošljava više od 1.000 radnika, istakao je važnost ideje i želje za napredovanjem. A uspostavljanje dobrih poslovnih prilika za sve one koji žele širiti kapacitete ili investirati u općini Novi Grad, prioritet je ove lokalne zajednice.

„Na taj način pružamo svojim kadrovima priliku za zaposlenje, a ujedno kreiramo i pozitivnu sliku za sve one koji žele razvijati biznis u BiH“, naglasio je načelnik Efendić.



Poljoprivrednim proizvođačima dodijeljeni novčani podsticaji

Općina Novi Grad Sarajevo dodijelila je novčane podsticaje poljoprivrednim proizvođačima koji su putem Javnog poziva ostvarili pravo na ovaj vid podrške, a tim povodom u sali Općinskog vijeća, 16. oktobra, potpisani su ugovori sa predstavnicima četiri udruženja, zadruge i nevladine organizacije, te 87 kandidata.

Novčani podsticaji su dodijeljeni za uzgoj i držanje pčelinjih društava, držanje priplodnih junica, uzgoj muznih krava, zatim za farme koza i ovaca, te poljoprivrednu proizvodnju. Također, podsticaji su dodijeljeni i za certificiranje proizvodnje, kao i za nabavku nove poljoprivredne opreme i mehanizacije.

Obzirom da je poljoprivredna proizvodnja sastavni dio privrede, te da osim ekonomsko-privrednog karaktera, naši poljoprivrednici doprinose i socijalnom i ekološkom aspektu, lokalna zajednica podržava njihov rad, jer oni na taj način razvijaju općinu Novi Grad. Ugovore za podsticaj držanja i uzgoja pčelinjih društava potpisali su Rahman Babić i Abdulah Marevac. Već duži vremenski period uspješno se bave pčelarstvom. Iako pčelarski posao smatraju neunosnim, podsticaj poput ovog od Općine Novi Grad predstavlja stimulans za dalji rast i razvoj. Voljeli bi, kako kažu, da se i drugi predstavnici vlasti ugledaju na ovaj pozitivan općinski primjer, jer

privrednici u našoj zemlji prolaze kroz iznimno teške zakonske i pravne norme.

„Zakon o organskoj proizvodnji donesen je 2006. godine. Podzakonski akti još nisu doneseni. Mi ostvarujemo pravo na certifikaciju proizvodnje, a troškovi organske proizvodnje su od 30 do 40 posto skuplji, tako da imamo mali broj organskih proizvođača. Općina Novi Grad je za primjer svim općinama“, ističe Babić.

Pčelar Abdulah Marevac kaže da treći put dobija podsticaj zahvaljujući Općini Novi Grad. Njegove pčele su trenutno u Višegradu, a on je, bez obzira na to, dobio potrebna novčana sredstva aplicirajući na Javni poziv Općine Novi Grad.

Šuhra Borovina se više od deset godina bavi plasteničkom proizvodnjom. Osim podsticaja, koji već treći put dobija od Općine, od velike pomoći su joj bile i besplatne edukacije koje su već duži niz godina uspješan općinski projekat.

Za ovu namjenu, iz budžeta općine izdvojena su finansijska sredstva u iznosu od 74.854 KM. Općina ima namjeru do kraja tekuće godine objaviti još jedan Javni poziv u cilju podrške poljoprivrednim proizvođačima.



Sufinansiranje zapošljavanja pripravnika u 11 kompanija i ustanova

U saradnji sa Javnom ustanovom „Služba za zapošljavanje Kantona Sarajevo“, Općina Novi Grad već petu godinu provodi podsticajnu mjeru „Sufinansiranja zapošljavanja pripravnika“. Na taj način ova lokalna zajednica mladim ljudima pruža mogućnost za sticanje prvog radnog iskustva, te kasnije zaposlenja u struci.

Ove godine Općina će sufinansirati obavljanje pripravničkog staža za 11 nezaposlenih visokoobrazovanih osoba sa evidencije Biroa za zapošljavanje Novi Grad Sarajevo. Za tu namjenu u Budžetu Općine Novi Grad Sarajevo planirana su sredstva u iznosu od 170.000 KM. Sa direktorima firmi i ustanova u kojima će pripravnici sticati svoje prvo radno iskustvo potpisani su ugovori o realizaciji navedenog projekta.

Obzirom da je Služba za zapošljavanje KS-a u dva navrata u 2018. i 2019. godini raspisala javne pozive, zbog nedostatka finansijskih sredstava za finansiranje svih onih koji su zadovoljili uslove javnih poziva, Općina je preuzela obavezu da finansira zapošljavanje

preostalih pripravnika u 11 kompanija i javnih ustanova.

Direktor firme SafeNet d.o.o., Fadil Belko, i jedan od potpisnika ugovora o sufinansiranju zapošljavanja pripravnika, istakao je zahvalnost na ovoj vrsti pomoći, naglasivši pri tom problem pronalaska kvalitetne radne snage, prvenstveno u oblasti informacionih tehnologija, čime se bavi njegova firma.

„Postoji velika potreba za ovom vrstom radne snage, međutim, nema dovoljno obrazovnih ustanova u Kantonu Sarajevo koje proizvode dovoljno kvalitetan kadar da bi podmirili potrebe tržišta. Nadam se da ćemo uspjeti naći osobu sa kvalitetnim znanjem koja će u našoj firmi raditi pripravnički staž na poslovima softverskog inženjeringa, a koju potom možemo zaposliti“, kazao je Belko.

Odabir pripravnika sa evidencije Biroa za zapošljavanje vršit će kompanije i ustanove u kojima će te osobe raditi pripravnički staž, u skladu sa vlastitim procedurama.

Korisnicima dodijeljeni sistemi za vertikalni uzgoj biljaka

Nakon što je u martu ove godine održana prezentacija iz oblasti urbane poljoprivredne proizvodnje koju je organizirala Općina Novi Grad Sarajevo u saradnji sa Turskom razvojnom agencijom „TIKA“ i anketiranje polaznika, predstavnici TIKA izvršili su odabir korisnika kojima su dodijeljeni vertikalni sistemi za uzgoj biljaka. Time je počela realizacija projekta „Urbana poljoprivreda,“ na području općine Novi Grad Sarajevo, a to je prilika za ljude da uzgajaju ono što žele i da imaju svježiju hranu nadohvat ruke.

Projekat prezentira iskorištavanje balkona u stambenim zgradama za intenzivnu biljnu proizvodnju, koja vertikalnim sistemima proizvodnje višestruko povećava iskorištenu površinu i na taj način omogućava domaćinstvima da više konzumiraju svježiju hranu i ostvare uštede u budžetu.

Trideset četiri odabrana korisnika od Turske razvojne agencije „TIKA“ dobili su sisteme za vertikalni uzgoj biljaka, koji su već postavljeni na njihovim balkonima. Sistemi se sastoje od dvije panelne ograde (nosači vertikalnih sistema), 100 posuda sa sistemom za navodnjavanje, rasada biljki i priručnika za vertikalni uzgoj.

Vertikalni uzgoj biljaka osim što omogućava proizvodnju hrane na minimalnoj površini, ima i druge prednosti, kao što su uzgoj svježih poljoprivrednih proizvoda na kućnom pragu, te nudi ekonomski opravdanu proizvodnju povrća.

Namijenjeni su za proizvodnju voća, povrća, začinskog i ukrasnog bilja na otvorenom i zatvorenom prostoru. Sistemi su fleksibilni i

prilagodljivi za različite tipove prostora u urbanim sredinama. Saksije sa vertikalnim nosačima moguće je ugraditi u različite površine i pomjerati po visini i širini, zavisno od potreba.

Također, moguće je vršiti zamjenu biljke, a to znači da kada potrošite jednu salatu, onda stavljate na to mjesto drugu biljku. Sistem se može i zimi koristiti, ali se u tom slučaju u unutrašnji prostor trebaju instalirati lampe koje bi ustvari bile dotok svjetlosti u tom zimskom periodu.





Nagrađeni najuređenija dvorišta, balkoni i ulazi u stambenu zgradu

S ciljem stvaranja ambijenta ugodnog življenja i podsticanja hortikulturnog uređenja zelenih površina, Općina Novi Grad Sarajevo drugu godinu zaredom nagrađuje hortikulturno najuređenije balkone, dvorišta i ulaze u stambene zgrade, a u 2019. godini, prvi put su nagrađena i hortikulturno najuređenija dvorišta privrednih subjekata koji svoju registriranu djelatnost obavljaju na području općine Novi Grad Sarajevo. Zaljubljenici u cvijeće i prirodu ovaj projekat dočekali su sa oduševljenjem, a predstavnici Službe za privredu i lokalni ekonomski razvoj, koja navedeni projekat provodi, obišli su nagrađene pojedince i privredne subjete i uručili im ugovore. Prvo mjesto za hortikulturno najuređeniji balkon osvojila je Vahida Hajdarević, drugo Hafiza Bajraktarević, dok je treće mjesto pripalo Jasminu Marevcu.

Hafiza Bajraktarević, pohađala je edukacije koje je organizirala Općina Novi Grad, a onda je stečeno znanje primjenjivala na svojim biljkama. „Volim raditi svojim rukama, volim raditi s kamenom, volim cvijeće. Svako jutro kad mu priđem ja mu tepam, jer kad mu tepam imam osjećaj da bolje raste“, ističe Hafiza.

Za hortikulturno najuređenija dvorišta nagrađeni su Mediha Karačić, Vahida Bejtović i Tahir Duraković. Tahir sa suprugom Fatimom, u Zabrdju ima istinsku oazu zelenila, raznobojnog cvijeća i raznovrsnih mirisa. Iznenađeni osvojenom trećom nagradom Tahir i Fatima kažu da rade iz zadovoljstva i ljubavi prema prirodi, cvijeću i drugim biljkama, a među ukrasnim biljkama uspijeva i smokva. Novčane nagrade za hortikulturno najuređeniji ulaz u stambenu zgradu pripale su Esadu Suljeviću, zatim Mustafi Ljevakoviću i Saninu Džananoviću.



Prvonagrađena kompanija Megamix d.o.o.

Privredni subjekti u Novom Gradu grade svoje objekte i posluju po uzoru na svjetske kompanije. Trude se da prostor oko svojih objekata oplemene i uljepšaju cvijećem i ukrasnim biljkama. Među njima je firma Megamix, u Rajlovcu. Za hortikulturno uređenje dvorišta dodijeljena joj je prva novčana nagrada.

Na oko 3.500 metara kvadratnih zelene površine, menadžment ove kompanije odlučio se da zasadi i njeguje na desetine različitih vrsta biljaka, a među njima je rijetko viđeno stablo libanonskog cedara. Prvi čovjek ove kompanije Senad Musemić kaže da je okolina kompanije, ustvari, ogledalo stanja u samoj kompaniji. „Smatramo da je to jako bitna stvar i radimo na tome kontinuirano, a biljke zahtijevaju da se njeguju i održavaju na način kako je to i propisano“, ističe Musemić.

Drugonagrađena je firma „MESSER TEHNOPLIN“ d.o.o. , dok je treća nagrada dodijeljena firmi TMP d.o.o., koja zapošljava invalidna lica u nekoliko djelatnosti, a tokom godine se kontinuirano dosta radi i na hortikulturnom uređenju. Direktor firme Veselin Rebić izrazio je zadovoljstvo što je ova firma jedna od nagrađenih firmi, jer predstavlja izuzetno priznanje trudu i naporima zaposlenika u Društvu za zapošljavanje slijepih i slabovidnih lica, koji se trude da tokom cijele godine uređuju dvorište i time stvore sliku o slijepim osobama kao osobama koje žele živjeti normalno i u lijepom ambijentu.

Nermina Delalić, predstavnica službe za privredu i lokalni ekonomski razvoj ističe da prva nagrada za privredne subjekte iznosi 600 KM, druga 500 KM, dok je nagrada za treće mjesto 400 KM. Hortikulturno najuređeniji balkoni nagrađeni su sa 300, 200 i 100 KM, dvorišta sa 400, 300 i 200 KM, dok su ulazi u stambenu zgradu nagrađeni novčanom nagradom u iznosu od 500 KM za osvojeno prvo mjesto , 400 KM za drugo i 300 KM za osvojeno treće mjesto.

Kako je hortikultura značajan segment životnog okruženja, Općina će u cilju buđenja svijesti građana i dalje podsticati ove aktivnosti na svom području.



Nova saobraćajnica prema poslovnoj zoni Telalovo Polje

Završeno je asfaltiranje oko kilometar servisne saobraćajnice prema poslovnoj zoni donje Telalovo Polje, čime je osiguran alternativni pristup industrijsko - poslovnoj zoni Telalovo Polje i omogućeno saobraćajno povezivanje sa industrijskom zonom Rajlovac iz još jednog pravca. Izgradnjom ove saobraćajnice poboljšani su uslovi saobraćajne komunikacije za privredne subjekte koji su duži vremenski period koristili makadamski put, a stvaraju se i preduslovi za razvoj poslovne zone u Telalovom Polju.

U prošloj godini urađena je sanacija i asfaltiranje makadamskog puta s desne strane Miljacke pored auto - pijace u dužini od oko 500 metara. U sklopu tih radova urađen je drenažni sistem, postavljena odbojna ograda i saobraćajna signalizacija.

Asfaltiranje novih oko 400 metara ceste uslijedilo je nakon što su završeni radovi na izgradnji primarnog sistema odvodnje oborinskih voda za područje industrijskih zona Bačići i Telalovo Polje, te dijela naselja Briješće.

Uz navedene radove izvršena je sanacija i asfaltiranje saobraćajnice koja prolazi ispod željezničkog mosta, širine oko 5,5 metara, a saobraćajnica je urađena tako da su zadovoljeni uslovi za prolazak teretnih vozila sa prikolicom, poluprikolicom i vozilom sa prikolicom. Prije asfalterskih radova, na toj dionici urađeno je izmještanje postojećih elektroinstalacija u vlasništvu JP Elektroprivreda BiH.

Asfaltiranje pristupne saobraćajnice nastavak je projekta poboljšanja saobraćajne i komunalne infrastrukture za privredne subjekte u industrijskim zonama Bačići, Rajlovac i Telalovo Polje, kojeg Općina Novi Grad Sarajevo implementira u saradnji sa Ministarstvom privrede Kantona Sarajevo.

Vrijednost radova iznosi 228.000 KM, a sredstva su osigurana Programom raspodjele finansijskih sredstava za poticaj i razvoj industrijske proizvodnje i sufinansiranje industrijskih zona u općinama Kantona Sarajevo.



Potpisan sporazum za sufinansiranje izgradnje servisne saobraćajnice za privredne subjekte u Halilovićima



U zgradi Općine Novi Grad Sarajevo potpisan je sporazum za sufinansiranje izgradnje servisne saobraćajnice od carinskog terminala u Halilovićima do firme Energoinvest dalekovodi d.d. čijom izgradnjom se riješava saobraćajni pristup za privredne subjekte koji su izgradnjom 9. transverzale ostali odsječeni od saobraćaja. Načelnik Općine Semir Efendić potpisao je sporazum sa Adnanom Šetom, ministrom saobraćaja Kantona Sarajevo i Selmirom Kovačom, direktorom Direkcije za puteve KS-a.

„Potpisali smo sporazum za sufinansiranje servisne saobraćajnice obzirom da je izgradnjom 9. transverzale jedan broj privrednih subjekata ostao bez saobraćajnog pristupa. Da bi se ova cesta mogla izgraditi Općina je ranije riješila imovinsko - pravne odnose, za šta je izdvojila 600.000 KM. Zemljište je otkupljeno i izgrađena saobraćajnica na kojoj je postavljen tampon i preostalo je da se ona asfaltira, uradi odvodnja i rasvjeta tako da će taj prostor dobiti jedan novi izgled“, izjavio je načelnik Efendić, dodajući da je na današnjem sastanku sa ministrom Šetom i direktorom Kovačom razgovarano o dovršetku 9. transverzale, kako bi pronašli zajedničko rješenje za objekte privremenog karaktera koji se nalaze na trasi kružnog toka koji će se graditi u ulici Safeta Zajke u Boljakovom Potoku.

Također je dodao da postoje uslovi da se u ovoj godini završi izgradnja nadvožnjaka iznad željezničke pruge, nakon čega ostaje izgradnja kružnog toka u ulici Safeta Zajke, kako bi se 9. transverzala već u narednoj godini mogla pustiti u funkciju.

Za izgradnju saobraćajnice Ministarstvo saobraćaja izdvojilo je 800.000 KM, Općina 100.000 KM, a Direkcija 250.000 KM.

Ministar Šeta izrazio je spremnost za podršku dovršetka izgradnje 9. transverzale koja je jedna od starteških saobraćajnica u Kantonu Sarajevo i jedan od najvažnijih infrastrukturnih projekata Općine Novi Grad jer spaja dva dijela općine.

„Općina Novi Grad je lokalna zajednica koja ima najviše stanovnika u Kantonu Sarajevo, nadam se da ćemo se usaglasiti i oko svih drugih projekata koji će se realizirati na području ove općine i spremni su za realizaciju, a koje Ministarstvo ili Direkcija mogu podržati. Današnji sporazum je samo jedno otvaranje novog poglavlja sa ovom Općinom. Nadam se da ćemo u budućnosti imati dosta zajedničkih projekata, za dobrobit stanovnika koji žive ovdje“ kazao je ministar Šeta.

Projekat izgradnje 9. transverzale realizira se u saradnji Općine Novi Grad Sarajevo, Ministarstva saobraćaja i Direkcije za puteve KS. Nosilac realizacije projekta je Direkcija za puteve KS, dok su Općina Novi Grad i Ministarstvo saobraćaja sufinansijeri projekta.



Počinje postavljanje konstrukcije mosta iznad željezničke pruge na 9. transverzali

Načelnik Općine Novi Grad Sarajevo Semir Efendić održao je, 13. novembra, sastanak sa ministrom saobraćaja Kantona Sarajevo Adnanom Šetom, direktorom Direkcije za puteve KS Selmirom Kovačom i predstavnicima firme Euro – Asphalt na kojem je postignut dogovor kako bi se otkočio nastavak izgradnje 9. transverzale, koja se gradi u općini Novi Grad Sarajevo.

Postignut je dogovor da će Direkcija za puteve Kantona Sarajevo, uz saglasnost Ministarstva saobraćaja KS finansirati demontažu i ponovno vraćanje jednog kolosijeka željezničke pruge na stanici Alipašin Most i kontaktne mreže kao dodatni posao na ovom projektu, a koji je neophodan kako bi se izvršila montaža same konstrukcije mosta (nadvožnjaka), najvažnijeg objekta na 9. transverzali. Investitori ovog višemilionskog infrastrukturnog projekta su Ministarstvo saobraćaja Kantona Sarajevo, Direkcija za puteve KS i Općina Novi Grad.


„Na zadovoljstvo svih učesnika u ovom projektu problem je prevaziđen, a obećanje je izvođača radova firme Euro – Asphalt da će u najskorijem roku nastaviti radove i dovršiti samo montiranje mosta na 9. transverzali. To je za nas značajan iskorak i ono što nam

nakon toga ostaje je izgradnja kružnog toka i spoj sa ulicom Safeta Zajke, a samom izgradnjom mosta približavamo se konačnom cilju, a to je stavljanje u funkciju 9. transverzale. Ostaje još jedna odluka Skupštine Kantona Sarajevo za koju također imamo obećanje da će biti donesena, a koja je neophodna kako bi se za objekte koji se nalaze na trasi 9. transverzale izvršila isplata građevinske vrijednosti. Time bi se riješio i posljednji problem spajanja 9. transverzale sa ulicom Safeta Zajke“, pojasnio je načelnik Efendić.

Naglasio je ukoliko Ministarstvo saobraćaja Kantona Sarajevo i Kantonalna Skupština ostanu pri svojim stavovima, može se očekivati da se u narednoj godini svi poslovi sa spajanjem 9. transverzale mogu završiti.

Osim rješavanja pitanja finansiranja demontaže i ponovnog vraćanja kolosijeka željezničke pruge, dosta vremena izgubljeno je i čekajući saglasnost Željeznica FBiH o tehnologiji postavljanja konstrukcije sa kojom je povezana željeznička pruga, a kojom se svakodnevno odvija željeznički saobraćaj.

U narednim danima slijedi dizanje elemenata i samo montiranje mosta koji su već spremni i nalaze se u neposrednoj blizini.



Uz modernu sportsku dvoranu, Boljakov Potok od naredne školske godine dobit će i obdanište

Jedno od najvećih naselja na području općine Novi Grad Sarajevo, Boljakov Potok, od naredne školske godine trebalo bi dobiti modernu sportsku dvoranu sa pratećim sadržajima, obdaništem i ambulantom. Ovaj multifunkcionalni objekt gradi se uz Osnovnu školu „Umihana Čuvidina“. Riječ je o jednom od najznačajnijih kapitalnih projekata Općine Novi Grad, čijom realizacijom će učenici jedne od najvećih škola u Kantonu Sarajevo dobiti bolje uslove za odvijanje nastavnog procesa, a stanovnici naselja nove sadržaje.

U sklopu projekta, čija je vrijednost oko 5,1 milion KM bit će izgrađene i podzemne garaže, fitness centar, 11 učionica, ali i obdanište za boravak oko 120 djece. Obzirom da Boljakov Potok, kao ni susjedna naselja Briješće, Sokolje i Zabrđe nemaju predškolsku ustanovu, ovim projektom taj nedostatak bit će riješen. Ambulanta koju će biti neophodno izmjestiti zbog izgradnje 9. transverzale također će se nalaziti u sklopu ovog objekta, a sam prilaz ambulanti bit će s manje frekventne saobraćajnice, nego što je sada.

U dosadašnju izgradnju objekta sportske dvorane utrošeno je oko dva miliona KM, a radove je samostalno finansirala Općina Novi Grad.

„Ovo je jedan od najvećih projekata kojeg Općina do sada realizira samostalno, a nadam se da će se od ove godine u sufinansiranje uključiti i Ministarstvo obrazovanja, nauke i mladih Kantona Sarajevo, koje je još uvijek nadležno za osnovne i srednje škole.

Sportska dvorana sa pratećim sadržajima predstavlja jedan sportski centar, radovi brzo napreduju i do sada je utrošeno oko 2 miliona konvertibilnih maraka koje je osigurala Općina Novi Grad bez kreditnih zaduženja. Ministarstvo obrazovanja, nauke i mladih KS u ovoj godini planiralo je 500.000 KM iz kreditnih sredstava“, izjavio je načelnik Efendić.

Načelnik Efendić dodaje kako radovi napreduju zadovoljavajućom dinamikom, te da je plan da objekat bude u funkciji u školskoj 2020/2021 godini.

„Vjerujem da neće biti problema da se kroz naš općinski budžet i budžet nadležnog Kantonalnog ministarstva osiguraju preostala sredstva kako bi se objekat završio u narednoj godini“, naglašava načelnik Efendić.

Amela Kazazić, direktorica škole „Umihana Čuvidina“ istakla je važnost ovog projekta, ne samo za školu, nego i za potrebe naselja. „Našu školu pohađa 920 učenika u 37 odjeljenja. Radimo u pomalo otežanim uslovima, ali smo sretni, i raduje nas činjenica, da ćemo uskoro imati ovako lijep prostor za nastavni proces i sportske aktivnosti. Ne samo da će djeca uživati, nego i kompletno naselje i svi sportski klubovi koji ovdje egzistiraju“, kazala je Kazazić.





Na Žuči se gradi sportsko strelište

Općina Novi Grad Sarajevo započela je izgradnju sportskog strelišta na brdu Žuč, mjestu odbrane Sarajeva i BiH od agresora. Strelište se gradi na lokalitetu između Doma oslobodilaca i Golog brda, gdje je u toku realizacija prve faze projekta, kojom su predviđeni zemljani radovi, odnosno, radovi na nivelaciji terena prema projektovanim kotama.

Na strelištu će moći vježbati svi oni koji posjeduju odobrenje za vatreno oružje, ali i policijske i zaštitarske agencije, streljački klubovi koji s nestrpljenjem očekuju ovaj sadržaj. Bit će to prvo strelište u Novom Gradu, iako ih u Sarajevu ima nekoliko, ovo će biti modernije, uređeno u skladu sa svim standardima i osiguravajućim sadržajima. Općina Novi Grad na Žuči je ranije izgradila Dom oslobodilaca, odakle se pruža jedinstven pogled na grad, otkupila zemljište i uredila lokalitet Golog brda za održavanje manifestacije povodom Dana odbrane općine Novi Grad. Samo mjesto na kojem će se nalaziti strelište dislocirano je od urbanih naselja, ali nije daleko od grada.

Projektom je predviđeno postavljanje devet boksova sa blindama, a kroz sam kompleks bit će izgrađena pješačka staza koja će povezivati ulazni dio kompleksa sa centralnim i drugim dijelovima, kao i parking prostor.

Za prvu fazu projekta iz općinskog budžeta izdvojeno je oko 77.000 KM. U narednoj godini slijedi postavljanje boksova i nabavka opreme.



Biciklistička staza i u naselju Dobrinja

Naselje Dobrinja odnedavno je povezano sa ranije izgrađenom biciklističkom stazom od Otoke do kružnog toka na Dobrinji, te Centrom „Safet Zajko“. Završena je izgradnja, kao i bojenje biciklističke staze, dužine oko 600 metara, od raskrsnice ulica Želimira Vidovića Kelija i Emila Zole do kružnog toka na ulazu u Dobrinju.

Urađena je i horizontalna signalizacija, a u narednom periodu uslijedit će i postavljanje vertikalne signalizacije, te postavljanje parkovskih klupa i korpi za otpatke. Uporedo sa navedenim radovima, izvršeno je i pomjeranje autobusnog stajališta.

Tim radovima prethodilo je uklanjanje postojeće pješačke staze, tamponiranje terena za izgradnju biciklističke sa pješačkom stazom, te postavljanje ivičnjaka.

Također, završeno je i obilježavanje 800 metara biciklističke staze, a preostalo je da se urade prelazi na raskrsnicama i izmjeste dva autobuska stajališta.

Za radove predviđene ovom fazom, iz budžeta Općine izdvojene su 234.000 KM.

U ovom dijelu Dobrinje u narednom periodu radit će se i preostali dio staze kroz naselje kako bi se staza spojila sa prstenom i cijela Dobrinja povezala sa biciklističkom stazom.

Novi Grad je prva općina u Kantonu Sarajevo na čijoj je teritoriji izgrađena biciklistička staza. U 2015. godini staza je izgrađena s obje strane Bulevara Meše Selimovića, od Otoke do Nedžarića, a godinu kasnije od Nedžarića do kružnog toka na Dobrinji. Biciklistička staza povezana je i sa Centrom za edukaciju, sport i rekreaciju „Safet Zajko“, čime je posjetiocima omogućen dolazak u najveći park u gradu Sarajevu i biciklom.



Počeli pripremni radovi na rekonstrukciji i proširenju ulice Džemala Bijedića

Nakon što je nedavno potpisan prvi pojedinačni ugovor za izvođenje radova na rekonstrukciji i proširenju ulice Džemala Bijedića u vrijednosti od 2,2 miliona konvertibilnih maraka, počeli su pripremni radovi za rekonstrukciju i proširenje saobraćajnice sa dvije na četiri kolovozne trake.


Radovi se izvode u dijelu dionice kod firme Energoinvest TDS d.d., gdje će se prvo vršiti uklanjanje stabala i demontaža postojeće javne rasvjete, kao i rušenje i premještanje ograda koje ulaze u pojas buduće proširene saobraćajnice, a zatim i preostali radovi koji podrazumijevaju zamjenu elektro i vodovodnih instalacija i proširenje same saobraćajnice.

U ovoj godini radovi će se izvoditi izvan trupa saobraćajnice, a prema očekivanjima izvođača radova početkom naredne građevinske sezone trebalo bi sve biti spremno za asfaltiranje prvih 900 metara saobraćajnice u novom profilu sa četiri kolovozne trake. Planirano je da se većina radova na samom kolovozu izvodi u noćnim satima kako bi što manje uticali na odvijanje saobraćaja.

Ovaj infrastrukturni projekat implementira Općina Novi Grad Sarajevo, a sufinansijeri su Ministarstvo saobraćaja KS i Direkcija za puteve KS. Sporazum o zajedničkoj implementaciji potpisan je 23. maja 2018. godine sa tadašnjim ministrom saobraćaja Mujom Fišom. Ukupna vrijednost cijelog projekta je 6,6 miliona KM.

Iako se u razgovore oko realizacije ovog projekta sa nadležnim Ministarstvom i Direkcijom krenulo još prije više od godinu, puno vremena je potrošeno u rješavanje pitanja zamjene vodovodnih instalacija, koje će, u konačnici, raditi firma Euro-Asfalt uz asistenciju KJKP ViK. Nabavku i izmještanje instalacija vršit će izvođač radova, iako je to zakonska obaveza samog preduzeća ViK, a demontažu i montažu cjevovoda radit će ViK.

Ulica Džemala Bijedića cijelom dužinom prolazi kroz općine Novi Grad i Novo Sarajevo, i planirana je potpuna rekonstrukcija od 9. do spoja sa 5. transverzalom, što će u konačnici biti 2,3 kilometra nove saobraćajnice sa četiri, umjesto dosadašnje dvije kolovozne trake.





Sanacija i izgradnja pješačkih staza, stepeništa i rukohvata na 28 lokacija u općini Novi Grad



U C fazi Alipašino Polje završeni su radovi na sanaciji i izgradnji pješačke staze pored Bosanske džamije. Staza koju svakodnevno koristi veliki broj građana bila je u jako lošem stanju, što je zahtijevalo njenu temeljitu rekonstrukciju, uklanjanje postojeće, ugradnju novog tampona i asfaltiranje staze dužine od oko 160 metara, kao i postavljanje ivičnjaka.

Radovi su izvedeni u sklopu projekta izgradnje i sanacije pješačkih staza, trotoara, stepeništa i rukohvata za čiju je realizaciju Općina Novi Grad iz ovogodišnjeg budžeta izdvojila 180.000 KM.

Sanirane su i oštećene ploče na Trgu Nezavisnosti od broja 1 do broja 9. Na spoju ulica Geteova i Bosanska saniran je trotoar, a ugrađeni su i izdignuti ivičnjaci, kako bi se spriječilo parkiranje vozila. Roditeljima čija djeca idu u vrtić „Labudovi“ olakšan je put do te ustanove izgradnjom pješačke steze od parkinga u Bosanskoj ulici prema vrtiću.

Radovi su izvedeni i u naseljima Dobrinja i Saraje Polje. Stepenište i pješačka staza izgrađeni su od parkinga prema ulici Salke Nezečića broj 4. Urađena je i rekonstrukcija oštećenog trotoara u ulici Ramiza Salčina, u blizini škole za slijepu i slabovidnu djecu, na Saraj Polju,



SANIRANO STEPENIŠTE I PJEŠAČKA STAZA PREMA UL. SALKÉ NEZEČIĆA



NOVI RUKOHVATI I REKONSTRUIRANI TROTOAR U ULICI RAMIZA SALČINA



a u toku je postavljanje rukohvata za lakše i sigurnije kretanje učenika te škole.

Stanovnicima naselja Buča Potok također je olakšana komunikacije. Izgrađeno je stepenište iz ulice Kasima Hadžića kod broja 37 prema ulici Rafaela Gaona, kao i stepenište iz ulice Adema Buče, od autobusnog stajališta Vitkovac, prema ulici Omera Kovača. Pored toga postavljeni su i rukohvati u ulici Bužimska do spoja sa Tuzlanskom ulicom, kao i na ranije izgrađenom stepeništu u Tuzlanskoj ulici, i u gornjem dijelu u ulici Kasima Hadžića do broja 54.

Ukoliko vremenski uslovi budu zadovoljavajući, u narednim danima uslijedit će radovi na sanaciji oštećenih ploča u ulici Trg ZAVNOBiH-a od broja 2 do broja 6 u B fazi Alipašino Polja, kao i postavljanje izdignutih ivičnjaka radi sprečavanja ulaska automobila na trg.

Planirana je i izgradnja pješačke staze pored stambenih zgrada u ulici Trg grada Prato od broja 22 do broja 26 i trotoara u ulici Trg Sabora bosanskog od broja 2 do broja 8 u naselju Dobrinja, dok će radovi na preostalih 14 lokacija koje su obuhvaćene ovim programom, biti nastavljeni početkom naredne građevinske sezone.



RUHOHVATI STEPENIŠTE U ULICI KASIMA HADŽIĆA



PJEŠAČKA STAZA U BOSANSKOJ ULICI



STEPENIŠTE PREMA ULICI OMER KOVAČA



SANIRANA OŠTEĆENJA NA TRGU NEZAVISNOSTI



NOVO STEPENIŠTE I RUHOHVATI KOD KRUŽNOG TOKA U BUČA POTOKU

Sanacija lokalnih i nekategorisanih cesta

LOT-1

U Općini Novi Grad Sarajevo realiziran je projekat sanacije i asfaltiranja lokalnih i nekategorisanih cesta, podijeljenih u LOT-1 i LOT-2.

U sklopu LOT-a 1 sanirano je i asfaltirano osam ulica. Nakon što je urađena sanacija ceste u ulici Safeta Isovića u dužini od oko 70 metara, gdje je postavljen novi tampon i asfaltni sloj, radovi su nastavljeni u ulici Derviša Sude Vražalice. Asfaltirano je oko 160 metara saobraćajnice, završetkom tih radova stanovnici ove ulice prvi put su dobili asfalt do svojih kuća.

Nakon ove ulice slijedili su radovi u ulici Adema Hubijara u kojoj je izvođač radova firma „Orman“ radila sanaciju i asfaltiranje oštećene ceste.

Radovi su završeni i u Cazinskoj ulici od broja 30 do 60, zatim u ulicama Kenana Demirovića od broja 68 do 54, Avde Hodžića od broja 76 do 60.

Također, asfaltirana je i ulica Ramiza Salčina od spoja sa ulicom Aleja Bosne srebrene, a u Cazinskoj ulici kod broja 15 izgrađen je nosivi potporni zid.



ULICA KENANA DEMIROVIĆA



ASFALTIRANA ULICA KENANA DEMIROVIĆA



ULICA RAMIZA SALČINA



SANIRANA I ASFALTIRANA ULICA RAMIZA SALČINA



ULICA SAFETA ISOVIĆA



SANIRANA I ASFALTIRANA ULICA SAFETA ISOVIĆA



ULICA AVDE HODŽIĆA



SANIRANA I ASFALTIRANA ULICA AVDE HODŽIĆA



ULICA DERVIŠA SUDE VRAŽALICE



NOVOASFALTIRANA ULICA DERVIŠA SUDE VRAŽALICE



CAZINSKA ULICA



ASFALTIRANA CAZINSKA ULICA I IZGRAĐEN NOSIVI POTPORNI ZID



ULICA ADEMA HUBIJARA



SANIRANA I ASFALTIRANA ULICA ADEMA HUBIJARA



ULICA SMAJE ŠIKALA

LOT-2

U sklopu LOT-a 2 završeno je asfaltiranje i sanacija devet ulica. Asfaltiran je dio ulice Smaila Šikala od broja 177 do broja 181, zatim dio ulice Mahmuta Bušatlije čikma, a u narednim danima izvršit će se asfaltiranje i preostalog dijela ulice. U ulici Izeta Karšića čikma broj 8 saniran je potporni zid. Također, novi asfalt dobili su i stanovnici

dijela ulice Numan paše Čuprilića broj 200 do 208 koji do sada nisu imali asfaltiranu cestu. Asfaltirana je i ulica Breće Bešo od broja 70 do broja 60, kao i dio ulice Braće Fazlić od broja 30 do broja 28 i Paljevske od broja 106.



ULICA ZAIMA IMAMOVIĆA



ASFALTIRANA ULICA ZAIMA IMAMOVIĆA

Nakon zamjene vodovodne mreže, asfaltirana ulica koja povezuje Sokolje i Zabrdę

Nakon što je u ulici Zaima Imamovića koja povezuje Naselje heroja Sokolje i Zabrdę završena rekonstrukcija stare i dotrajale vodovodne mreže dužine od oko 600 metara, ovaj dio ulice je asfaltiran.

S obzirom na to da u ovom gusto naseljenom području, stara i dotrajala vodovodna mreža već duži period uzrokuje probleme stanovnicima, Općina Novi Grad već nekoliko godina radi na rješavanju problema sa vodosnabdijevanjem ovog i okolnih naselja, ali i izgradnji nove saobraćajne infrastrukture.

Upravo zbog dotrajalih vodovodnih instalacija u ulici Zaima Imamovića često je dolazilo do curenja vode što je uzrokovalo oštećenja na saobraćajnici. Zbog toga se krenulo sa rekonstrukcijom kompletnog cjevovoda, a potom i asfaltiranja ceste.

Zamijenjene su kompletne vodovodne instalacije visokokvalitetnim daktilnim cijevima DN 150 od spoja sa ulicom Numan paše Čuprilića, do spoja sa ulicom Avde Palića.

Projekat će biti nastavljen početkom naredne građevinske sezone, kada je planirano da se uradi još 300 metara novog cjevovoda u gornjem dijelu ulice Numan paše Čuprilića.



ULICA PORODICE BEĆIRBAŠIĆ



ASFALTIRANA ULICA PORODICE BEĆIRBAŠIĆ

Proširena saobraćajnica u ulici Ferida Srnje u Švrakinom Selu

U okviru programa redovnog održavanja cesta, izradi i obnovi saobraćajne signalizacije na lokalnim i nekategorisanim cestama na području općine Novi Grad u proteklom periodu završeni su radovi na proširenju kolovoza u dijelu ulice Ferida Srnje u naselju Švrakino Selo koja je od velikog značaja za šire područje ovog naselja.

Ova veoma uska, strma i prometna ulica prostire se od ulice Safeta Hadžića do ulice Turkušići, a tokom padavina često je dolazilo do ispiranja bankine koja je ugrožavala odvijanje saobraćaja i začepljala odvodne šahtove u ulici Safeta Hadžića.

Radovi su izvedeni od spoja sa ulicom Sulejmana Pačariza Hodže broj 3, gdje su izvedeni radovi na proširenju ceste na minimalnu širinu od 4,5 metra, a postavljeni su i novi ivičnjaci. Nakon toga uslijedila je i sanacija oštećenja na kolovozu, izdizanje poklopaca šahtova i slivničkih rešetki na nivo kolovoza, kao i rješavanje problema površinskih voda, a izgrađen je i potporni zid.

Realizaciji projekta pristupilo se na osnovu zahtjeva Mjesne zajednice „Švrakino Selo - 2“ i mišljenja stručno - tehničkog nadzora o potrebi hitnog djelovanja, a koji je utvrdio da širina kolovoza na pojedinim mjestima ne zadovoljava minimalnu širinu za sigurno odvijanje saobraćaja, kao i kretanje pješaka.

Imajući u vidu navedene činjenice, Općina Novi Grad Sarajevo pristupila je realizaciji navedenih radova kako bi se osigurala bezbjednost odvijanja saobraćaja, ali i stvorili uslovi za zimsko održavanje ceste.



ULICA FERIDA SRNJE

Uz novu vodovodnu mrežu u ulicu Porodice Bećirbašić stigao i asfalt

Stanovnici ulice Porodice Bećirbašić od broja 1 - 5, u naselju Zabrdje prvi put su dobili asfalt ispred svojih kuća. Prije asfaltiranja makadamskog puta urađena je potpuno nova distributivna vodovodna mreža.

Zamjena starih azbestno - cementnih cijevi novim daktil cijevima profila DN 100 u dužini od 320 metara i priključenje stambenih objekata na novu vodovodnu mrežu, izvršeno je u sklopu projekta rekonstrukcije vodovodne mreže u četiri ulice u Zabrdju, nakon čega je uslijedilo asfaltiranje ceste.

U ovoj ulici najprije je uklonjena postojeća kolovozna konstrukcija, a stare oštećene kanalizacione cijevi zamijenjene su novim,. Uporedo sa tim radovima rađena je tamponska podloga, kao i nivelisanje šibera, zatim izgradnja šahtova i objekata za odvodnju površinskih voda, kao i postavljanje ivičnjaka i bankina.

Realizacijom ovog projekta, u ovom dijelu Zabrdja riješena je vodovodna i saobraćajna infrastruktura, kao i odvodnja oborinskih voda. Osim toga, ulica je dobila potpuno novi izgled.

Izgrađen prilazni put stambenoj zgradi

Izgrađen je prilazni put stambenoj zgradi u ulici Adema Buče kod broja 46 -52. Postojeći makadamski kolovoz je asfaltiran, postavljeni su ivičnjaci, a riješena je i odvodnja površinskih voda. Time je riješen dugogodišnji problem stanara koji žive u navedenoj stambenoj zgradi, a ranije su bili prinuđeni koristiti makadamski put.

Programom održavanja i rekonstrukcije lokalnih i nekategorisanih cesta planirano je asfaltiranje i sanacija 21 ulice.



NOVOIZGRAĐENI PRILAZ STAMBENOJ ZGRADI U UL. ADEMA BUČE



BRŽA I EFIKASNIJA SANACIJA OŠTEĆENJA NA LOKALNIM CESTAMA

U sanaciju udarnih rupa u 58 ulica ugrađeno oko 500 tona asfalta

Nakon višegodišnjih problema sa građevinskim firmama, Općina Novi Grad pronašla je način za rješavanje problema sanacije udarnih rupa i urgentnih oštećenja na lokalnim cestama na svom području, tako što je te poslove preuzelo Javno preduzeće „Lokom“.

Iako je puno oštećenja i udarnih rupa na novogradskim lokalnim cestama kojima svakodnevno saobraća hiljade automobila, u protekla četiri mjeseca, radnici preduzeća „Lokom“ sanirali su oštećenja u 58 ulica, u njihovu sanaciju ugrađeno je više od 500 tona asfalta. Ovim radovima konačno se rješava, naizgled banalan, ali za lokalnu zajednicu i njene građane vrlo značajan problem, jer se ranije na sanaciju oštećenja moralo čekati mjesecima, a nekada i po godinu, a Općina nije mogla uticati na dinamiku radova firmi koje su dobijale te poslove.

Zahvaljujući brzom dinamici izvođenja radova, Novi Grad, u skorijoj budućnosti, više neće imati problem nesaniranih rupa na cestama. Općina Novi Grad prva je lokalna zajednica koja je na ovakav način postupila u rješavanju problema sanacije rupa na lokalnim cestama.



Građani mogu prijaviti oštećenja

Građani imaju mogućnost putem mjesnih zajednica prijaviti oštećenja na cesti, a nadležna općinska služba spisak prioriteta dostavljaće firmi „Lokom“. Na takav način radit će se puno brže nego što je to bilo do sada.





Sanirana su oštećenja u sljedećim ulicama:

MZ „DOBRINJA A”- Sulejmana Filipovića

MZ „SARAJ-POLJE” - Teheranski trg, kod Udruženja „Oaza”, i Adija Mulabegovića.

MZ „ŠVRAKINO SELO – 2” – Sulejmana efendije Musića.

MZ „ALIPAŠINO POLJE A-1 I A -2” - Trg solidarnosti, Ive Andrića i Trg međunarodnog prijateljstva.

MZ „ALIPAŠINO POLJE C -1 I C -2” - Bosanska

MZ „ČENGIĆ VILA” - Ulaz na parking u ulici Gradačačka.

MZ „BUČA POTOK”: Bratunačka, Adema Buče, Tuzlanska, Grada Bobovca, Mevludina Ramovića, Glasinačka, Asima Čamdžića, Nazifa Hadžovića, Bužimska, Feriza Tumbula i Bana Mateja Ninoslava.

MZ „DOLAC”: Vladimira Preloga, Šerifa Loje, Trebinjska, Mehe Smajlagića, Mustafe Ramića, Osmana Đikića, Amira Krupalije, Safeta Isovića, Nusreta Aganovića, Sulje Jahića, Otona Župančića i Omera Kovača.

MZ „ALIPAŠIN MOST - 1” - Enesa Herića, Vitkovac, Smaila Šikala, Ragiba Džinde, Bana Borića, Derviš Fevzi Mostarca, Mustafe Muje Pašića, Mahmuta Bušatlije, Irfana Ljubijankića, Hekim Oglu Ali-paše i Halilovići.

MZ „ALIPAŠIN MOST - 2” – Kasima Hadžića, Dolačka, Bosanskih banova i Esada Midžića.

MZ „BRIJEŠĆE” - Viteška, Briješće Brdo, Brezanska, Izeta Karšića, Vrandučka, Omera Šahića i Orahovačka.

MZ „NASELJE HEROJA SOKOLJE” – Numan-paše Ćuprilića i Zaima Imamovića.

MZ „ZABRĐE” – Harisa Čampare i Alije Imamovića.

Sanirano veliko ratno oštećenje fasade zgrade u Geteovoj ulici na broju 5



Stanari stambene zgrade u Geteovoj ulici broj 5, u C-fazi Alipašino Polja, dočekali su nakon mnogo godina da se sanira ratno oštećenje na fasadi zgrade, uzrokovano eksplozijom velike granate, takozvane avio-bombe, ispaljene sa agresorskih položaja ratne 1995. godine. Granata, koja je udarila u zgradu, oštetila je tri sprata, nakon čega je urađena djelomična sanacija kako bi se vlasnici mogli vratiti u svoje stanove. Međutim, ubrzo nakon njihovog useljenja, pojavili su se problemi sa pojavom vlage, pa su stanari pokušavali vlastitim sredstvima sanirati zidove iznutra, ali to nije davalo rezultate. Detonacija bombe uzrokovala je oštećenja fasadnih ploča koje su sada sanirane, tako da je zgrada dobila potpuno novi izgled, a stanari ugodnije uslove za stanovanje.

Obzirom na to da je na području Novog Grada veliki broj objekata oštećenih tokom ratnih dejstava, ali i dotrajalih, koji predstavljaju opasnost za naše građane, iz općinskog budžeta svake godine izdvajaju se značajna sredstva za sanaciju najurgentnijih. Putem Općinske inspekcije vrši se procjena najurgentnijih, koja mogu izazvati opasnost u slučajevima oštećenja instalacija itd., te se kroz program hitnih intervencija vrši sanacija na tim objektima. Programom su obuhvaćeni krovovi i fasade zgrada u slučajevima kada upravitelj, čija je to dužnost, nije u mogućnosti sam finansirati radove. Za sanaciju 12 oštećenih krovova i pet stambenih zgrada oštećenih ratnim dejstvima iz proteklog rata u BiH, iz budžeta Općine izdvojeno je 553.000 KM.

Regulacijom vodotoka Dubokog potoka do smanjenja poplava na području Novog Grada



Općina Novi Grad Sarajevo nastavlja realizaciju projekta trajne regulacije vodotoka na svom području s ciljem prevencije poplava i smanjenja nastajanja štetnih posljedica od poplava. U toku su završni radovi na regulaciji vodotoka Dubokog potoka u naselju Bojnik, gdje, zbog nedovoljnog kapaciteta korita potoka, niskih obala zaraslih šibljem, tokom većih kišnih padavina, dolazi do plavljenja okolnog zemljišta, stambenih i privrednih subjekata, ali i poljoprivrednog zemljišta.

Nakon što su očistili i uklonili šiblje i drugo rastinje, te uradili produbljivanje i proširili korito koje je bilo uskog proticajnog profila, radnici firme „Harysco“ završili su i betoniranje korita većeg proticajnog profila.

Trajna regulacija vodotoka urađena je od ušća u Bosnu do propusta ispod autoputa A1 Sarajevske zaobilaznice, gdje je tokom većih kišnih padavina dolazilo do začepljenja propusta, a potom i plavljenja okolnog zemljišta i dobara. Realizacijom ovog projekta, u značajnoj mjeri će se smanjiti mogućnost poplava i nastajanja posljedica od njih. Za te radove izdvojene su 193.000 KM, od kojih je Ministarstvo privrede KS izdvojilo 54.000 KM, dok je preostali dio sredstava osigurala Općina Novi Grad Sarajevo.





Ekipe Lokoma očistile i uredile korito i zeleni pojas uz rijeku Dobrinju

Ekipe javnog preduzeća Lokom očistile su i uredile novogradska naselja. Između ostalog su očistili korito Dobrinje nizvodno od granice sa manjim bh. entitetom do spoja sa općinom Ilidža. Iz riječnog korita izvučene su velike količine nanosa i smeća i odvezene na odlagalište otpada, a uklonjeni su i panjevi stabala koja su u ranijem periodu podsječena.

Pored čišćenja riječnog korita, uređen je zeleni pojas uz riječno korito, gdje su pokosili i uklonili travu i otpatke koje nesavjesni građani ostavljaju iza sebe.



Rješava se problem “zgrade na vodi” u ulici Geteova

U C-fazi Alipašino Polja u toku su radovi na izgradnji drenažnog sistema čijom izgradnjom se rješava dugogodišnji problem podzemnih voda koje se zadržavaju ispod stambene zgrade u Geteovoj ulici broj 9, 10 i 11 i prodiru u podrumске prostorije, uzrokujući probleme stanarima.

Za te radove iz budžeta Općine Novi Grad osigurano je 125.500 KM, a ugovor za izvođenje radova potpisan je sa firmom „Harysco“. Prema riječima predstavnika stanara, Huseina Šabića, podzemne vode ispod stambenog objekta već 5 - 6 godina ugrožavaju stabilnost zgrade u kojoj živi oko 300 stanara, a uz to voda prodire u podrumске prostorije, zbog čega ih stanari ne mogu koristiti. Nakon što su probušili temeljnu ploču i došli do saznanja da se ispod zgrade voda zadržava, odnosno da se formiraju tzv. bazeni sa vodom, stanari su počeli ispumpavati vodu. Međutim, time nije riješen problem, te su putem Mjesne zajednice „Alipašino Polje C-1“ uputili zahtjev Općini, koja je u budžetu za 2019. godinu planirala sredstva za rješavanje ovog problema.

„Kada smo probušili ploču u podrumu, vidjeli smo da se voda nakuplja u dubini od 3 do 4 metra ispod i prodire u podrumске prostorije, posebno usljed kišnih padavina. Obzirom na to počeli smo pumpom ispumpavati vodu, dva puta mjesečno. Da bi se voda ispraznila potrebno je oko 32 sata pumpanja“, pojašnjava Šabić, ističući da se realizacijom ovog projekta prije svega rješava pitanje stabilnosti zgrade, pa tek onda korištenja podrumskih prostorija. Prema izvršenim mjerenjima i eksperimentu crpljenja podrumskih prostorija, ustanovljeno je da se odvodnja vode može uraditi

izgradnjom horizontalne drenaže oko zgrade koja će se postaviti na dubini od 4 metra. Položen je cjevovod za prikupljanje i odvodnju podzemnih voda DN 300, u dužini od oko 300 metara i spojen je u kišnu kanalizaciju u ulici Trg solidarnosti, na Alipašino Polju.



Predstavnici Općine razgovarali sa ministricom Editom Đapo o sufinansiranju projekata gasifikacije u općini Novi Grad

Predstavnici Službe za investicije i komunalne poslove Općine Novi Grad Sarajevo, šef Odsjeka Kenan Bukva i Namira Tanković, sastali su se, 21. novembra, sa ministricom Federalnog ministarstva zaštite okoliša i turizma dr. Editom Đapo.

Sastanku je prisustvovao i prof. dr. Ifet Mahmutović, vijećnik u Općinskom vijeću Novi Grad Sarajevo, a razgovarano je o mogućnostima sufinansiranja projekata gasifikacije dijelova novogradskih naselja Aneks i Dobroševići. Općina Novi Grad Sarajevo obezbijedila je 170.000 KM, a za ukupan projekat nedostaje još 95.000 KM.

Ministrica Đapo iskazala je interes za podršku projektima koji su od velikog značaja za zaštitu okoliša, te je dala uvjerenja da će inicijativu za sufinansiranje projekata Općine Novi Grad uputiti Vladi FBiH na razmatranje i usvajanje, kako bi se osigurala nedostajuća sredstva za implementaciju navedenih projekata.

Općina Novi Grad već nekoliko godina, u kontinuitetu, izdvaja sredstva za izgradnju gasne mreže na svom području. Početkom ove godine, sa KJKP „Sarajevogas“ potpisan je protokol o saradnji na izgradnji primarne gasne mreže u ulici Dobroševićka i distributivne gasne mreže u ulicama 14. juni u jednom od najvećih novogradskih naselja Dobroševi i ulici Harisa Kurtovića, u naselju Aneks.

Potpisan je ugovor sa izvođačem radova i u toku su pripreme za izgradnju 2.365 metara gasne mreže, čime će se steći preduuslovi za gasifikaciju šireg područja gusto naseljenih dijelova Novog Grada koja gravitiraju primarnom vodu naselja Dobroševići.

Naselja Dobroševići i Aneks su u ekspanziji razvoja, i nemaju drugu mogućnost za zagrijavanje objekata osim korištenja čvrstih goriva. Realizacijom ovih projekata stvorit će se mogućnosti za priključenje velikog broja stambenih objekata ovog područja na gasnu mrežu i korištenja ekološki prihvatljivog prirodnog gasa, čime će se doprinijeti zaštiti okoliša i zdravlja ljudi.



Ukinuta zabrana kretanja vozila kroz trolejbusku okretaljku na Mojmilu

Nakon što su urađene horizontalna i vertikalna saobraćajna signalizacija na pomoćnoj trolejbuskoj okretaljki na Mojmilu, ukinuta je zabrana kretanja saobraćaja iz pravca Dobrinje prema ulici Safeta Hadžića. Jednom od dvije kolovozne trake sada se odvija saobraćaj iz smjera Dobrinje, dok je druga rezervisana za autobuski i trolejbuski saobraćaj.

Izmjenom režima saobraćaja na ovoj dionici stvoreni su uslovi za neometano odvijanje saobraćaja iz pravca Dobrinje i drugih novogradskih naselja, južnom longitudinalom prema centru grada. Projekat je realizirala Općina Novi Grad Sarajevo uz saglasnost Ministarstva saobraćaja Kantona Sarajevo s ciljem smanjenja saobraćajnih gužvi koje su se formirale naročito u jutarnjim satima.





U ulici Smaila Šikala, u Boljakovom Potoku, gradi se separarna kanalizaciona mreža

U ulici Smaila Šikala, u naselju Boljakov Potok, u toku je izgradnja separarne kanalizacione mreže, čijom izgradnjom će se riješiti dugogodišnji problem fekalne i oborinske odvodnje za oko dvije stotine domaćinstava.

Radi se o veoma kompleksnom i zahtjevnom projektu, koji se radi u gornjem padinskom dijelu jednog od najgušće naseljenih dijelova općine Novi Grad, a koji nije imao tehnički adekvatnu kanalizacionu mrežu, što je stanovnicima tokom većih padavina uzrokovalo velike probleme.

Kako nam je potvrdio Dejan Jovović, šef gradilišta, radnici građevinske firme „Mibral“ izvršili su izmještanje plinskih instalacija u dužini od oko 220 metara, što je bio preduslov za izvođenje radova na izgradnji kanalizacione mreže. „Da bi se napravio koridor za izgradnju separarnog sistema prethodno je bilo neophodno izvršiti izmještanje gasovoda. U toku je izgradnja separarnog kolektora, gdje je izvedeno oko 150 metara cjevovoda, a vrši se polaganje visokokvalitetnih poliesterskih cijevi FI500, 400 i 300, sa izvođenjem kišnih i fekalnih kućnih priključaka“, izjavio je Jovović.

Radovi se izvode od autobuske okretaljke za gradski saobraćaj prema gornjem dijelu naselja, a s obzirom na činjenicu da veliki broj stanovnika ovu ulicu svakodnevno koristi, radit će se dio po dio projekta kako bi se odmah nakon polaganja cjevovoda i zatrpavanja kanala moglo pristupiti sanaciji i asfaltiranju ceste.

Kanalizacioni sistem će se graditi do ulice Adema Buče, koja će biti priključena na novoizgrađeni sistem separarne kanalizacije. Time će se riješiti odvodnja iz gornjeg dijela ulice Adema Buče, kojeg nije bilo moguće rekonstruirati prilikom rekonstrukcije te ulice.

Ukupna vrijednost projekta je oko milion konvertibilnih maraka, a radovi će se izvoditi u ovoj i idućoj godini. Ove godine osigurano je 660.000 KM, dok će u idućoj godini biti izdvojen ostatak sredstava neophodnih za završetak jednog od najvećih i najznačajnijih infrastrukturnih projekata iz oblasti komunalne infrastrukture Općine Novi Grad Sarajevo.



Rješava se dugogodišnji problem stanovnika Briješća i Buča Potoka

Kanalizaciona mreža u ulicama Safeta Ahmetspahića i Amira Krupalije

U Općini Novi Grad potpisana su dva okvirna sporazuma za izgradnju separatne kanalizacione mreže u ulicama Safeta Ahmetspahića i Brezanska, u Briješću, i Amira Krupalije, u naselju Buča Potok, ukupne vrijednosti oko 785.000 KM.

Realizacijom ovih značajnih infrastrukturnih projekata rješava se dugogodišnji problem velikog broja stanovnika najgušće naseljenih dijelova općine Novi Grad, gdje su fekalne i oborinske vode spojene u mješovite kanale, te se izljevaju na cestu, uzrokujući velike probleme stanovnicima.

Sporazum su potpisali načelnik Općine Novi Grad Sarajevo, Semir Efendić, Ahmed Boloban i Ibro Manjić, predstavnici izvođača radova firme Bujice d.o.o. i konzorcija firmi Manjo d.o.o. i Bosman d.o.o. „Ulica Safeta Ahmetspahića, u Briješću, je najproblematičniji dio naselja koji više godina ima problem nepostojanja tehnički adekvatne kanalizacione mreže, zbog čega se nisu mogle raditi ni saobraćajnice. Nakon izgradnje ovog kanalizacionog sistema može se krenuti u sanaciju i asfaltiranje te ulice u kojoj živi veliki broj ljudi. Radit će se ukupno 400 metara duplog cjevovoda, a nakon čega će se steći uslovi da se izgradnja kanalizacione mreže nastavi kroz samo naselje“, kazao je načelnik Efendić.



Izgrađen sistem za fekalnu kanalizaciju

Da bi se krenulo sa izgradnjom kanalizacione mreže, u ovom dijelu Briješća trebalo je dosta toga prethodno uraditi. Izgrađen je sistem fekalne kanalizacione mreže do mjesta gdje se sada nalazi objekat pošte. Radovi su izvedeni u vrijeme kada se radila obnova nadvožnjaka kod Hidrogradnje u saradnji sa JP Ceste FBiH. U prošloj i ovoj godini završen je jedan dio primarnog sistema za oborinsku kanalizaciju kroz Bačiće do rijeke Miljacke, u šta je uloženo oko 700.000 KM.

Radit će se dio po dio saobraćajnice

„Radovi u ulici Safeta Ahmetspahića radit će se u skladu sa vremenskim uslovima, dio posla će se uraditi do Nove godine, a ostatak u idućoj godini. U naselju Buča Potok trenutno izvodimo radove na puno težoj trasi, gdje je ulica tijesna angažirali smo sitnija vozila, tu ne mogu ulaziti veliki kamioni i mašine. Neće biti problema ni u ulici Safeta Ahmetspahića. Obišli smo teren i razgovarali sa ljudima, a radove ćemo izvoditi parcijalno, po ustaljenoj praksi. Ono što danas iskopamo, sutra zagrnmemo i saobraćajnicu vratimo u prvobitno stanje“, rekao je Ibro Manjić.

Gradi se još 330 metara duplog cjevovoda

U ulici Amira Krupalije koja gravitira mjesnim zajednicama „Buča Potok“ i „Dolac“, prethodnih godina je izgrađeno oko 500 metara separatnog kanalizacionog sistema, od raskrsnice ispred preduzeća „Zrak“, te kroz kompleks firme „Zrak“ do ove ulice. To je također dio naselja koji nema izgrađenu legalnu kanalizacionu mrežu. Izgradnjom novih oko 330 metara duplog sistema kroz samo naselje to pitanje bit će riješeno.

Ahmed Boloban istakao je da firma Bujice već duži period izvodi radove na ovakvim projektima i u drugim općinama u Kantonu Sarajevo, tako da će i ovi radovi biti kvalitetno izvedeni.



Završava se izgradnja velikog vodovodnog sistema za stavljanje u funkciju rezervoara za vodu na Sokolju

Privode se kraju radovi na izgradnji i kompletiranju blizu šest kilometara novoizgrađenog vodovodnog sistema u općini Novi Grad, čijom izgradnjom se stiču uslovi za stavljanje u funkciju ranije izgrađene pumpne stanice u Briješću odakle će se vodom snabdijevati rezervoar za vodu u Naselju heroja Sokolje.

Završeno je spajanje cjevovoda ispod željezničke pruge u Rajlovcu, a u narednom periodu izvršit će se punjenje vodom, dezinfekcija i ispiranje kompletnog cjevovoda koji je ranije građen od Butila, ulicom Safeta Zajke do pumpne stanice u ulici Franje Kluza, u Briješću.

Radi se o jednom od najvažnijih infrastrukturnih projekata iz oblasti vodosnabdijevanja na kojem Općina Novi Grad kontinuirano radi već nekoliko godina, a čija je vrijednost oko 2,5 miliona konvertibilnih maraka. Završetkom ovog velikog sistema rješava se vodosnabdijevanje gornjih dijelova naselja Zabrđe i Naselja heroja Sokolje, a u budućnosti i dijelova Reljeva.

U prošloj godini radovi su izvedeni kroz cijelo Rajlovačko polje, gdje su ranije bili najveći gubici na vodovodnoj mreži na području Novog Grada, i gdje je povećan profil cjevovoda, kao i radovi ulicom Rajlovačka cesta, te potisni i distributivni cjevovod koji je izgrađen od pumpne stanice u Briješću do rezervoara na Sokolju.

Odmah nakon toga, ušlo se u rješavanje vodosnabdijevanja donjeg dijela naselja Zabrđe, gdje su pri kraju radovi na sanaciji i priključenju velikog broja stambenih objekata na novoizgrađenu vodovodnu mrežu koja je rađena u četiri ulice.

Završeni su radovi na vanjskom uređenju pumpne stanice u Briješću, a u toku su radovi na postavljanju telemetrijske opreme kojom će se pratiti rad pumpnog postrojenja, a koja će biti uvezana u centralni sistem KJKP „Vodovod i kanalizacija“.

U sklopu ovog vodovodnog sistema u proteklom periodu rađena je i rekonstrukcija stare dotrajale vodovodne mreže u ulici Numan paše Čuprilića, na Sokolju, te su izgrađeni i pumpna stanica i rezervoar kapaciteta 1.000 kubika vode.



Sanirana oštećenja na pedeset osam parkinga

U proteklom periodu završena je sanacija oštećenja na 58 parkinga u naseljima Dobrinja, Mojnilo, Saraj - Polje, Alipašino - Polje, Otoka, Hrasno, Čengić - Vila. U okviru tog projekta sanirana su oštećenja i udarne rupe na parkinzima, urađeno je nivelisanje šahtova i šibera, kao i čišćenje i uklanjanje otpadaka.

Za navedene radove iz općinskog budžeta osigurane su 163.000 konvertibilnih maraka. Također, ove godine Općina je započela i projekat izgradnje novih parkinga u urbanim naseljima kako bi se osiguralo više mjesta za parkiranje u naseljima koja su projektovana i građena u vrijeme kada je u Sarajevu bilo znatno manje automobila. U ovoj godini na području Novog Grada bit će izgrađeno više od 600 novih parking mjesta, a projekat će biti nastavljen i u idućoj godini.



Plastična horizontalna signalizacija na parkinzima

Na saniranim parkinzima u toku je postavljanje plastične horizontalne signalizacije čiji je vijek trajanja pet godina, a radovi se izvode na parkinzima u naselju Dobrinja, gdje je u toku obilježavanje parking mjesta, iscrtavanje smjerova kretanja vozila, te postavljanje vertikalne signalizacije, kao i obilježavanje parking mjesta za osobe sa invaliditetom. Za te radove iz budžeta Općine Novi Grad izdvojeno je oko 250.000 konvertibilnih maraka. Realizacijom ovih projekata, osim što će se urediti zapušteni parkinzi koje niko ne održava, uvešće se i više reda u samo parkiranje vozila.



Nova LED rasvjeta na 26 velikih parkinga u općini Novi Grad Sarajevo

Općina Novi Grad Sarajevo realizira projekt obnove i modernizacije rasvjete na parkinzima na svom području, gdje će stara i dotrajala rasvjeta biti zamijenjena modernom led tehnologijom koja troši manje električne energije, a istovremeno daje bolji efekat osvjetljenja, te ima duži vijek trajanja od standardne.

Potpuno nova rasvjeta u ovoj godini postavljena je na 26 velikih parkinga za šta je iz općinskog budžeta osigurano 335.000 KM, dok je u narednoj godini planirana zamjena rasvjete i na preostalim parkinzima.

Izvođači radova Konzorcij SES d.o.o. i STEP d.d. Sarajevo uradili su reparaciju starih stubova. Tamo gdje je bilo neophodno, uklonili su stare dotrajale stubove i postavili nove, nakon čega su ugradili LED rasvjetna tijela.

Rasvjeta je obnovljena na 26 lokacija, u mjesnim zajednicama Staro Hrasno, Čengić Vila, Otoka, Aneks, Alipašino Polje B-1 i B-2, Alipašino Polje C-1 i C-2, Saraj-Polje, Dobrinja A, Dobrinja C, Dobrinja D. Ovim radovima osvijetljeno je oko 40% parking prostora u Novom Gradu. Inače, rasvjeta na parkinzima nije mijenjana 30 - 40 godina, te je većina parkinga loše ili nije nikako osvijetljena, tako da je na pojedinim lokacijama urađena zamjena rasvjetnih tijela, zatim povećanje visine stubova, te zamjena stubova, a radovima su obuhvaćeni najveći parking prostori. Ovim projektom poboljšat će se osvjetljenost parking prostora, što je bitno zbog same sigurnosti vozila, ali i osjećaja sigurnosti korisnika parkinga.





Potpisan ugovor za nastavak regulacije vodotoka Lepeničkog potoka u naselju Zabrđe



Općina Novi Grad Sarajevo nastavlja realizaciju projekta regulacije vodotoka Lepeničkog potoka koji protiče kroz naselje Zabrđe, jedno od najgušće naseljenih dijelova općine Novi Grad, a u koji se ulijevaju procjedne vode iz tla deponije Smiljevići.

Tim povodom u Općini Novi Grad potpisan je ugovor za izvođenje radova na regulaciji još 80 metara Lepeničkog vodotoka, a radovi će kštati 99.925 KM. Ugovor su potpisali Kenan Bukva, šef Odsjeka za komunalnu infrastrukturu i Haris Zečo, zamjenik direktora građevinske firme Harysco koja je izvođač radova.

Nakon potpisivanja ugovora pristupit će se realizaciji projekta koji je od velikog značaja za stanovnike naselja Zabrđe. Kenan Bukva je istakao da je riječ o finansijski zahtjevnom projektu koji je Općina Novi Grad prethodnih godina realizirala uz pomoć nadležnih institucija, odnosno sa Ministarstvom privrede Kantona Sarajevo i uz pomoć donacije Vlade Republike Mađarske.

Do sada je u ovaj projekat uloženo 2 miliona i 150 hiljada KM, a urađena su 2 kilometra i 150 metara regulacije.

„U pitanju je jedan od infrastrukturnih projekata u koji je Općina Novi Grad i prethodnih godina investirala značajna finansijska sredstva. Do sada je regulisano oko 2 kilometra i 150 metara vodotoka, od recipijenta u rijeku Bosnu uzvodno. Ostalo je još da se uradi dio do samog ulaza u deponiju, tj. oko kilometar i 200 metara. Riječ je o

potoku u koji se ulijevaju procjedne vode sa deponije, obzirom da se one ne tretiraju značaj ovog projekta je višestruk, prvenstveno zbog prevencije poplava i izljevanja tih procjednih voda s deponije, te da se one provedu kroz naselje Smiljevići i Zabrđe do recipijenta u Bosnu bez posljedica na stanovništvo i materijalna dobra. Naselje Zabrđe je u prethodnim godinama doživljelo ekspanziju izgradnje tako da je regulacija u takvom naselju jako bitna da bi se zaštitili ljudi i njihova materijalna dobra“, rekao je Kenan Bukva.

Nakon što se realizuje 14. faza projekta, potrebno je završiti i preostali kilometar i 200 metara regulacije u narednim godinama. Općina Novi Grad je aplicirala nadležnim kantonalnim ministarstvima da pomognu u sufinansiranju projekta s obzirom na to da je riječ o višemilionskim iznosima.

Haris Zečo istakao je da je firma Harysco već radila jedan dio Lepeničkog potoka u ranijem periodu i da očekuje da će već ove sedmice početi sa izvođenjem radova.

„S obzirom da smo ranije radili na ovom projektu, mislim da neće biti problema tokom izvođenja radova i da ćemo ispoštovati rok od dva mjeseca, naravno ako nam to vremenski uslovi dozvole. Radit ćemo stabilizaciju podtla, zatim ćemo postaviti temeljnu ploču dubine 30 centimetara, širine 3 metra i 70 centimetara, a čiji je zid visine 2 metra. Poslije se to zasipa i dovodi u prvobitno stanje“, rekao je Haris Zečo.

Završena betonska konstrukcija velikog i malog bazena



Nakon što su radnici građevinske firme Unigradnja proteklog mjeseca završili betoniranje temeljne ploče budućih otvorenih bazena na Dobrinji, u koju je ugrađeno oko 850 kubika betona, pristupilo se izradi zidova, preliva i cjevnih razvoda za bazen.

Ovih dana, završene su konstrukcije velikog i malog bazena sa pripadajućim cijevnim razvodima. Prije navedenih radova izgrađena je konstrukcija pratećeg objekta, gdje će biti smještena kompletna bazenska tehnika budućeg bazena, postrojenje za prečišćavanje vode i slično. U objektu su završeni razvodi elektroinstalacija, kao i hidroizolaterski radovi.

Početak izgradnje bazena prethodilo je izmještanje instalacija koje su se nalazile na ovoj i susjednim lokacijama, a izgrađena je i nova naseljska kanalizacija, što je bilo uslov za početak izgradnje samog objekta.

Izgradnja otvorenih bazena dio je projekta sportsko-rekreativnog centra Dobrinja, jednog od najznačajnijih infrastrukturnih projekata Općine Novi Grad Sarajevo. Njegovom izgradnjom stanovnici najmnogoljudnije općine u BiH, po prvi put, će dobiti otvorene bazene s pratećim sportsko-rekreativnim sadržajima koji će se moći koristiti tokom cijele godine. Osim malog i velikog bazena, u sklopu kompleksa gradit će se i sportski tereni i ugostiteljski sadržaji. Vrijednost ovog velikog kapitalnog projekta je 6,6 miliona KM. Do sada je za ovaj projekat iz budžeta Općine Novi Grad Sarajevo izdvojeno 1.588.000 KM, dok je Kantonalno ministarstvo izdvojilo milion KM.

Nacrtom budžeta Općine Novi Grad za 2020. godinu, za ovaj projekat planiran je još milion KM.

SVIM GRAĐANIMA ČES

DAN OPĆINE NOVI



STITAMO 16. DECEMBAR

GRAD SARAJEVO





Smanjiti nivo stanogradnje u centralnom dijelu općine



Načelnik Općine Novi Grad Sarajevo Semir Efendić i gradonačelnik Sarajeva Abdulah Skaka, sa saradnicima, održali su sastanak u sarajevskoj Vijećnici, na kojem su razgovarali o donošenju regulacionih planova za Općinu Novi Grad, a koje će u narednom periodu usvajati Gradsko vijeće Sarajeva.

Riječ je o nekoliko vrlo važnih regulacionih planova koji čine centralni dio najmnogoljudnije općine kao što su Alipašin Most -1 , Alipašin Most -5 i 6, Halilovići i RP RTV. Tokom sastanka usaglašeni su stavovi oko svih ključnih pitanja.

Načelnik Efendić je pojasnio da se radi o setu prostornih planova od Halilovića do Otoke, koji obuhvataju prostor s obje strane ulice Džemala Bijedića, te da je želja menadžmenta Općine još u ranijem periodu bila da se u tom dijelu smanji nivo stanovanja, odnosno brojnost stambenih objekata.

„Imali smo situaciju da ranije usvojenim Regulacionim planom Alipašin Most - 7 prostor od Nove Otoke do naselja Miljacka ima veliki procenat stanovanja. Smatramo da se ne može na takav način nastaviti graditi, te da se slobodni prostor treba „humanizirati“ tako što će se planirati i dodatni društveni, kulturni, sportski i vjerski sadržaji, obzirom da je to centralni dio naše općine, gdje trebamo imati sadržaje za sve naše stanovnike. Ukoliko bi se nastavilo sa takvim procentom stanogradnje bojim se da bi to na kraju bio problem“, izjavio je načelnik Efendić, ističući da je stav Općine da

to jeste poslovno-stambena zona, ali da stanogradnja mora biti zastupljena u znatno manjoj mjeri nego što je bilo krenulo od Otoke prema Halilovićima.

Gradonačelnik Abdulah Skaka je naglasio da su, kroz razgovor, došli do najboljih rješenja, kako zadovoljiti s jedne strane interes investitora, a da pri tome, s druge strane, ni jednog trenutka ne bi ugrozili kvalitet života u glavnom gradu BiH.

Pored toga, razgovarano je i o donošenju RP Švrakino Selo – Aneks i Švrakino Selo – Mlakve. To je prostor kojim treba proći Južna longitudinala koja je izgrađena do Hrasnog brda, gdje je napravljen kružni tok, a čija bi se izgradnja trebala nastaviti prema Dobrinji. Donošenjem ovih regulacionih planova stvaraju se preduslovi za nastavak izgradnje Južne longitudinalne.

Također, u toku je usvajanje regulacionih planova Zabrdje i Reljevo koji su vrlo važni za legalizaciju stambenih objekata u tim naseljima. Na sastanku je istaknuta činjenica da je od 11 regulacionih planova Općine Novi Grad, najsloženiji onaj koji obuhvata prostor uz ulicu Džemala Bijedića koju obuhvataju RP Alipašin Most 5 i 6, te je dogovoreno da se od stručnjaka iz ove oblasti zatraže i dodatna mišljenja, savjeti i konsultacije.

Neki planovi su već spremni za usvajanje kao što su RP Halilovići i RP RTV, a većina će se na dnevnom redu Gradskog vijeća naći već u idućoj godini.

U ulici Safeta Zajke gradi se igralište sa umjetnom travom i tribinama

U ulici Safeta Zajke, u blizini kružnog toka na LOT-u 2C u Boljakovom Potoku počela je izgradnja sportskog igrališta sa umjetnom travom, tribinama i zaštitnom ogradom. Novi teren zamijenit će sadašnji stadion „Braća Kadić“ čije je uklanjanje planirano u narednom periodu radi izgradnje 9. transverzale, saobraćajnice koja će spajati naselje Boljakov Potok sa Alipašinim Poljem.

Izgradnju sportskog igrališta, sa pratećim objektima, u kojima će biti smještene svlačionice, sanitarni čvorovi, kancelarije za upravu i sudije, kao i dugi sadržaji, finansira Općina Novi Grad sredstvima u iznosu od oko 320.000 konvertibilnih maraka. Teren će se koristiti za mali nogomet, a njegove dimenzije su prilagođene i za odvijanje međunarodnih utakmica. Bit će osvijetljen reflektorima, te će se moći koristiti i u večernjim terminima.

Sportski teren gravitira gusto naseljenim mjesnim zajednicama „Alipašin Most-1“ i „Briješće“, a osim djece, njegovoj izgradnji raduju se i roditelji, ali i uprava Omladinskog fudbalskog kluba „Biser 96“, koja će u sklopu terena dobiti prostorije. Osim tog kluba, sportski teren koristit će i drugi klubovi i djeca iz okolnih naselja.

Prema riječima Samira Čička, predsjednika Upravnog odbora OFK „Biser 96“, izgradnja zamjenskog stadiona od višestrukog je značaja za cijelo naselje Boljakov Potok, ali i naselja Vitkovac i Briješće, u kojima stanuje veliki broj djece kojoj će ovaj teren biti na raspolaganju za igranje utakmica i treninge.

U OFK „Biser 96“ trenira oko stotinu djece uzrasta od 2012. godišta do seniora, iako postižu zapažene rezultate na kantonalnim i općinskim takmičenjima, treninzi na novom igralištu doprinijet će još većim uspjesima mladih fudbalera.

Rok za izvođenje radova na izgradnji igrališta je 90 dana, a ukoliko vremenski uslovi budu zadovoljavajući, predstavnici izvođača radova, firma G.D. Konstrukcije d.o.o. Mostar, mišljenja su da bi igralište moglo biti u funkciji i prije.





Srednjoškolci iz naselja Saraj-Polje sami iscrtili linije na sportskom igralištu

U vremenu kada je, nažalost, u našem okruženju sve više pojava devastacije dječijih i sportskih igrališta i drugih javnih dobara, pozitivan primjer očuvanja sredine u kojoj žive, pokazali su domišljati dječaci iz naselja Saraj-Polje.

Petnaestogodišnji Hamid Merdović i njegovi drugovi došli su na ideju da sami iscrtaju linije na sportskom igralištu, gdje je nedavno preduzeće „Lokom“ saniralo ogradu, table i koševе. Željeli su dati vlastiti doprinos uređenju igrališta koje se nalazi iza stambene zgrade u ulici Teheranski trg, na kojem svakodnevno provode vrijeme igrajući košarku i nogomet, a gdje su proteklog vikenda iscrtili linije.

„Zajedno sa četvericom drugara svakodnevno igram košarku na ovom igralištu. Ponukani činjenicom da su se linije na igralištu izbrisale, odlučili smo da ih sami iscrtamo. Radovi su trajali dva dana. Najprije smo stavili trake na linije koje su se još pomalo uočavale. To nam je bio šablon za farbanje. Sakupili smo 60 KM. Farukov babo nam je od sebe dao 50 KM, a jedan komšija još 10 KM, tako da smo kupili boje i obojili igralište koje sada lijepo izgleda“, priča Hamid.

Njegov drug Faris Darman naglašava da svi treba da se ugledaju na njih, jer oni cijeli ljetnji raspust provode igrajući fudbal i košarku na tom igralištu. „Odlučili smo da obojimo linije da bismo lakše igrali. Mislim da bi svi trebali da se ugledaju na nas, jer sva igrališta su potrebna za sportske aktivnosti“, kaže Faris, poručivši vršnjacima da postupe na isti način kako bi nam igrališta bila očuvana i lijepa. Potrebno je samo malo truda i volje. Dodao je, kako bi on i njegovi drugari voljeli kada bi se na igralište postavila i rasvjeta, tada bi, kaže, mogli igrati i u večernjim satima.

Načelnik Općine Novi Grad Semir Efendić, zajedno sa saradnicima i predstavnicima Savjeta MZ „Saraj-Polje“, obližnje škole „Aleksa Šantić“ i preduzeća „Lokom“ obišao je igralište, gdje se susreo sa vrijednim momcima i uručio im simboličan poklon - nogometnu i košarkašku loptu i mreže za koševе i golove.

Primjer dječaka iz Saraj-Polja dokaz je da igrališta možemo zajedno održavati i čuvati, a najbolje ih mogu čuvati upravo oni koji ih koriste.



Ekipe „Lokoma“ svakodnevno rade na sanaciji oštećenja



Općina Novi Grad Sarajevo proteklih je godina uložila na stotine hiljada konvertibilnih maraka za izgradnju novih i sanaciju postojećih dječijih i sportskih igrališta na svom području u nastojanju da najmlađim stanovnicima i omladini osigura prostor za bezbrižnu igru i sportske aktivnosti.

Međutim, već duži vremenski period igrališta su na meti vandala, zbog čega je Općina, još u aprilu, uputila dopis nadležnim organima (Četvrtjoj PU) da poduzmu neophodne mjere kako bi se počinitelji sankcionisali, a igrališta zaštitila od svakodnevnog uništavanja.

No, iz dana u dan igrališta su sve više na meti „rušitelja“ javnog dobra. Prizori koji se mogu vidjeti na nedavno izgrađenim, kao i na tek obnovljenim igralištima su, ni manje, ni više, nego zastrašujući i ukazuju upravo na to da se radi o organiziranom i planskom uništavanju. Polomljeni koševi, table i ograde, iščupani betonski nosači za klupe, zapaljene korpe za otpatke, samo su neke od slika koje se mogu vidjeti na novogradskim igralištima.

Tako ekipe „Lokoma“ svakodnevno ulažu velike napore kako bi što više oštećenja sanirali, te očistili ogromne količine smeća koje se ostavljaju na igralištima i u parkovima, u toj namjeri vrlo teško uspijevaju, jer igrališta koja dovedu u stanje upotrebljivosti, već za dan-dva ponovo bivaju devastirana.

Osim postojećih igrališta, koja su i po nekoliko puta iznova obnavljana, uništavaju se i potpuno nova igrališta na čiju izgradnju su građani čekali godinama. Jedno takvo je igralište sa sportskim terenom u naselju Saraj–Polje, koje je sada neprepoznatljivo.

Nisu pošteđena ni dječija igrališta na Trgu Zlatnih ljiljana, na Dobrinji, koje je 2016. godine otvoreno u jednoj od najvećih mjesnih zajednica u Novom Gradu, MZ „Dobrinja B“, a koja ima preko 10.000 stanovnika, kao ni igrališta u naseljima Alipašino Polje, Briješće, Zabrđe, Boljakov i Buča Potok i druga.

Pozivamo građane da čuvaju igrališta i parkove, te ostalu javnu imovinu, kako bi naši najmlađi stanovnici imali mjesto za igru, a naša općina bila ljepša i urednija.





Nova dječija igrališta u Švrakinom Selu i Mojmilu

Općina Novi Grad Sarajevo bogatija je za još dva dječija igrališta koja su izgrađena u naseljima Mojnilo i Švrakino Selo.

Izgradnjom igrališta posebno su obradovani mještani naselja Švrakino Selo, gdje je u proteklom periodu izgrađeno prvo sportsko igralište, ali je nedostajalo igralište za manju djecu. U sklopu igrališta napravljen je i jedan broj klupa, tako da roditelji mogu provoditi ugodnije vrijeme sa svojom djecom.

Samiya Škoro, penzionerka i dugogodišnja stanovnica Švrakinog Sela, izražava zadovoljstvo što nakon dužeg vremena, konačno, i ovo naselje ima dječije igralište: "Ja ovdje živim već 60 godina, i naša djeca nikada nisu imala jedno ovakvo igralište na kojem bi mogla provoditi svoje slobodno vrijeme, tako da je ovo 'pravi pogodak' za ovo naselje i svu našu djecu".

"Lijepo je da su nam napravili ovaj park, jer sada imam pravo mjesto da provodim vrijeme sa svojim drugaricama", kaže Nahla, učenica OŠ "Meša Selimović", ističući pri tome nadu da će im park dugo potrajati i da neće biti uništen. "Park je koristan, i djeci, i roditeljima", dodaje njena prijateljica Mija Hodžić.

Novo igralište dobila su i djeca Mojmila. Na dječijim igralištima ugrađena je nova gumena podloga ispod sprava, a od mobilijara oba parka imaju kule sa toboganom, ljuljačke, njihalice, klackalice i pješčanik. Planirani mobilijar je modernog dizajna i u skladu sa evropskim standardima za sigurnost djece prilikom korištenja mobilijara. Pored ovog mobilijara, postavljene su i nove parkovske klupe i korpe za otpad.

Za izgradnju ova dva dječija igrališta iz općinskog budžeta izdvojeno je 68.000 KM.



Svečano obilježen početak rada dječijeg vrtića na Aneksu



Naselje Aneks, koje do prošle godine nije imalo ni osnovnu školu, nakon 40 godina postojanja dobilo je i vrtić. Novoizgrađeni vrtić "Aneks" koji se nalazi u sklopu istoimene Osnovne škole počeo je sa radom prije nekoliko dana, a svečanost povodom njegovog otvaranja upriličena je, 25. oktobra, na 74. godišnjicu postojanja Javne ustanove „Djeca Sarajeva“.

Početak rada vrtića, za čiju je izgradnju Općina Novi Grad Sarajevo izdvojila 280.000 KM, presijecanjem vrpce ozvaničili su pomoćnik načelnika Općine Novi Grad Sarajevo za finansije Emir Dedović i ministrica za obrazovanje, nauku i mlade Kantona Sarajevo Zineta Bogunić, a prisustvovali su i roditelji i njihovi mališani koji su svojim recitacijama i plesom uljepšali svečanost.

Pomoćnik načelnika Emir Dedović najavio je u svom obraćanju da će uskoro biti otvoren još jedan vrtić na području općine Novi Grad, jer rukovodstvo ove najmnogoljudnije općine u Kantonu Sarajevo radi na rješavanju problema nedostatka kapaciteta kada je u pitanju predškolsko obrazovanje.

„Tako to nije izvorna nadležnost lokalnih zajednica u KS, mi smo u zadnjih nekoliko godina obnovili i izgradili nekoliko vrtića - od „Kadifice“, „ŽIŠ“-a, a danas otvaramo i vrtić „Aneks“. Završili smo i adaptaciju prostora u kojem se nalazio vrtić „Žubor“, na Saraj-Polju, te ugovorili i obnovu vrtića „Vjeverica“, na Alipašinom Polju“, izjavio je Emir Dedović.

Dodao je da vrtić u sklopu škole „Aneks“ prvobitno nije bio predviđen, ali da je na insistiranje Općine Novi Grad došlo do preprojektovanja školskog objekta kako bi se dobio prostor za vrtić. „Izgradnju vrtića Općina Novi Grad je sama isfinansirala, jer nije bilo interesa Općine Novo Sarajevo i Ministarstva za obrazovanje, nauku i mlade KS, koji su sufinansirali izgradnju škole. JU „Djeca Sarajeva“ završila je nabavku opreme, kao i upis mališana i prijem stručnog kadra. Međutim, najvažnije je da je ovo naselje, nakon 40 godina, dobilo ono što mu treba - školu i vrtić“, istakao je Dedović.



Zadovoljni roditelji

Koordinatorica za odgojno-obrazovni rad JU „Djeca Sarajeva“, Abida Kapetanović, je naglasila da su roditelji sretni i zadovoljni, jer je ovom naselju nedostajao vrtić. Spomenula je da se radi o objektu koji zadovoljava evropske standarde, zadovoljeni su striktni pedagoški standardi, ali i oni koji se tiču opreme i jelovnika.

Otvaranje vrtića u jednom od najvećih naselja s radošću su dočekali i roditelji. „Stanujem 150 do 200 metara od vrtića, mi kao sugrađani smo prezadovoljni, i ovo je nešto predivno. Zahvaljujem se svima zaslužnim za otvorenje vrtića koji do sad nismo imali. Ljudi su do sada išli dalje, odvozili djecu, gubili vrijeme. Kćerka je već krenula u vrtić i ja sam prezadovoljan“, kaže Mirzet Zulčić, stanovnik naselja Aneks čije dijete ide u novootvoreni vrtić.



Vrtić „Žubor“, na Saraj-Polju, otvara vrata mališanima

Nakon što je počeo sa radom vrtić „Aneks“, stanovnici općine Novi Grad Sarajevo dobit će još jedan vrtić. U naselju Saraj-Polje završeni su radovi na adaptaciji prostora u kojem se prije agresije na Bosnu i Hercegovinu nalazio vrtić „Žubor“, a samo otvaranje vrtića usaglasit će se sa Javnom ustanovom „Djeca Sarajeva“ koja bi trebala opremiti prostor.

S obzirom na to da je nedavno došlo do smjene direktorice te Javne ustanove, nadamo se da to neće oduzeti dodatno vrijeme, te da će mališani uskoro dobiti mjesto za boravak.

Izgradnja vrtića u ovom naselju višedecenijska je potreba, jer većina djece iz ovog dijela Novog Grada boravi u vrtiću „Dječiji grad“ na Mojmilu, što posebno u zimskom periodu predstavlja problem za njihove roditelje. Stavljanje u funkciju ovog vrtića značajno će roditeljima olakšati svakodnevni život, a mališanima osigurati prostor za ugodan boravak i igru.

S obzirom na sve veći broj mladih bračnih parova koji se odlučuju da žive u ovoj lokalnoj zajednici, Općina Novi Grad kontinuirano radi na proširenju kapaciteta Javne ustanove „Djeca Sarajeva“, a za adaptaciju prostora u ulici Teheranski trg broj 10, na Saraj-Polju, izdvojila je 120.000 KM.

Otvaranjem još jednog prostora za predškolski odgoj i obrazovanje djece, doprinijet će rješavanju problema nedostatka mjesta za boravak najmlađih stanovnika naše općine. Obdaništem će upravljati Javna ustanova „Djeca Sarajeva“, a u njemu će moći boraviti 50-ak djece raspoređenih u dvije odgojne grupe.

Kako bi se ovaj prostor prilagodio potrebama za boravak mališana, bilo je neophodno uraditi njegovu kompletnu rekonstrukciju i adaptaciju. Zamijenjene su vodovodne i kanalizacione instalacije, elektroinstalacije, zatim podne i zidne obloge. Ugrađena je nova fasadna i unutrašnja stolarija, sanitarna oprema, kao i novi protivpožarni i sigurnosni sistemi.

Vrtić će imati prostorije za prijem i presvlačenje djece, prostor za rad s djecom, razgovor s roditeljima, kuhinju, trpezariju, sanitarne prostorije za mališane, za odgajatelje i drugo osoblje.



Počela rekonstrukcija vrtića „Vjeverica“ na Alipašinom Polju



Općina Novi Grad Sarajevo nastavlja sa rekonstrukcijom devastiranog vrtića "Vjeverica" na Alipašinom Polju, kako bi osigurala prostor za boravak najmlađih stanovnika svoje općine. Okvirni sporazum za rekonstrukciju vrtića, u vrijednosti od oko 1,9 miliona konvertibilnih maraka, potpisan je sa predstavnikom konzorcija firmi Inggra d.o.o. i Klaus Lehman GMBH d.o.o., koji su izabrani za izvođača radova, a nedavno su počeli i radovi na objektu.

Vrtić „Vjeverica“ najveći je devastirani objekt predškolskog obrazovanja u općini Novi Grad i jedino obdanište koje se nalazi u naselju Alipašino Polje, na čiju obnovu stanovnici desetljećima čekaju. Njegovo stavljanje u funkciju od izuzetne je važnosti s obzirom na činjenicu da postoji velika potreba za smještajnim kapacitetima za boravak najmlađih stanovnika ove lokalne zajednice. Vrtić se nalazi u parkovskom dijelu naselja zaštićenom od automobila, i nakon rekonstrukcije bit će ugodno mjesto za boravak mališana.

Za radove koji će se izvoditi u ovoj godini građevinsko-zanatske, elektroinstalaterske, vodoinstalaterske i ostale unutrašnje radove, Ministarstvo obrazovanja, nauke i mladih KS, u čijoj je nadležnosti ova predškolska ustanova, iz budžeta za 2018. godinu izdvojilo je 280.000 KM, dok je Općina iz ovogodišnjeg budžeta osigurala 200.000 KM. Ovom fazom radova bit će obuhvaćeni

U ranijem periodu Općina je uložila oko 250.000 KM u sanaciju krova, zamjenu hidroizolacije i zatvaranja objekta radi sprečavanja daljeg propadanja. Trenutno je osigurano 480.000 KM za radove planirane za ovu godinu. Ukoliko bi se u idućoj godini osiguralo dovoljno sredstava, vrtić „Vjeverica“ bi mogao biti završen u narednoj godini.



„Neodoljivi mit - Sin dvosjeklog mača“, mladog autora Abdurrahmana Zukića

U Centru za kulturnu – vila Hadžihalilovića na Dobrinji 12. juna, održana je omladinska večer u okviru tradicionalne manifestacije „Novogradski dani 2019“, na kojoj je promovisana knjiga „Neodoljivi mit - Sin dvosjeklog mača“, autora Abdurrahmana Zukića, sedamnaestogodišnjeg učenika Dobrinjske gimnazije. Promotori knjige bili su mr. Aida Hodžić, profesorica bosanskog jezika i književnosti i mr. sc. Semir Salihović, profesor islamske vjeronauke u Gimnaziji Dobrinja, a program je upotpunjen i čitanjem odabranih odlomaka iz knjige u interpretaciji Iman Karović, te stihova Envera Čolakovića „Derzelezu Ale“ u izvedbi Emira Trpeza.

U ugodnoj atmosferi i uz prisustvo ljubitelja pisane riječi, Abdurrahmanovih profesora, školskih drugova i prijatelja, te drugih gostiju, predstavljena je knjiga mladog autora koji je svoj trogodišnji istraživački rad pretočio u jedinstveno i vrlo interesantno štivo namijenjeno široj čitalačkoj populaciji.

Ljubav prema domovini

Ideja za nastanak knjige krenula je iz školske klupe, iz ljubavi prema historiji i svojoj domovini. Abdurrahman je na knjizi radio od devetog razreda osnovne škole, tačnije nakon što je njegova priča „Vremenska vrata“ prvonagrađena na „Preporodovom“ konkursu za literarni rad o temi „Bosansko kraljevstvo“ što ga je dodatno inspirisalo za nastavak istraživanja. Njegova dječaćka interpretacija knjizi daje sinergiju historijske fikcije naučno - fantastičnih elemenata napisanih kao avanturistički dnevnik mladog historičara, oduševljenog bogatom historijom svoga naroda. U tom smislu, Abdurrahman je u svojoj knjizi pokušao prenijeti romantičarski duh iz djela Envera Čolakovića „Legenda o Ali-paši“ i historijski književni izraz Mehmedalije Maka Dizdara nastojeći pri tom da kreira cjelinu sa istraživačkim stilom i brzom radnjom koja ga je oduševljavala čitajući novije romane.

Ovaj talentirani mladić oduševio je sve prisutne svojim izlaganjem, načinom razmišljanja, historijskim izražajem i motivacijom za ovo jedinstveno književno djelo koje donosi nešto više od 20 priča o sedmičnom životu historičara Zulfikara Bakića.

U Zukićevom djelu izrazito je naglašena pjesnikova samosvijest iz kojeg učimo kako ljubav ima veliku moć. U njegovim pričama naglašena je potreba da se uspostavi duhovna i egzistencijalna komunikacija sa ljudima iz drevnih vremena. Očita je motiviranost o razjašnjavanju svoga, bosanskog, historijskog i antropoloških korijena, kao i paralelizam između historijske slike i novog filozofskog pogleda na sudbinu čovjeka i na vjernost nekih podataka o ljudskoj sudbini.



Promocija kulture, književnosti i umjetnosti

Promocija je praćena aplaudiranjem publike, pozitivnim komentarima, ali i vrlo interesantnim pitanjima upućenim autoru, kao i preporukama za nastavak njegovog istraživačko - stvaralačkog puta.

Bilo je lijepo slušati kritička razmišljanja, sigurno i argumentovano izlaganje i odličnu promociju zrelog i ozbiljnog rada jedne mlade osobe. Ovo je ujedno bila i promocija same kulture, književnosti i umjetnosti, onoga što u pravom sistemu vrijednosti treba da stoji na prvom mjestu.

Podrška radu Centra za rani rast i razvoj



Prve godine života su najvažnije

Centar za rani rast i razvoj radi na odgoju i obrazovanju djece mlađe od 10 godina sa fokusom na djecu do 3 godine, prilagođen je praćenju ranog dječijeg rasta i razvoja. Vrata Centra otvorena su i za sve roditelje koji žele unaprijediti roditeljske vještine, sa kojima radi tim stručnjaka iz oblasti obrazovanja i socijalne zaštite, a posebna pažnja posvećena je ranjivim i ugroženim porodicama. Centar je vrlo važan zbog činjenice da posvećuje pažnju djeci od samog početka njihovog života, jer su prve godine života najvažnije. Istraživanja pokazuju da je rana intervencija, te osiguravanje poticajnog okruženja u kojem će dijete rasti i razvijati se od izuzetnog značaja za daljnje napredovanje i postizanje boljih rezultata. Kroz takav rad kod djece se razvija socijalizacija, utječe na njihov fizički, kognitivni, socio-emocionalni razvoj, razvoj ličnosti, razvoj govora, komunikacije i stvaralaštva.

Općina Novi Grad Sarajevo već šestu godinu podržava projekat Centra za rani rast i razvoj, kojeg implementira Organizacija SOS Dječija sela BiH, a kroz čije programe je prošlo oko 1.500 djece mlađe od deset godina i isto toliko njihovih roditelja.

Centar je mjesto gdje stručne osobe godinama unatrag, uz finansijsku podršku Općine, pomažu roditeljima i njihovoj djeci, a takva praksa je nastavljena i u 2019. godini. Tajib Delalić, pomoćnik načelnika Općine Novi Grad za boračka pitanja, rad, socijalna pitanja i zdravstvo i Faris Njemčević, direktor Programa u SOS Dječija sela Bosne i Hercegovine potpisali su danas sporazum o zajedničkoj saradnji na realizaciji ovog projekta. Za tu namjenu iz općinskog budžeta osigurano je 40.000 KM.

Kontinuirana podrška lokalne zajednice

„Sretni smo da imamo ovakvu ustanovu. Kroz centar prođe veliki broj djece i njihovih roditelja, najviše se poklanja pažnja djeci uzrasta do tri godine, jer kada tada reagujete, veće su mogućnosti za napredak u slučaju postojanja određenih deformiteta kod djeteta. Izuzetno smo zadovoljni ovim što rade“, rekao je Delalić.

Direktor Njemčević kaže da je upravo Općina Novi Grad njihov najbitniji partner, samim tim što su locirani na području ove općine, a s druge strane, to je općina sa velikim brojem korisnika. „Ciljana populacija su nam djeca, prvenstveno djeca bez roditeljskog staranja, zatim djeca koja žive u porodicama koje su u riziku od razdvajanja, separacije, kao i sva druga djeca koja ne mogu redovnim putem zbog socijalnog statusa doći do usluga koje mi nudimo. Uz podršku Općine Novi Grad Sarajevo, uspjeli smo da 2013. godine Centar otvorimo i da ga vodimo na način kako mi to znamo. To je sada jedan vrlo uspješan projekat“, izjavio je Njemčević.

Osigurane stipendije za uspješne učenike i studente, kao i za učenike srednjih strukovnih škola

Općina Novi Grad Sarajevo i ove će školske godine stipendirati učenike i studente, a za tu namjenu iz općinskog budžeta osigurala je 450.000 KM, od čega će 25.000 KM biti usmjereno za stipendiranje sportista koji na takmičenjima postižu zapažene rezultate.

Pravo na dodjelu stipendije imaju redovni učenici javnih ustanova srednjih škola i redovni studenti javnih visokoškolskih ustanova na području BiH, koji imaju prebivalište na području općine Novi Grad Sarajevo, a ne primaju stipendiju po drugom osnovu i čija primanja po članu domaćinstva ne prelaze 450 KM.

Na konkurs se mogu prijaviti i učenici srednjih strukovnih škola koji se obrazuju po trogodišnjem programu rada. Obzirom na potrebe tržišta rada, ova lokalna zajednica odlučila je da, na neki način, motiviše i nagradi i učenike koji su se odlučili školovati za deficitarna zanimanja. Cilj je podržati ih da uspješno okončaju svoje školovanje, nakon kojeg će primijeniti stečena znanja i vještine.

Pravo prijave imali su učenici koji ostvaruju prosjek u prethodnoj školskoj godini najmanje 4,5, te studenti sa prosjekom ocjena iz prethodne akademske godine 8,0“. Ove godine, pravo da apliciraju na konkurs imaju i učenici koji se obrazuju za zanimanja koja su deficitarna na tržištu rada.

To se, prije svega, odnosi na učenike srednjih strukovnih škola, koji se obrazuju po trogodišnjem programu rada i ostvaruju prosjek ocjena najmanje 3,0.

Stipendije i za studente tehničkih i fakultete medicinskih nauka sa prosjekom 7,5

„Svjesni smo činjenice da je danas dobar zanatlija veoma tražen i cijenjen, i da ih je najmanje na tržištu rada. Nadamo se da će naš doprinos tim mladim ljudima barem malo olakšati školovanje. Novost u ovoj godini jeste i to da je najniži prosjek za studente tehničkih i medicinskih fakulteta 7,5, dok za ostale fakultete ostaje 8,0“, kazala je Adisa Šuman, pomoćnica općinskog načelnika Službe za obrazovanje, nauku i mlade.

Stipendije se dodjeljuju za jednu školsku godinu i isplaćivat će se za 10 mjeseci (septembar – juni). Učenici srednjih škola će primati po 75 KM mjesečno za deset mjeseci, što znači 750 KM godišnje, a studenti po 100 KM, odnosno 1.000 KM godišnje.

Zabava, uz poklone, za više od 1 300 prvačića

Općina Novi Grad Sarajevo priredila je zabavu, uz poklone, za više od 1 300 mališana upisanih u prvi razred petnaest novogradskih osnovnih škola. Kulturno-zabavna manifestacija pod nazivom „Prvačići, sretno!“ održana je na stadionu u Centru „Safet Zajko“, uz prisustvo više od pet hiljada veselih i razdraganih mališana, njihovih roditelja, deda, nana i nastavnika.

Uz muzičke interpretacije Mravko - Travko, djeca su se veselila i plesala zajedno sa omiljenim likovima iz crtica, a ovo nesvakidašnje druženje sa vršnjacima djeci će sigurno ostati u lijepom sjećanju. Tom prilikom darovani su im i anatomski ruksaci sa školskim priborom, a sretan i uspješan početak školovanja poželio im je načelnik Općine Novi Grad Sarajevo Semir Efendić.

Ponosan na činjenicu što je broj djece upisane u prvi razred osnovnih škola na području Novog Grada najveći u Bosni i Hercegovini, načelnik je ovom prilikom kazao da odavno nije prisustvovao ljepšoj manifestaciji i ugodnijem ambijentu, gdje je upriličen prijem za više od 1 300 mališana.

„Mislim da u Bosni i Hercegovini ni u jednom mjestu nije upisano toliko djece kao u općini Novi Grad, što me zaista čini radosnim. Darovali smo ih skromnim poklonima, ali tu smo da ih pratimo kroz cijeli njihov život, kroz realizaciju brojnih projekata. Trudimo se da popravljamo obdaništa, gradimo igrališta, a u saradnji sa naših 15 osnovnih škola u kojima gradimo sportske dvorane, obnavljamo učionice, organiziramo i školska takmičenja. Mi živimo zajedno sa svojih 15 osnovnih škola“, kazao je načelnik u obraćanju prisutnima, ističući da je najljepši dio života upravo onaj koji je vezan za naše najmlađe i da više od 11 000 učenika pohađa osnovne škole u Novom Gradu.

Tamo gdje imamo 1 300 prvačića sigurno ima i budućnosti“, poručio je općinski načelnik Semir Efendić.





Prvačići OŠ „Meša Selimović“ posjetili Općinu Novi Grad



Učenici prvog razreda Osnovne škole „Meša Selimović“ sa učiteljicama i direktorom škole posjetili su, 18. novembra, Općinu Novi Grad, gdje su ih ugostili načelnik Semir Efendić i Adisa Šuman, pomoćnica općinskog načelnika za obrazovanje, kulturu i sport.

Posjeta je upriličena povodom 25. novembra - Dana državnosti Bosne i Hercegovine, a bila je to i prilika da mališani uruče načelniku Efendiću čestitke koje su pripremili povodom obilježavanja jednog od najznačajnijih datuma u historiji naše domovine.

Djeca su bila oduševljena dolaskom u prostorije Općine i u razgovoru sa načelnikom ispričala su šta im se najviše sviđa u školi, koje predmete najviše vole, ali i šta treniraju. Naglasili su da, pored škole, najviše vole vrijeme provoditi u Centru „Safet Zajko“, jednom od najvećih parkova u Sarajevu, sa velikim brojem sadržaja za djecu, omladinu, ali i starije.

Ovom prilikom direktor škole Hamdo Radonja uručio je zahvalnicu načelniku Semiru Efendiću za podršku u radu i razvoju osnovnog obrazovanja, i naglasio da je ova lokalna zajednica, uvijek tu da pomogne školi u sufinansiranju značajnih projekata, iako to nije u njenoj primarnoj nadležnosti.



„Uvijek nam je drago doći u Općinu Novi Grad Sarajevo, koja sa načelnikom Semirom Efendićem pomaže našoj školi kroz sufinansiranje niza projekata, počev od izdvajanja grantova za obnovu škole, otvaranja produženog boravka, koji vlastitim sredstvima ne bi mogli otvoriti“, kaže direktor škole i dodaje da su upravo uz pomoć ove lokalne zajednice otvorili prije dvije godine produženi boravak. „Roditelji su zahvalni zbog toga, jer su ranije upisivali djecu u škole na drugim područjima. Niz drugih aktivnosti ne bi mogli realizovati bez Općine Novi Grad. Prošle godine nam je upravo Općina opremila sportske sekcije, uložila je sredstva u sekcije odbojke i košarke. Ove godine idemo sa projektom kulturnog stvaralaštva za opremanje sekcija iz muzičke kulture, tehničkog odgoja, likovne kulture, ekološke sekcije“, kazao je direktor Radonja.

Učiteljica jednog odjeljenja Sabina Klačar rekla je da je ove školske godine u prvi razred upisano 79 dječaka i djevojčica raspoređenih u tri odjeljenja.

„Ja bih da se zahvalim u svoje i u ime svojih kolegica, koje su također učiteljice prvog razreda, načelniku naše Općine što je izdvojio svoje vrijeme da nas primi i da provede svoje vrijeme sa ovako malim djevojčicama i dječacima“, rekla je učiteljica Sabina Klačar.

Nakon razgovora sa načelnikom, učenicima su uručeni simbolični pokloni, a druženje je nastavljeno u kinu Općine Novi Grad, uz projekciju crtanog filma „Jeti“.





Stipendije za djecu bez roditelja

Općina Novi Grad Sarajevo i ove je godine izdvojila finansijska sredstva za stipendiranje djece bez roditelja. U zgradi Općine su potpisani ugovori sa šest djevojaka i mladića koji se školuju na visokoškolskim obrazovnim ustanovama.

Grantom za nevladine organizacije humanitarnog karaktera, koje vode brigu o posebnim populacijama, Općina Novi Grad Sarajevo godišnje izdvađa 100.000 KM. Dio tih sredstava usmjeren je i za projekat o brizi djece bez oba roditelja. Ove godine Općina će stipendirati šestoro djece koja će devet mjeseci primati po 100 KM, a projekat se realizira putem Fonda za brigu o djeci bez roditelja.

„Obzirom da isplata traje od septembra, stipendisti su dobili sredstva za dva mjeseca. Njihova obaveza je da uče i školuju se, a mi ćemo ih i dalje pomagati. Ljudi svakodnevno stradaju u raznim nesrećama, tako da se dešava da djeca ostaju bez svojih roditelja. Obaveza društvene zajednice je da im pomognemo koliko smo u mogućnosti i da im barem malo olakšamo život“, kazao je Tajib Delalić, pomoćnik načelnika Općine Novi Grad Sarajevo za boračka pitanja, rad, socijalna pitanja i zdravlje.

Težak je životni put bez roditeljske podrške

Dvadesetdvogodišnji student Ekonomskog fakulteta Univerziteta u Sarajevu Adel Rovčanin bez majke je ostao sa nepunih pet godina, a oca je izgubio u svojoj 11. godini. Kao jedanaestogodišnji dječak, našao se u veoma teškoj situaciji, uz njega su bili stariji brat i sestra koji su preuzeli brigu o njemu. Bez obzira na to, odrastanje i životni put bez roditeljske podrške je težak, ali Adel je danas uspješan i vrijedan mladi čovjek koji se školuje, kako bi jednog dana bio društveno koristan građanin naše države.

Iako nije u potpunosti zadovoljan situacijom u našoj zemlji, Alen svoju budućnost vidi u boljoj i prosperitetnijoj Bosni i Hercegovini. Stipendiju prima već treću godinu, od početka svog visokog obrazovanja. „Upravo danas upisujem prvu godinu master ciklusa i novcem koji sam danas dobio platit ću upisninu i propratne troškove, tako da je ova stipendija za mene izuzetno značajna. Vjerujem u ljude u ovoj državi, vjerujem u sebe i vjerujem da ću jednog dana biti na strani ruke koja daje novac“, izjavio je Alen Rovčanin.



Uz stipendiju lakše do sticanja univerzitetske diplome

Stipendiju je dobila i Adna Topalović, studentica master studija na Ekonomskom fakultetu u Sarajevu. Kaže da već drugu godinu prima stipendiju i da joj mnogo znači u studentskim danima. „Uz novac, mnogo znači i saznanje da ima ljudi koji misle na nas i koji nam pomažu u ovakvim životnim situacijama“, ističe Adna.

Prema statističkim podacima, u poslijeratnom periodu primjetan je sve veći broj djece koja su roditelje izgubila kroz teške bolesti, saobraćajne i druge nesreće, a koji su nerijetko primorani da se sami bore kroz život. Projekat kojeg Općina Novi Grad realizira putem Fonda za pomoć djeci bez roditelja, barem malo će im olakšati životni put do sticanja univerzitetske diplome.



Općina i osam institucija kulture zajedno u projektima kulturno-historijskog naslijeđa Bosne i Hercegovine



Načelnik Općine Novi Grad Sarajevo Semir Efendić potpisao je sa predstavnicima osam institucija kulture sporazume o saradnji na realizaciji zajedničkih projekata iz oblasti kulturno-historijskog naslijeđa Bosne i Hercegovine koji će se u ovoj godini realizirati u galerijskom prostoru Općine Novi Grad, Centru za kulturu – vila Hadžihalilovića i Domu oslobođilaca na Žuči.

Sporazumi su potpisani sa predstavnicima Javne ustanove Muzej Sarajeva, Umjetničke galerije Bosne i Hercegovine, Zemaljskog muzeja Bosne i Hercegovine, JU Muzej „Alija Izetbegović“, Gazi Husrev-begove biblioteke, Bošnjačkog instituta – Fondacija Adila Zulfikarpašića, Galerijom „Preporod“ i Bošnjačkom zajednicom kulture „Preporod“.

Općina Novi Grad Sarajevo u saradnji sa državnim i kantonalnim institucijama kulture treću godinu realizira različite projekte iz oblasti kulture, umjetnosti i zaštite kulturno - historijskog naslijeđa, kao i edukativne sadržaje. U proteklom periodu realizirano je 50 izložbi i drugih kulturnih događaja, a ove godine građanima će biti predstavljeno 19 izložbenih postavki.

Samir Avdić, načelnik Odjeljenja za etnologiju u Zemaljskom muzeju BiH istakao je značaj saradnje sa Općinom Novi Grad Sarajevo. „Do sada smo organizirali edukativne radionice za djecu iz Novog Grada, postavke različitih izložbi, a i za naredni period pripremamo zanimljive izložbe. Osim izložbi, veliki broj djece, učenika sedmog razreda posjetit će Zemaljski muzej BiH, tako da će uživati u sadržajima koji se nalaze u Muzeju, a na taj način mi odgajamo novu publiku za muzeje“, izjavio je Avdić.

Direktor JU Muzej Sarajeva Mirsad Avdić ističe da s obzirom na činjenicu da se Muzej nalazi na prostoru općine Stari Grad, težilo se ka tome da se ono što Muzej ima, približi svim stanovnicima Sarajeva, tako da se ta želja uklopila sa Strategijom razvoja Općine Novi Grad.





U blizini zgrade Općine arheološki park sa srednjovjekovnim stećcima



Pri kraju je uređenje arheološkog parka sa dva srednjovjekovna stećka, u blizini zgrade Općine, u ulici Bajrama Zenunija.

Dva srednjovjekovna nadgrobnna spomenika stećka, u novembru prošle godine, izmještena su iz trolejbuskog terminala KJKP "Gras" u park ispred zgrade Općine Novi Grad, nakon čega je urađena njihova zaštita i konzervacija. Ta aktivnost realizirana je u saradnji sa JU "Muzej Sarajeva", a uz saglasnost Zavoda za zaštitu kulturno-historijskog i prirodnog naslijeđa Kantona Sarajevo.

Park je obogaćen moderno dizajniranim klupama i pješačkom stazom, a postavljene su i korpe za otpatke. Bit će postavljen i informativni pano, kako bi se građani mogli informisati o ovom kulturno - historijskom naslijeđu. Cijeli prostor će biti osvijetljen i ograđen.

Projekat se realizira radi promocije kulturno-historijskog naslijeđa i zaštite stećaka od dalje devastacije, te upoznavanja šire javnosti o postojanju srednjovjekovnih nadgrobnih spomenika na području općine Novi Grad Sarajevo.

Nekropola datira iz srednjeg vijeka, a 1991. godine prilikom vršenja arheološkog istraživanja na lokalitetu Kaknja pronađeno je šest grobnih mjesta. Nalazi su tada izmješteni u Zemaljski muzej BiH, a dva preostala stećka su prenesena na takozvanu lokaciju „Kakanj - Švrakino Selo", tj. trolejbuski terminal, u blizini zgrade Općine.

Izgradnjom ovog arheološkog parka, građani Sarajeva, ali i gosti, imat će priliku saznati više informacija o nadgrobnim spomenicima, ali i sjesti i odmoriti se u lijepo uređenom prostoru.



Crteži Mevludina Ekmečića "Genocid nad Bošnjacima 1992-1995."

Posjetioci Galerije Općine Novi Grad imali su priliku pogledati crteže Mevludina Ekmečića "Genocid nad Bošnjacima 1992-1995".

Crteži Mevludina Ekmečića predstavljaju hroniku stradanja Bošnjaka u periodu od 1992-1995. godine, nastalu tokom agresije na Bosnu i Hercegovinu, kada umjetnik, prisiljen da napusti zemlju, u izgnanstvu preuzima ulogu ilustratora - hroničara, te uvjerljivo, temeljito i eksplicitno dokumentira patnje svojih sunarodnjaka oslanjajući se na izvještaje očevidaca, snimke i fotografije stranih dopisnika. Stvaralački čin, kao reakcija na destrukciju i barbarstvo, tako postaje manifestacija snage duhovnog otpora i vjere u trijumf čovječnosti.

Izložba je dio stalne umjetničke postavke Bošnjačkog instituta – Fondacija Adil Zulfikarpašić.



Umjetnička djela Taiba Kovača u Centru za kulturu Dobrinja

U Centru za kulturu Dobrinja, vila Hadžihalilovića, posjetioci su mogli pogledati umjetnička djela bh. slikara Taiba Kovača, gdje je izloženo oko trideset njegovih radova, od pejzaža do portreta, rađenih u tehnikama ulje na platnu, akvarela, akrila na platnu i suhog pastela. Izložba je otvorena uz prisustvo velikog broja posjetilaca, a o samom autoru i nastanku njegovih umjetničkih djela govorila je Senada Kadribašić, književnica i slikarka.

Taib Kovač član je Udruženja bosanskih umjetnika. Rođen je 1959. godine, u mjestu Tjentište, Općina Foča. Od 1973. godine živi i radi u Sarajevu. Od svoje mladosti pokazivao je ljubav prema umjetnosti, ali se posebno isticao talenat i sklonost prema slikarstvu. Teme koje prevladavaju u Taibovom radu su urbane tematike, sa fokusom na monumentalne građevine iz bosanskohercegovačkog kulturnog nasljeđa.



Predstavljena umjetnička djela Samira Godinjaka

Prva samostalna izložba umjetničkih djela autora Samira Godinjaka otvorena je u Centru za kulturu – vila Hadžihalilovića na Dobrinji. Predstavljanje Godinjakovih umjetničkih djela upriličeno je uz prisustvo brojnih ljubitelja ove vrste umjetnosti, autorovih prijatelja i profesora Dobrinjske gimnazije koju je pohađao, te predstavnika Općine Novi Grad Sarajevo.

Izložba predstavlja tridesetak umjetničkih djela rađenih slikarskom tehnikom ulje na platnu.

Samir Godinjak, tridesetjednogodišnji Dobrinjac, ljubav prema slikarstvu počeo je prenositi u umjetnička djela prije šest godina, baveći se time rekreativno. Do sada je, kaže, naslikao više od 300 umjetničkih slika među kojima dominiraju pejzaži.

Njegova umjetnička djela uglavnom oslikavaju prirodu, pejzaže koji teže realizmu. „Počeo sam sa apstrakcijama i akrilnim bojama, a kada sam počeo raditi sa uljanim bojama shvatio sam da one pružaju više, da su kontrasti boja jači i tada sam se posvetio realizmu. Lijepo je kada nešto vidite u prirodi i svom okruženju, a da pri tome imate mogućnost da to prenesete na platno tačno onako kakvo je u prirodi. To je nešto što me najviše privuklo realizmu“, naglašava Godinjak. Dodaje da je talenat za slikarstvo važan, ali da nije presudan za

uspjeh u ovoj oblasti umjetnosti. "Ukoliko imate motiv i želju za slikanjem sve se može naučiti radom i trudom, jer nije dobar slikar samo onaj ko ima talenta. Treba raditi i učiti, to je ono što će sigurno rezultirati uspjehom", zaključuje Samir Godinjak.





Novogradski đaci proširuju znanje o kulturno - historijskom nasljeđu Sarajeva i BiH

Više od hiljadu učenika sedmog razreda osnovnih škola s područja općine Novi Grad i ove školske godine imali su priliku posjetiti institucije kulture, sa kojima Općina Novi Grad Sarajevo ima potpisan sporazum o saradnji u oblasti umjetnosti, kulture i obrazovanja.


U pratnji nastavnika i predstavnika Službe za obrazovanje, kulturu i sport, đaci su posjetili Gazi Husrev-begovu biblioteku, depandans Javne ustanove Muzej Sarajeva - Svrzinu kuću, koja je svojevrsni muzej bosanske arhitekture iz osmanskog perioda, zatim Bošnjački institut – Fondacija Adila Zulfikarpašića i Zemaljski muzej BiH, gdje su vidjeli muzejska odjeljenja sa naučnim zbirkama iz botanike, geologije i zoologije, te unikatne spomenike materijalne i duhovne kulture.

Svoje utiske sa nama su podijelili Lana Zahirović i Hamza Mujić, učenici sedmog razreda Osnovne škole „Skender Kulenović“. Ističu oduševljenje druženjem i posjetom kulturnim institucijama, a posebno Bošnjačkim institutom – Fondacija Adila Zulfikarpašića, u kojem su bili prvi put. Također im se sviđa i Botanički vrt, po kojem je Zemaljski muzej BiH prepoznatljiv, a koji postoji još od 1912/13

godine, gdje se uzgaja oko 1.700 vrsta biljaka sa nekoliko hiljada jedinki, od kojih oko 750 primjeraka drveća i grmlja, a ostalo su višegodišnje i jednogodišnje biljke.

Posjeta institucijama kulture prilika je da učenici pogledaju bogato kulturno blago i upoznaju se o važnosti kulturne baštine Grada Sarajeva i BiH. Kustosi su ih putem edukativnih predavanja upoznali sa neprocjenjivim naučnim i kulturno-historijskim bogatstvom koje se bržno čuva u institucijama, te im približili šaroliku i bogatu kulturnu prošlost naših naroda. Na taj način proširili su znanje o znamenitostima institucija koje su od kulturnog i historijskog značaja za glavni grad i državu Bosnu i Hercegovinu.

Projekat se realizira putem Službe za obrazovanje, kulturu i sport Općine Novi Grad Sarajevo s ciljem podizanja svijesti učenika o značaju i važnosti kulturne baštine Grada Sarajeva i BiH, kao i njihovo lično upoznavanje sa kulturno-historijskim nasljeđem. Za učenike i njihove nastavnike Općina je osigurala prevoz od škola do institucija i nazad.





Centar za kulturu na Dobrinji: "Osman Nuri Hadžić" - izložba o liku i djelu istaknutog bh. književnika

U Centru za kulturu - vila Hadžihalilovića, 20. septembra, upriličeno je otvorenje izložbe posvećena liku i djelu bh. književnika Osmana Nuri Hadžića, čije ime nosi jedna od novogradskih osnovnih škola. Izložba, čiji su autori Narcisa Puljek - Bubrić i Sanjin Hatibović realizirana je u saradnji Bošnjačkog instituta – Fondacija Adila Zulfikarpašića i Općine Novi Grad Sarajevo, a u okviru projekta "Ime moje škole".

Otvaranju su prisustvovali direktor, učenici i nastavnici škole "Osman Nuri Hadžić", te predstavnici Općine i Bošnjačkog instituta i drugi gosti, a prisutnim posjetiteljima dobrodošlicu je poželjela Selma Serdarević, šefica Odsjeka za kulturu i obrazovanje Službe za obrazovanje, kulturu i sport Općine Novi Grad Sarajevo.

Serdarević je kazala da osnovne škole u općini Novi Grad nose nazive po imenima brojnih istaknutih ličnosti bosanskohercegovačke historije i kulture, Maka Dizdara, Osmana Nurija Hadžića, Džemaludina Čauševića, Behaudina Selmanovića i drugih. Istakla je da projekat "Ime moje škole" promovira njihov stvaralački rad kroz tematske izložbe, koje su posvećene njihovim dostignućima i doprinosu našem društvu i kulturi.

Amina Rizvanbegović, direktorica Bošnjačkog instituta - Fondacija Adila Zulfikarpašića naglasila je važnost projekta koji se provodi s ciljem da se učenici kroz vizuelnu postavku, prilagođenu njihovom dobu, upoznaju sa ličnostima po čijim imenima su škole dobile nazive.

Hadžićev rad predstavljen je na deset panoa, od kojih svaki predstavlja različitu temu, biografiju, njegov rad kroz književni opus, opus o kulturnoj historiji i islamu Bosne i Hercegovine i njegovu saradnju u bh. štampi. U bosanskohercegovačkoj i bošnjačkoj historiji i kulturi Osman Nuri Hadžić ostao je upamćen kao reformator, prosvjetitelj, književnik i sakupljač narodnih predanja. Bilo bi gotovo nemoguće zamisliti bosanskohercegovačku kulturu bez njegovog književnog i kulturnog stvaralaštva.

Izložba "Osman Nuri Hadžić" organizirana je s namjerom da se učenici upoznaju o životu i književnom i kulturnom djelovanju ovog istaknutog pisca i prosvjetitelja.



Umjetnička djela dr. sc. Suvade Borić - Šaćiragić u Galeriji Novi Grad

Galerija Općine Novi Grad Sarajevo mjesto je gdje se mogla pogledati samostalna izložba dr. sc. Suvade Borić - Šaćiragić "U potrazi za izgubljenim bosanskohercegovačkim pejzažom".

Suada Borić - Šaćiragić profesorica je bioloških nauka, doktorirala je ekologiju i zaštitu životne sredine, što ju je inspirisalo da kroz umjetnička djela sačuva prekrasne bh. krajolike. U vremenu kada ljudskim nemarom nestaju naši planinski pejzaži, naše rijeke i jezera, autorica je odlučila da na svojim platnima zadrži ono najljepše iz bh. prirode. To su planinski pejzaži, pejzaži sa jezera, sa rijeka, pejzaži koji su tu još uvijek i nisu uništeni, ali i oni koji su davno nestali. Na izložbi je predstavljeno 35 umjetničkih djela, izvedenih u tehnici ulje na platnu.

Izložba je otvorena uz prisustvo velikog broja ljubitelja umjetnosti, predstavnika kulturnog i javnog života i medija, a dobrodošlicu je prisutnim posjetiteljima poželjela Fahra Zvizdić, šefica Odsjeka u Službi za obrazovanje, kulturu i sport Općine Novi Grad Sarajevo. Prisutnima se obratila i autorica izložbe Suvada Borić - Šaćiragić, kao i mladi akademski kipar Adis Lukač.

„Priroda je moja ljubav, priroda je najslinija ženi, jer priroda kao i žena rađa, regeneriše, daje novi život. Iz tog razloga sam, jednostavno, iskonski povezana sa prirodom. Danas, kada vidim na koji način nestaju prekrasni pejzaži, ja sam odlučila da na svojim platnima zadržim ono najljepše iz prirode BiH. To su pejzaži koji su tu još uvijek, ali i oni koji su odavno nestali. Primjer toga je slika Gatačkog polja, to je pejzaž kojeg sam zapamtila još od prije 35 godina, a tek sam ga nedavno naslikala. Isto tako, i Prokoško jezero, i rijeku Doljanku, to je sve ono što odlazi", kazala je dr. Borić - Šaćiragić, ističući zahvalnost Općini i načelniku Semiru Efendiću, koji joj je omogućio da svoja umjetnička djela izloži u jednom prelijepom prostoru, gdje je, kako je istakla, po prvi put u jednom prostoru sagledala svoja djela.

Ovom izložbom autorica Borić - Šaćiragić želi poslati poruku svima nama da čuvamo i sačuvamo prirodne ljepote i našu prelijepu Bosnu i Hercegovinu za buduće generacije.

U programskim sadržajima uživalo oko 25.000 građana

U okviru manifestacije održani koncerti zabavne, klasične i duhovne muzike, pozorišne predstave za djecu i odrasle, razne izložbe, književne i pjesničke večeri, filmske projekcije, druženja i izleti, međunarodni festival folklor, te brojni drugi kulturni i sportski sadržaji

Ovogodišnja 23. tradicionalna manifestacija „Novogradski dani 2019.“ okupila je veliki broj učesnika, a u raznovrsnim programskim sadržajima uživalo je više od 25.000 građana različite starosne dobi, posebno omladine sa područja općine Novi Grad Sarajevo, ali i iz drugih općina Kantona Sarajevo.

Održano je 38 kulturno - zabavnih manifestacija i sportskih manifestacija na 20 lokacija na području naše općine. Posebna pažnja, u programskom smislu, bila je posvećena penzionerima i najmlađoj populaciji. Građani su mogli uživati u koncertima zabavne, klasične i duhovne muzike, pozorišnim predstavama za djecu i odrasle, raznim izložbama, književnim i pjesničkim večerima, druženju, te brojnim drugim kulturnim i sportskim sadržajima.

Najposjećeniji su bili koncert duhovne muzike, Internacionalni festival folklor, večer modernog plesa, koncert Dženana Lončarevića i Porodični dan.

Na sportskim terenima održana su domaća i međunarodna takmičenja u sjedećoj odbojci, odbojci na pijesku, fudbalu rukometu, košarci u kolicima, taekwondou, karateu, boksu, atletici, šahu, plivanju, kao i takmičenja u plesu i strljaštvu. Na sportskim takmičenjima učestvovalo je oko 230 ekipa iz 300 klubova sa 4.000 takmičara koji su se takmičili u 80 disciplina.

U okviru manifestacije realiziran je i Program obilježavanja značajnih događaja i ličnosti iz perioda odbrambeno - oslobodilačkog rata 1992 - 1995. i NOR-a 1941 - 1945.

Orkestar Muzičke akademije oduševio novogradsku publiku

Repertoarom W. A. Mozarta, J. Haydna i drugim djelima klasicizma, orkestar Muzičke akademije Univerziteta u Sarajevu pod dirigentskom palicom Emira Mejremića, oduševio je posjetioci koncerta koji je održan u multimedijalnoj sali Općine Novi Grad Sarajevo.

Preciznom izvedbom, ujednačenim orkestrom koji je činilo više od 50 studenata Akademije vođenim senzibilitetom proslavljnog bosanskohercegovačkog dirigenta, posjetioci su uživali u svakoj kompoziciji jednosatnog koncerta.

Hiljade ljudi na koncertu Dženana Lončarevića na Dobrinji

U okviru „Novogradskih dana 2019.“ Dženan Lončarević održao je koncert na platou ispred sportske dvorane Dobrinja. Na koncertu je bilo više hiljada ljudi koji su s njim uglas pjevali neke od njegovih najvećih hitova.

I tom prilikom Dženan je pokazao zašto je jedan od omiljenih pjevača u regionu.

Posebnu atmosferu podigao je svojim najnovijim singlovima "Piješ sine" i "Ako pitaš".

Na Dženanovom repertoaru našle su se i pjesme "Putnička", "Nikome ni riječ", "Dao sam ti srce", "Cvijete bijeli", "Kazino", "Laku noć", "Pamuk usne", ali i popularne pjesme drugih izvođača koje Dženan nerijetko izvodi na svojim nastupima.



Publika uživala uz Muzaferiju, hafiza Alilija i hor „Hamza“

Koncert duhovne muzike, trećeg dana Bajrama upriličen je u Centru za edukaciju, sport i rekreaciju „Safet Zajko“. Na kamenoj bini, u zelenoj oazi Centra, nastupili su poznati interpretatori duhovne muzike iz BiH i regiona, koji su se predstavili autorskim ilahijama, ali i drugim pjesmama.

Koncert je upotpunjen plesom derviša tesavvufskog ansambla, a nastavljen emotivnim izvedbama bosanskohercegovačkog pjevača Armina Muzaferije, koji nije krio oduševljenje ambijentom, ali i sreću što sa svojim kolegama i prijateljima novogradskoj publici uljepša treći dan Bajrama.

Prisutni su imali priliku poslušati i duet Armina Muzaferije i jednog od najboljih učača ilahija i Kur'ana - hafiza Aziza Alilija, koji je iz Zagreba doputovao kako bi uživao u junskoj noći duhovne muzike u općini Novi Grad.

Nekadašnji hor "Hazreti Hamza", danas hor "Hamza" za općinu Novi Grad vežu posebne emocije, s obzirom da je hor nastao ratne 1993. godine na Alipašinom Polju.



KUD "Preslica" iz Zagreba pobjednik Internacionalnog festivala folklor i tradicionalne muzike

Nakon revijalne večeri na kojoj se predstavilo više od 300 takmičara iz Republike Turske, Makedonije, Srbije, Crne Gore i Hrvatske, te Novog Grada Sarajevo, koji su igranjem i pjevanjem predstavili tradiciju, kulturu i običaje svoje zemlje, u prepunom Centru "Safet Zajko" proglašeni su i najbolji predstavnici 5. Internacionalnog festivala folklor i tradicionalne muzike.

Prema ocjenama stručnog žirija u sastavu prof. dr. Husein Zvrko, Faruk Alkaya, Izabela Angelova, Sejo Mandić, Hamza Yavuz, Nada Tuškan, na čelu sa profesoricom Anom Babić, ocjenjivale su se etnološke norme, tradicijsko predstavljanje, scenski nastup i prezentacija kroz muzikološki aspekt.

Uzimajući u obzir navedene kriterije, žiri je najboljim proglasio KUD "Preslicu" iz Zagreba.

Drugo mjesto na ovogodišnjem Festivalu osvojio je KUD "Radoviš" iz Makedonije, a treće mjesto pripalo je Kulturno- umjetničkom društvu "Saobraćajac" iz Sarajeva.

Posebna nagrada pripala je predstavnicima Republike Turske, koji su svojim energičnim nastupom oduševili posjetioce Centra.

"Princeza na zrnju graška" oduševila novogradske mališane

Nakon što je premijerno izvedena u Pozorištu mladih u Sarajevu, predstavu "Princeza na zrnju graška" predstavljena je i mališanima općine Novi Grad Sarajevo u okviru manifestacije "Novogradski dani 2019."

Predstava je prilagođena djeci, kao i gluhim i nagluhim osobama, a glavna poruka je da u njihovom odgoju treba postavljati granice, učiti ih odgovornosti prema sebi i drugima.

U predstavi su igrali Ida Keškić, Mario Drmać, Belma Lizde Kurt, Mirza Dervišić i Aldin Tucić, u filmovanom dijelu glume Alma Merunka, Ajla Cabrera, Narda Nikšić i Suada Ahmetašević, a audio deskripciju izvodi Elma Ahmeto.



Poetska večer u Centru za kulturu Dobrinja posvećena Sergeju A. Jesenjinu

U ugodnom ambijentu bašte Centra za kulturu - vila Hadžihalilovića održana je književna večer posvećena poeziji Sergeja Aleksandroviča Jesenjina. Poetsku večer priredilo je Udruženje građana "Behar" u saradnji sa Općinom Novi Grad Sarajevo.

Stihove Jesenjinovih pjesama, praćene zvucima gitare, kazivali su Izet Mujezin, Jasna Primorac, Šejla Jelić, Selma Hujdurović i Lamija Mujezin, a za muzički dio programa pobrinuli su se profesor gitare Enes Ibričević i Mario Pejić, koji je bio zadužen za vokal.

O Sergeju A. Jesenjinu, pjesniku imažinizma, govorio je Izet Mujezin. „Jesenjin je jedna vrlo zanimljiva pjesnička pojava, i danas se njegova djela smatraju civilizacijskom baštinom. To je pjesnik koji je u svom 30-godišnjem životu iza sebe ostavio snažno djelo. Ono što je specifično za njega je da je to pjesnik u čijim pjesmama se osjećao njegov fatalni kraj. Njegove pjesme uglavnom su tužne. Jednom takvom emotivcu, čovjeku koji je svijet doživljavao na jedan specifičan način, željeli smo posvetiti jedno veče“, kazao je Mujezin, koji i sam piše poeziju, a iza njega je veliki broj pjesama.

S obzirom na to da je Jesenjin za svog života nosio leptir-mašnu i pušio lulu, u okviru programa promovisana je i knjiga "Mašne", te predstavljena kolekcija kreacija leptir-mašni, autora Radoslava Raše Marjanovića, kao i kolekcija lula Ante Vrankića.

Marjanović i Vrankić govorili su o lulama i leptir-mašnjama, kao ukrasnim detaljima, modnim dodacima i statusnim simbolima pretežno muške populacije, njihovom značenju u modnoj kulturi muškaraca sa stilom i ukusom, te tradiciji sarajevskih džentlmena. Muzičko-poetski performans upotpunjen je kompozicijama u duhu ruske muzike, a kazivanja svake pjesme praćena su muzičkim motivima ruskog podneblja.



Izložba skulptura i crteža Jagode Buić

Posjetioci Galerije Općine Novi Grad Sarajevo imali su priliku pogledati izložbu skulptura i crteža Jagode Buić, svjetski afirmisane umjetnice i dobitnice mnogih priznanja. Radovi, predstavljeni izložbom, ranije su bili izlagani u Umjetničkoj galeriji BiH, na izložbi povodom prijema Jagode Buić u Akademiju nauka i umjetnosti Bosne i Hercegovine. Jagoda Buić svoje radove iz ovog ciklusa opisuje riječima: „To nije objekt trouvée – to je lotani kolaž od željeznog otpada. Igra. Šala. On će se tek svojim portretom pokušati progurati u sferu umjetnosti. Ako ne uspije, ostaje moja poruka: nema tog odbačenog predmeta koji neće naći svoje mjesto. Zašto? Radi iluzije. Radi fantazije. Objekt i njegov portret je lirski esej u kojem se sreće

tuga napuštenosti, beznađe nepotrebnosti, s radošću kreativnog akta i veselom ironijom.“


Jagoda Buić rođena je u Splitu. Studirala je na Akademiji primijenjenih umjetnosti i dizajna te povijesti umjetnosti na Sveučilištu u Zagrebu. Diplomirala je na Akademie für angewandte Kunst u Beču. Studirala je filmsku scenografiju u Cinecittà u Rimu i povijest kostimografije u Centro delle Arti e del costume u Palazzo Grassi u Veneciji. Realizirala je više od 120 projekata kao kostimografkinja i scenografkinja za opere, balete, drame i filmove u različitim zemljama. Najpoznatija su joj ostvarenja: Hamlet, Kralj Lear, Otello, Sofoklove i Eschilove tragedije i opere poput: Turandot, Otello, Tosca, Nabucco, Aida itd.



Izložba ilustrovanih citata Alije Izetbegovića “Poruka sebi”

Centar za kulturu Dobrinja - vila Hadžihalilovića bilo je mjesto gdje se mogla pogledati izložba ilustrovanih citata Alije Izetbegovića “Poruka sebi”.

Urednica zbirke Nađa Berberović – Dizdarević bilježila je citate koji su za nju bili značajni, pa je tako i nastala zbirka. Citati su obogaćeni ilustracijama mlade umjetnice Džejlane Pašić, kako bi se na taj način približili svim generacijama i pokazali da se radi o univerzalnim idejama.



Direktor Muzeja „Alija Izetbegović“ Adnan Žiško izrazio je zadovoljstvo što se izložba realizirala na području općine Novi Grad Sarajevo, a posebno u Centru za kulturu Dobrinja - vila Hadžihalilovića, u kojoj se od otvaranja pa sve do danas kvalitetno radi na promociji kulturoloških normi i umjetnosti, kao i edukaciji mladih.




Izložba Zemaljskog muzeja BiH „Moje mjesto je ovdje“

Izložba Zemaljskog muzeja BiH - “Moje mjesto je ovdje” mogla se pogledati u Galeriji Općine Novi Grad, gdje su bili izloženi predmeti poklonjeni Odjeljenju za etnologiju u periodu od 2005. do 2019. godine.

Utemeljenje i razvojni put zbirke Odjeljenja za etnologiju može se pratiti od osnivanja Zemaljskog muzeja BiH - 1888. godine. U periodu od 130 godina rada Zemaljskog muzeja Bosne i Hercegovine dostigle su broj od oko 20.000 predmeta, podijeljenih u 17 tematskih zbirki u odsjecima za materijalnu i duhovnu kulturu. U Folklornom arhivu Zemaljskog muzeja BiH čuva se više hiljada različitih dokumenata u vidu zapisa, rukopisa i druge arhivske građe donesene sa terenskih istraživanja, kao i ilustrativna građa (foto ploče, negativi, fotografije, crteži, video i tonski zapisi).

Utemeljitelj zbirke Odjeljenja za etnologiju bio je ujedno i prvi kustos Zemaljskog muzeja BiH, dr. Ćiro Truhelka. Početnu zbirku činili su proizvodi sarajevskih zanatlija koje su članovi Muzejskog društva otkupili s namjerom da kulturno naslijeđe Bosne i Hercegovine javnosti bude predstavljeno na svjetskim izložbama, poput onih u Beču, Parizu, Budimpešti i drugim velikim centrima u tadašnjoj Evropi.





Arhivska građa Senada Šabovića "STEĆCI - Kulturna baština BiH"

Posjetioci Centra za kulturu Dobrinja - vila Hadžihalilovića imali su priliku pogledati izložbu originalne arhivske građe Senada Šabovića "STEĆCI - Kulturna baština Bosne i Hercegovine". Šabović je osnivača i direktora Fondacije „Stećak u Bosni i Hercegovini“, a kroz desetogodišnji period sakupio je oko 6.000 arhivskih jedinica. Odnose se na naše najistaknutije istraživače stećaka, u prvom redu Šefika Bešlagića, a potom Nede Miletić, Čire Truhelke, Ranka Rosića, Toše Dabca, Mirjane Ljubinković – Čorović, Stjepana Gunjače i drugih brojnih naučnih i kulturnih radnika iz bivše Jugoslavije. Među najznačajnijim arhivskim dokumentima nalazi se i rukopis popisa stećaka sa područja Bosne i Hercegovine, a koji je korišten kao materijal za knjigu „Stećci - kataloško - topografski pregled. Na izložbi su predstavljani originalni arhivski dokumenti i fotografije na 20 panoa, na svakom panou predstavljena je po jedna nekropola. Uz to, posjetitelji će imati priliku pogledati i 20 crno - bijelih fotografija stećaka sa raznih lokaliteta u Bosni i Hercegovini. Glavni donator pomenute građe je porodica Bešlagić koja je poklonila rukopisnu zaostavštinu, fotografije i lične predmete Šefika Bešlagića. Uz porodicu Bešlagić, donatori su i prof. dr. Besim Špahić i Mladen Miloradović. Najveći dio arhivske zbirke se odnosi na Šefika Bešlagića i njegov naučno-istraživački rad na evidentiranju, popisu, zaštiti i popularizaciji stećaka. U okviru Zbirke koja broji oko 6.000 arhivskih jedinica, nalazi se i dokumentarna građa nastala radom mnogih drugih naučnih i kulturnih radnika.

Na samitu UNESCO-a u Istanbulu, 2016. godine donesena je Odluka o upisu stećaka na Listu svjetske kulturne baštine. Na listi se nalazi ukupno 28 nekropola, od kojih se 20 nalaze na teritoriju Bosne i Hercegovine, dok su po tri na području Srbije i Crne Gore i dvije na teritoriji Hrvatske.

Iako je današnjoj javnosti manje poznato, prvu inicijativu za nominaciju stećaka na Listu svjetske kulturne baštine pokrenuo je upravo Šefik Bešlagić, kojem bez sumnje pripada dio zasluga za cjelokupnu valorizaciju značaja stećaka. Stoga sadržaj izložbe, uglavnom se odnosi na rad Šefika Bešlagića nakon njegovog odlaska u penziju.



GRAĐANIMA NA RASPOLAGANJU JOŠ JEDAN SADRŽAJ U CENTRU „SAFET Zajko“

Otvoren prvi adrenalin park u glavnom gradu BiH

Na radost zaljubljenika u adrenalin sportove u kompleksu Centra za edukaciju, sport i rekreaciju „Safet Zajko“ otvoren je prvi adrenalin park u glavnom gradu BiH. Jedinstven je zbog samog ambijenta u kojem se nalazi, a staza koja je rađena između stabala ne može se naći nigdje drugo.

Uz tornjeve na kojima su alpinističke stijene, ljubiteljima adrenalina sportova na raspolaganju je i devet zračnih atrakcija s različitim preprekama. Prepreke su postavljene tako da postojeća stabla povezuju s dva tornja, a posjetitelji mogu probati i zip-line, spuštanje niz žicu.

Otvaranje adrenalina parka upriličeno je uz pokazne vježbe koje su izveli pripadnici Gorske službe spasavanja Novi Grad, a uz podršku profesionalnih instruktora za obuku i korištenje adrenalinskih atrakcija, te pokaznu vježbu pružanja pomoći uz podršku ekipa Crvenog krsta/križa Novi Grad i Službe civilne zaštite Općine Novi Grad. Veliku podršku u radu sa onima koji su odmah po otvaranju željeli isprobati adrenalin park dali su sportski penjači Ajdin Hadžić i Bakir Silajdžić koji se pripremaju za olimpijadu u sportskom penjanju u Tokiju 2020. godine.

Riječ je o adrenalin parku, prvom ovakve vrste u Sarajevu i šire sa tzv. evropskim N standardom za adrenalin parkove.

U kompleksu Centra „Safet Zajko“ Općina novi Grad je izgradila mnogo sadržaja, a najviše igrališta za djecu. Adrenalin park je namijenjen tinejdžerima i omladini koji žele da se na jedan poseban način riješe stresa i koji vole adrenalin. Poznato je da su adrenalin atrakcije vrlo privlačne turistima.

Za sigurnost ljudi koji žele da probaju adrenalin sport brinut će stručni tomovi Gorske službe spasavanja Novi Grad. Rukovodilaca GSS-a Fahrudin Dobrača kaže da ova vrsta sporta doprinosi savladavanju stresa.

„Radimo konstantno na bezbjednosti naših korisnika, želimo da se svaki građanin koji želi da proba adrenalinski sport osjeća sigurno. Rijetkost je da u urbanom dijelu grada građani imaju mogućnost korištenja adrenalinskih sportova, naša omladina ima mogućnost doći ovdje da osjeti adrenalin“, kazao je Dobrača.





U Centru „Safet Zajko“ otvorena prva atletska teretana u BiH

Glavni grad Bosne i Hercegovine nedavno je dobio prvu atletsku teretanu, izgrađenu u Centru „Safet Zajko“ u općini Novi Grad. Specijalizirana atletska teretana ima dvije savremeno opremljene sale za profesionalni i rekreativni trening sa atletskom stazom dugom 50 metara, moderno opremljene svlačionice, a ukupna investicija rekonstrukcije i opremanja prostora iznosila je 150.000 KM.

Stavljanjem u funkciju jednog ovakvog objekta sportistima je omogućeno da rade sprinterske, bacačke i skakačke discipline i tokom zimskih i kišnih dana.

Atletski klub Novi Grad našao je svoj dom u Centru „Safet Zajko“ gdje je izgrađena prva atletska staza u ovom dijelu grada, nakon čega ja atletika u našoj općini krenula uzlaznom putanjom. Na tom putu, atletičari su imali problem treniranja tokom zimskog perioda. Ideju da se jedan od devastiranih objekata u sklopu Centra „Safet Zajko“ iskoristi za izgradnju atletske teretane, Općina je odmah prihvatila, jer na prostoru ove lokalne zajednice ima veliki broj profesionalnih sportista, koji mogu ostvariti značajne sportske rezultate, ukoliko im se osiguraju kvalitetni uslovi i pretpostavke za njihovo ostvarenje.

Izgradnja teretane finansirana je sredstvima koja su Atletskom klubu Novi Grad dodijeljena kroz projekat zapošljavanja mladih (YEP), a koji se realizira u saradnji sa Organizacijom u saradnji i udruživanju finansijskih sredstava sa njemačkom razvojnom konsultantskom kompanijom GOPA, a u saradnji sa Švicarskom vladom i Općinom Novi Grad Sarajevo.

Na konkursu na koji se prijavilo više od 70 aplikacija, Atletski klub Novi Grad, kao jedan od učesnika u Projektu YEP- Inkubator poslovnih ideja, sa idejom „Atletika za sve generacije i varijacije“, ocjenjen je najboljom ocjenom Stručne komisije, što će dokazati i „Počasna nagrada“ koju je ovaj klub osvojio i na takmičenju ideja za razvoj atletike pod organizacijom Evropske atletske federacije. Cilj je od samog početka bio okupiti širu populaciju, te atletici kao osnovi svake kretnje dati zasluženu ulogu u životu svakog pojedinca, kažu u AK „Novi Grad“ ističući da će novootvorena atletska teretana, konačno, omogućiti kontinuitet u vježbanju svima što je svojevrsni garant dobrih rezultata.



Rekreativna biciklistička trka „Vozim za nekoga sa autizmom“

Općina Novi Grad Sarajevo u saradnji sa Udruženjem za unapređenje obrazovanja i podrške djeci sa i bez poteškoća u razvoju EDUS organizirali su rekreativnu biciklističku trku pod sloganom „Vozim za nekoga sa autizmom“.

Vožnji biciklima od zgrade RTV doma do Centra „Safet Zajko“ su se pridružile brojne javne ličnosti, sportisti i rekreativci, među kojima i naš košarkaš, predsjednik Košarkaškog saveza BiH Mirza Teletović sa porodicom, kao i brojni građani, a u parku Centra „Safet Zajko“ nastavljeno je druženje uz prigodan program koji je za mališane, ali i druge prisutne građane priredio Latif Močević i „Mravko Travko“. Cilj organiziranja ovakvog događaja, u vremenu brzog tempa života, kada sve više gubimo osjećaj za druge i drugačije, je da ispričamo javnosti da se može voziti i živjeti sa djecom sa autizmom, te djeci dati do znanja da nisu sami i da ih podržavamo u svemu što rade. Mirza Teletović koji se ovom događaju pridružio sa suprugom i djecom, istakao je značaj prisustva njegove djece ovom događaju. „Važno je da djeca i mladi ljudi znaju važnost ovakvih događaja, da se širi pozitivno razmišljanje o ovakvim projektima kojima pokazujemo solidarnost i podržavamo rad sa djecom. Jako je bitno da se ovakvi projekti prepoznaju i da se nastave u kontinuitetu, ne samo jednom godišnje“, kazao je Mirza.



Nove sportske plohe, koševi, golovi...



REKONSTRUISANO IGRALIŠTE U ULICI ANTUNA BRANKA SIMIĆA

Na prostoru općine Novi Grad Sarajevo u toku je rekonstrukcija i izgradnja sportskih igrališta. U okviru projekta za koji je iz općinskog budžeta za 2018. godinu izdvojeno oko 150.000 KM bit će obnovljeno osam sportskih igrališta.

Radnici KJKP „Rad“ zamijenili su dotrajale ivičnjake, uklonili staru asfaltnu plohu i koševе, te izvršili asfaltiranje sportskih ploha, a u toku je iscrtavanje sportskog terena, kao i pripreme za postavljanje koševa, golova i drugog mobilijara. Na igralištima će biti postavljene i nove klupe i korpe za otpatke.

Rekonstrukcijom su obuhvaćena igrališta u ulici Antuna Branka Šimića, u Starom Hrasnom, zatim igrališta u ulici Nerkeza Smailagića, u B-fazi Alipašino Polja, u ulici Grada Kalgarija, u MZ „Dobrinja-D“, Trg Sabora Bosanskog, u MZ „Dobrinja-B“, Nurije Pozderca, u MZ „Dobrinja - C“, kao i igrališta u ulici Salke Lagumdžije, u MZ „Dobrinja-D“.

Na sportskim igralištima u ulici Bosanskih kraljeva, u Švrakinom Selu, Hekim Oglu Ali-paše, u Mjesnoj zajednici „Ali-pašin Most 1“ sanirana je oštećena ograda.



REKONSTRUISANO IGRALIŠTE U ULICI SALKE LAGUMDŽIJE



REKONSTRUISANO IGRALIŠTE U ULICI GRADA KALGARIJA

Četvrta godišnjica od otvaranja Centra "Safet Zajko" obilježena u znaku druženja, zabave i sporta

Centar za edukaciju, sport i rekreaciju, 21. septembra je obilježio četvrtu godišnjicu od otvaranja. Tim povodom na sportskim terenima održana su takmičenja, a pobjednicima su uručene i nagrade, dok je za mnogobrojne posjetitelje priređen zabavni program.

Održana su takmičenja u bačanju kugle, odbojci na pijesku, tenisu i adrenalinskim sportovima. U takmičarskoj atmosferi koja je vladala od jutarnjih pa do popodnevni sati uživali su, kako takmičari, sportisti, tako i mnogobrojni građani koji su odlučili da ovaj sunčani dan provedu u prelijepom ambijentu najvećeg parka u gradu Sarajevu.

Prisutnim posjetiteljima i takmičarima dobrodošlicu je poželio načelnik Općine Novi Grad Sarajevo Semir Efendić istakavši, da je Centar „Safet Zajko“ postao omiljeno mjesto za druženje, sport i rekreaciju u Novom Gradu, ali i šire, iako nije prošlo puno vremena od njegovog otvaranja. Centar sa svojim sadržajima nešto je najbolje što se moglo uraditi za naše građane. Mi kontinuirano radimo na otvaranju novih sadržaja, nedavno smo otvorili adrenalinski park, a ubrzo ćemo otvoriti i igralište za našu najmlađu djecu uzrasta od tri do šest godina Također, uskoro će se raditi i obnova dva objekta, u jednom će se graditi hotel za sportiste, a u drugom centar za edukaciju, kulturne i muzejske sadržaje“, kazao je načelnik Efendić.



TENISKI KLUB
Kontakt telefon:
062 858 140
061 328 628





Nagrade za najuspješnije sportiste

Za ovu priliku, najuspješnijim takmičarima dodijeljene su simbolične nagrade. U bacanju kugle najbolji rezultat postigao je Asmir Kolašinac, prvak Evrope u bacanju kugle. Na drugo mjesto plasirao se Kemal Mešić, naš dvostruki olimpijac, dok je trećeplasirani Nermin Šitkovic, inače, junior peti u svijetu.

Među 16 teniseru kadetskog uzrasta koji su se danas takmičili, najuspješniji je bio Amar Silajdžić, reperezentativac BiH u kategoriji do 14 godina, dok je drugo mjesto osvojio Emir Bajić, a treće Bakir Škrijelj.

U odbojci na pijesku nastupilo je deset ekipa iz Sarajeva, Breze i sa Pala. Prvo mjesto osvojile su ekipe Odbojkaškog kluba „Ort“ Ena Sobo i Azra Osmanović, drugoplasirane su odbojkašice OK „Ilidža“ Nora Maslo i Amila Bećirbegović, dok su treće mjesto osvojile Nađa Hadžiosmanović i Irma Bakić, odbojkašice Odbojkaške akademije „Smeč“.

Posebno je uzbuđljiva atmosfera vladala u nedavno otvorenom adrenalin parku, gdje su se takmičile ekipe Gorske službe spasavanja Novi Grad, GSS Ilidža, GSS Prozor i Klub ekstremnih sportova „Unisport“. Među njima najbolji su bili Mahir Suljić i Mirza Mujkić iz GSS-a Novi Grad, drugo mjesto pripalo je Harisu Šariću i Feridu Kadiću iz Kluba ekstremnih sportova „Unisport“. Treće mjesto osvojili su Adi Osmanbegović i Elvir Klačar iz GSS-a Ilidža.





Delegacija Općine i mladi košarkaši Realwaya na velikom turniru u Pesaru

U gradu Pesaro u Italiji koji je pobratim sa Općinom Novi Grad i europska prijestolnica sporta za 2019. godinu, održan je jedan od najboljih košarkaških turnira u Italiji za mlade košarkaše. Na turniru je učestvovalo 150 ekipa i 2.000 mladih košarkaša.

KK Realway Sarajevo koji je 2003. godine osnovan u našoj općini, igrao je u poznatoj dvorani košarkaškog kluba Scavolini, gdje su imali čast da kao učesnici turnira prezentiraju najveću košarkašku porodicu u BIH što Realway danas jeste, Općinu Novi Grad Sarajevo, Kanton Sarajevo, ali i našu državu Bosnu i Hercegovinu.

U Gradskoj vijećnici grada Pesara u Italiji na poziv gradonačelnika grada Pesara Mattea Riccija, upriličen je prijem za delegaciju Općine Novi Grad Sarajevo koju je predvodio načelnik Semir Efendić kao i za predstavnike KK Realway i igrače pionirske ekipe ovog novogradskog kluba.

Općina Novi Grad Sarajevo i Grad Pesaro postigli su dogovor o proširenju dosadašnje saradnje i na oblast sporta. Naša saradnja datira još iz ratnog perioda, kada je ovaj grad primio veliki broj djece bez roditelja, a prošle godine je potpisan ugovor kojim su grad Pesaro i Općina Novi Grad zvanično pobratimljeni.



Još jedan stadion sa umjetnom travom gradi se u Centru „Safet Zajko“

Kompleks Centra „Safet Zajko“ uskoro će dobiti još jedan stadion sa umjetnom travom, svlačionicama i tribinama, dimenzija 70 puta 40. Moći će se koristiti kao tri manja fudbalska terena, a bit će ograđen i osvijetljen za korištenje i u večernjim satima.

Već su završeni zemljani radovi, ugrađeni su ivičnjaci, a u toku je postavljanje vještačke trave. Nakon toga, slijedi postavljanje ograde oko stadiona, a potom i reflektora, te tribina i izgradnja pristupnih staza.

Projektovan je u skladu sa kriterijima za dječiji uzrast do 13 godina i moći će se po potrebi pregraditi zaštitnom zavjesom i koristiti kao više manjih terena za mali fudbal. Stadion će biti u funkciji od proljeća, a u zavisnosti od vremenskih uslova radovi bi mogli biti završeni i prije.

Uporedo sa izgradnjom terena, rade se i svlačionice sa toaletima za korisnike sportskog terena. Bit će smještene u obližnjem objektu čija je sanacija u toku, a koji će biti prilagođen ovoj namjeni.

Centar „Safet Zajko“ otvoren je prije četiri godine i omiljeno je mjesto mnogobrojnih stanovnika Novog Grada, Sarajeva i turista. Godišnje ga posjeti više od 300.000 posjetilaca kojima je na raspolaganju mnoštvo sadržaja, počev od atletske staze, fudbalskih i košarkaških

terena, dječijih igrališta, teniskih i terena za odbojku na pijesku, do šadrvana i klupa za odmor, te drugih sadržaja.

Centar odnedavno krasi i atraktivni kinski paviljon, poklon kineskog grada Tianjina glavnom gradu Bosne i Hercegovine. Uskoro će u ovom kompleksu biti stavljeno u upotrebu još jedno dječije igralište namijenjeno mališanima uzrasta od dvije do 6 godina.



Malonogometni turnir u Centru „Safet Zajko“ u znak sjećanja na herojski put boraca 2. Viteške motorizovane brigade

Povodom obilježavanja 27. godišnjice od osnivanja 2. Viteške motorizovane brigade, Općina Novi Grad Sarajevo i Udruženje 2. Viteška brigada Novi Grad organizirali su 1. fudbalski turnir "Druga viteška" na kojem su nastupili mladi fudbaleri iz osam klubova s područja Kantona Sarajevo.

Turnir je organiziran u znak sjećanja na herojski put kojim su hodili hrabri vitezovi ove brigade, a igra se na fudbalskom stadionu u Centru „Safet Zajko“, koji nosi ime po jednom od komandanata 2. Viteške brigade, zlatnog ljljana i heroja oslobodilačkog rata 1992-1995. godine. Rahmetli Safet Zajko, bio je jedan od komandanata koji su odbranili grad Sarajevo onda kada je agresor namjeravao ovdje počinuti genocid kao u Srebrenici. Ljudi poput Safeta Zajke spriječili su ga u njegovoj namjeri. To trebaju znati mlade generacije, a upravo ovakva druženja kroz igru i sport prilika su da se herojska borba za odbranu naše domovine nikada ne zaboravi.

Turnir je okupio mlade fudbalere iz fudbalskih klubova Željezničar, Novi Grad, Vratnik Sarajevo, Famos - Fair Play sa Ilidže, Unis iz Vogošće, Atletico, Olimpik i FK Dobrinja.

Udruženje 2. Viteška motorizovana brigada baštini i čuva tradiciju na sve ono što je ta brigada radila braneći grad Sarajevo i Bosnu i Hercegovinu od agresora. Pored akademije koju svake godine organizira, želja i namjera ovog Udruženja je da se u sklopu obilježavanja godišnjice brigade dešavaju i druge aktivnosti poput ovog turnira, da se kroz druženje, sport i igru obilježi sjećanje na sve ono što je bila 2. Viteška brigada.



Pehari i medalje najboljim takmičarima

Nakon odigranih utakmica najboljima su uručeni pehari, medalje i diplome. Prvo mjesto osvojio je FK Željezničar, drugo FK Unis, dok je treće mjesto pripalo FK Olimpik Sarajevo.

Za najboljeg strijelca proglašen je Bekto Ali iz FK Olimpik, najboljeg igrača Turković Amir iz FK Željezničar, te za najboljeg golmana Talović Kerim iz FK Olimpik.

Za FAIR PLAY ekipu, pehar i diplomu osvojio je FK Famos Fair Play sa Ilidže.

Nakon proglašenja pobjednika odigrana je i revijalna utakmica veterana 2. Viteške brigade i 1. Slavne viteške brigade.

Malonogometni turnir za sjećanje na ubijenu djecu

Povodom sjećanja na dvadeset petoro djece ubijene tokom agresije na Bosnu i Hercegovinu od 1992-1995. godine sa područja mjesne zajednice „Ali-pašin most 1“ na sportskom igralištu u Potur Šahidijinoj ulici na Vitkovcu održan je malonogometni turnir.

U znak sjećanja na ubijenu djecu, na spomen - obilježju na kojem su ispisana njihova imena, izgrađenom u njihovu čast, prije samog otvaranja turnira položeno je cvijeće i proučena Fatiha ubijenim djevojčicama i dječacima.

Upravo na igralištu pored spomen - obilježja okupio se veliki broj djece i omladine, kako bi odali počast nevino ubijenoj mladosti, a u njihovu čast i sjećanje na njih odigrane su nogometne utakmice. Nastupile su četiri ekipe u kojima su učestvovali učenici osnovnih škola „Umihana Čuvidina“ i „Sokolje“, kao i članovi Omladinskog kluba „Biser“ i FK „Selekt“, a pored učesnika turnira, utakmice je bodrio veliki broj učenika drugih novogradskih škola i njihovih roditelja, te predstavnika sportskih klubova.

Turnir je održan uz podršku Općine Novi Grad, a u saradnji sa „Udruženjem roditelja ubijene djece opkoljenog Sarajeva 1992-1995.“



Ramiz Holjan, potpredsjednik Udruženja podsjetio je na ratna dešavanja, istakavši da je prilikom agresije na BiH u periodu od 1992-1995. godine u MZ „Ali-pašin most 1“ 25 djece ubijeno agresorskim granatama.

Nakon odigranih utakmica takmičarskim ekipama su uručene medalje, a kapitenima ekipa pehari.



SPOMEN - PLOČA ZA SJEĆANJE NA UBIJENE POLICAJCE ADISA ŠHOVIĆA I DAVORA VUJINOVIĆA

“Oni su pali u miru, braneći ono što su svojim životima naši najbolji odbranili u ratu”



Na spomen-ploči ostaće zapisane sljedeće riječi: Zato, svi koji prođete ovim putem... Zaustavite ovdje svoj korak... Izmolite molitvu, proučite Fatihu. Oni su pali u miru, braneći ono što su svojim životima naši najbolji odbranili u ratu”.

Dvadeset šestog oktobra navršila se godina od brutalnog ubistva dvojice policajaca Četvrte policijske uprave Novi Grad Sarajevo Adisa Šehovića i Davora Vujinovića. Na mjestu njihove pogibije, u ulici Geteova broj 1, na Alipašinom Polju, otkrivena je spomen-ploča, koja će biti vječiti podsjetnik na hrabre i odvažne policijske službenike, koji su ubijeni na radnom zadatku.

Otkrivanje spomen-ploče upriličeno je uz prisustvo predstavnika MUP-a Kantona Sarajevo, Sindikata policije KS, Općine Novi Grad Sarajevo, te mnogobrojnih građana, članova porodica ubijenih policajaca, njihovih prijatelja, policijskih struktura iz BiH, predstavnika izvršne i zakonodavne vlasti i medija. Učenjem Fatihe i minutom šutnje odata je počast hrabrim sinovima grada Sarajeva i države BiH, nakon čega su brojne delegacije položile cvijeće na mjesto Adisove i Davorove pogibije.

Nakon otkrivanja spomen-ploče i polaganja cvijeća, delegacije su položile cvijeće i na Šehidskom mezarju Buča Potok i groblju “Sveti Josip” na Ciglanama, gdje su ukopani nastradali policajci. Adis i Davor ubijeni su u rano jutro 26. oktobra prošle godine. Adis je preminuo na mjestu, dok je od posljedica ranjavanja na KCUS-u isti dan preminuo i njegov kolega Davor.

Bili su iskusni policajci, za koje su njihove kolege iz MUP-a KS kazale da su bili časni, odgovorni i profesionalni policajci. Obojica su više puta pohvaljivani od komesara i ministra unutrašnjih poslova. Njihove ubice još nisu otkrivene, a tužilački i policijski tim i dalje intenzivno radi na rasvjetljavanju krivičnog djela i pronalasku počilaca ubistva.



Memorijalni turnir „Adis & Davor“

U znak sjećanja na Adisa i Davora, u sportskoj dvorani „Ramiz Salčin“ na Mojmilu organiziran je prvi Memorijalni turnir u malom nogometu „Adis & Davor“, a otvorili su ga Davorova kćerka i Adisov sin.

Na turniru je učestvovalo 26 ekipa iz policijskih agencija u Bosni i Hercegovini. Tom prilikom prisutnima se obratio ministar MUP-a KS, policijski komesar Uprave policije MUP-a KS i predsjednik Upravnog odbora SPKS, a članovima porodica uručene su „Zlatne policijske značke“, koje se posthumno dodjeljuju poginulim policijskim službenicima.

Predsjednik Upravnog odbora Sindikata policije Kantona Sarajevo Sadik Ećo rekao je da broj učesnika i prisutnih na turniru svjedoči da Adis i Davor nikada neće biti zaboravljeni. „Otišli su prerano, ali mi ćemo čuvati uspomenu na njih. Nećemo zaboraviti ni njih ni njihove porodice“, kazao je Ećo.





Sjećanje na zločine počinjene nad stanovnicima Aerodromskog Naselja

Uz prigodan program učenika Osnovne škole „Osman Nuri Hadžić“ obilježen je Dan sjećanja na zločine počinjene nad stanovnicima Aerodromskog Naselja. Predstavnici Općine Novi Grad Sarajevo, boračkih udruženja, preživjeli logoraši, članovi porodica, rodbina i prijatelji ubijenih stanovnika Aerodromskog Naselja obilježili su 27. godišnjicu stradanja svojih komšija i Dan logoraša ovog naselja. Polaganjem cvijeća, učenjem Fatihe i minutom šutnje odata je počast svim ubijenim logorašima i poginulim civilima Aerodromskog Naselja.

Sedamnaestog juna 1992. godine stanovnike tog naselja zadesio je nezapamćen zločin. U ranim jutarnjim satima, pripadnici agresorskih vojnih formacija „niški specijalci“ su ušli u naselje i, uz informacije koje su dobijali od stanovnika srpske nacionalnosti, započeli su masakr nad nedužnim stanovništvom. Ubijeno je 127 stanovnika ovog naselja, a više od 500 je odvedeno u logore Kula, Lukavica, Iliđa, kasarna Nedžarići, gdje su preživljavali razna poniženja i premlaćivanja, samo zato što su bili druge vjere.

Kakve strahote su doživljavali stanovnici Aerodromskog Naselja danas svjedoče preživjeli logoraši. Ubijane su žene, djeca, starci, pred očima majki, ubijani dječaci...

Dvadeset sedma godišnjica stradanja stanovnika Bojnika, Ahatovića i Dobroševića

Polaganjem cvijeća brojnih delegacija na spomen-obilježje šehidima i poginulim borcima u dvorištu Osnovne škole „Mustafa Busuladžić“, u Dobroševicima, obilježena je 27. godišnjica stradanja mještana Bojnika, Ahatovića i Dobroševića, i formiranja prvog logora na području općine Novi Grad Sarajevo.

Prema podacima kojima raspolaže Udruženje logoraša, kroz logore u Novom Gradu prošlo je oko 550 osoba, od čega kroz Veliki hangar 113, Mali hangar 90, Distributivni centar 105 i Kisikana 243 osobe. Sreću da prežive svirepa mučenja imali su rijetki.

Suvada Srnja, sa dvoje djece od 3 i 9 godina, mjesec dana provela je u logoru Kalinovik. 27 godina poslije, teško govori o nemilosrdnim događajima koje je preživjela.

“Najviše me boli što se fizičkog i psihičkog maltretiranja iz logora ne sjećam samo ja, nego i moja djeca. I danas su vidne njihove traume i ožiljci koji ne prolaze. Supruga nikada nisam pronašla, a bol sa kojom živim svakog dana mogu shvatiti samo oni koji su doživjeli isto. Rane su otvorene i mislim da nikada ne mogu zacjeliti”, dodaje. Mnogo je žrtava ovdje stradalo, a nastavak ove tužne priče je Sokolina, koja se dogodila 14. juna, kada su 52 čovjeka povedena na razmjenu, od čega je 48 mučenički ubijeno.

Prilikom obilježavanja, učnice OŠ “Mustafa Busuladžić” izvele su prigodan recital, posvećen šehidima i državi Bosni i Hercegovini.



Heroje s olovkom u ruci zauvijek sačuvati od zaborava

Polaganjem cvijeća na spomen-obilježje na Trgu ZAVNOBiH-a, na Alipašinom Polju, uz program "Skriveni od zaborava", kojeg su izveli učenici, 9. oktobra, obilježena je 26. godišnjica pogibije učiteljice Fatime Gunić i njenih učenika Adisa Mujala, Vedada Mujkanovića i Feđe Salkića.

Njihove živote prekinula je minobacačka granata ispaljena sa položaja vojske Republike Srpske iz pravca Nedžarića. Ubijeni su kada je u improviziranoj učionici učiteljica Gunić održavala nastavu za svoje učenike. Gelerima minobacačke granate tog kobnog dana teže i lakše su ranjena još 23 učenika.

Na mjestu njihove pogibije danas su se okupili roditelji ubijenih učenika, delegacije, rodbina, prijatelji i učenici OŠ "Fatima Gunić". Direktor škole Hajrudin Čuprija rekao je da je ovo jedan od najznačajnijih datuma za školu "Fatima Gunić".

Opredjeljenje škole je da neće dozvoliti da našu prošlost i sadašnjost drugi pišu našim zaboravom. Stoga se ovaj događaj obilježava sa više aktivnosti, a ne samo jedan dan. Održan je 7. Memorijalni turnir, Historijski čas, a u školskom prostoru je otvorena spomen-soba, te su snimljena i dva filma koja govore o 9. novembru, kada su svirepo ubijeni učiteljica Fatima i njeni učenici.

Ove godine napravljen je još jedan iskorak, kada je ovaj dan u pitanju. "Ovaj datum uvršten je u kalendar Ministarstva obrazovanja, nauke i mladih KS-a. Također, učenici svih osnovnih škola su pisali literalne i crtali likovne radove o temi herojstva s olovkom u ruci", rekao je direktor škole Hajrudin Čuprija, istakavši da se moramo stalno podsjećati na ono što se desilo i govoriti o istini.



Godišnjica pogibije Safeta Isovića – Tigra sa Žuči

Dvadeset šesta godišnjica pogibije Safeta Isovića, zamjenika komandanta 2. Viteške motorizovane brigade Armije RBiH, obilježena je polaganjem cvijeća na spomen – obilježje na Mijatovića kosi, gdje je poginuo.

Uz godišnjicu pogibije ratnog heroja, dobitnika najvećeg ratnog priznanja "Zlatni ljiljan" i odlikovanja za vojne zasluge sa zlatnim mačevima, istog dana obilježena je i godišnjica oslobođenja ovog područja od agresorskih snaga.

Brojne delegacije, članovi porodice, rodbina, prijatelji i saborci odali su počast i evocirali uspomene na 12. juni 1993. godine, kada su se na tom mjestu i okolnim područjima Novog Grada vodile žestoke borbe u odbrani od agresorskih snaga.

Učenjem Fatihe, prisutni su odali počast i Salki Muraspahiću, zamjeniku komandanta 2. Viteške motorizovane brigade, koji je poginuo 28. jula 1993. godine.

Predsjednik UO Udruženja 2. Viteške motorizovane brigade Novi Grad Sead Čardaklija podsjetio je da se 12. juna 1993. godine na Mijatovići kosi odigrala značajna bitka za odbranu Sarajeva, u kojoj su borci Armije RBiH, vođeni hrabrim komandantima i komandirima izvojevali pobjedu u jednoj munjevito izvedenoj, a

hrabro osmišljenoj akciji.

Nažalost, u toj bici život je izgubio Safet Isović, kojeg su borci odmilja zvali "Tigar sa Žuči", i njegovi saborci Amir Šabanović, Esad Čolaković i Zulfo Dizdarević.





Sjećanje na braću Fikreta i Safeta Kadića

Dvadeset sedma godišnjica pogibije braće Fikreta i Safeta Kadića, istaknutih boraca, članova „Zelenih beretki“ i organizatora otpora u općini Novi Grad Sarajevo obilježena je polaganjem cvijeća na mjesto njihove pogibije u naselju Briješće i šehidskom mezarju Kovači, gdje su ukopani.

Braća Kadić poginuli su 04. juna 1992. godine u borbama kod nekadašnje „Božića pumpe“ u novogradskom naselju Briješće, braneći ovo naselje od prodora agresorskih snaga iz Rajlovca. Upravo na tom mjestu okupili su se rodbina, prijatelji, saborci, sportski radnici, te predstavnici Općine Novi Grad Sarajevo i boračkih udruženja, gdje su položili cvijeće i učenjem Fatihe odali dužno poštovanje dvojici patriota, hrabrih sinova koji su svoje živote dali za odbranu naše zemlje od agresora. Bili su istaknuti borci grada i Armije RBiH. Poginuli su u ranoj mladosti, a dali su nemjerljivi doprinos u odbrani grada i države od agresora.

Prisutnima se obratio Vahid Alić, predsjednik Udruženja „Zelene beretke“ Stari Grad, ističući da mu je bila čast poznavati rahmetli Fikreta, koji mu je bio uzor u početnim bokserskim danima i njegovog brata Safeta.

„Danas ih se moramo sjećati sa ponosom, jer smo, iako slabo naoružani, loše organizovani, ipak uspjeli u tom periodu da spasimo grad Sarajevo, a samim tim i Bosnu i Hercegovinu. Upravo u tom periodu je dat najveći doprinos kada još nije postojala Armija RBiH. Imali smo ovakve gazije koji su mogli stati prvi i povesti nas u odbranu“, kazao je Alić.



Bitka za odbranu Mojmila jedna od najznačajnijih bitaka za odbranu Sarajeva i BiH od agresora

Polaganjem cvijeća na Centralnom spomen-obilježju kod zgrade Općine Novi Grad i odavanjem počasti šehidima i poginulim borcima Novog Grada, te obilaskom drugih lokacija na kojima su vođene borbe za odbranu brda Mojmila i Vodovoda, obilježena je 27. godišnjica jedne od najznačajnijih bitaka za odbranu Sarajeva i BiH od agresora.

Bila je to prilika da preživjeli borci 101. motorizovane brigade Armije RBiH i njihovi saborci iz drugih ratnih brigada, zajedno sa članovima porodica poginulih, evociraju uspomene iz juna 1992. godine i odaju počast hrabrim braniteljima koji su za odbranu Mojmila i države BiH dali svoje živote.

Članovi porodica poginulih, saborci, te delegacije Općine Novi Grad Sarajevo, boračkih udruženja i političkih partija Općinskog vijeća Novi Grad, te Savjeta Mjesne zajednice položili su cvijeće i na hair-česmu „Ramiz Salčin“, kao i na spomen-obilježju Nadiru Kafedžiću i njegovim saborcima.

Cvijeće je položeno i na spomen-obilježju borcima romske nacionalnosti, pripadnicima tzv. „Garave brigade“, u ulici Novopazarska, te na spomen-obilježju šehidima, poginulim borcima i civilnim žrtvama rata u spomen-parku MZ „Olimpijsko Selo“, kao i na spomen-obilježju pored fontane u Brčanskoj ulici, a završna manifestacija održana je na spomen-obilježju kod eko-kuće na Mojmilu.

Linija odbrane na Mojmilu prostirala se na oko pet kilometara. Ni 500 agresorskih vojnika u pratnji dva transporterata i tenkom nisu mogli probiti bedeme odbrane Armije RBiH.



„Zlatni ljljani“, Muzafer Mešić i Derviš Vražalica neće biti zaboravljeni

Predstavnici Općine Novi Grad Sarajevo, zajedno sa članovima porodica rahmetli Muzafera Mešića i Derviša Vražalice, saborcima i predstavnicima boračkih udruženja, obilježili su godišnjicu pogibije dvojice patriota istinskih heroja Odbrambeno-oslobodilačkog rata, boraca Druge viteške motorizovane brigade.

Delegacije su obišle mezarje u Buča Potoku i položili cvijeće na spomen-obilježje kod škole u tom naselju, gdje su se učenjem Fatihe prisjetili Muzafera i Derviša, koji su 24. juna 1993. godine poginuli prilikom utvrđivanja linije odbrane na Mijatovića kosi.

Ovom prilikom istaknuto je da je veoma važno da se istinski heroji koji su dali svoje živote za odbranu naše domovine ne zaborave. Muzafer Mešić bio je komandant bataljona 2. Viteške brigade, a Derviš Vražalica, komandir čete prvog bataljona 2. Viteške motorizovane brigade. To su bili neumorni borci, koji su u svakom trenutku bili spremni za akciju i nisu odustajali ni u jednom momentu. Ne treba dozvoliti da padnu u zaborav ti hrabri sinovi Armije RBiH koji su dali svoje živote, kako bi mi danas uživali u slobodi koju imamo, poručeno je sa današnjeg skupa.

Svojih saboraca, Mešića i Vražalice, prisjetio se i evocirao uspomene na tadašnje dane i ratni komandant 1. bataljona Druge viteške motorizovane brigade Esad Hećo. U vrlo emotivnom govoru, Hećo je kazao da mu je jako teško govoriti o dvojici njegovih saboraca, sa kojima je provodio ratne dane, od formiranja Patriotske lige, a kasnije i kroz druge ratne jedinice. Dodao je da su dvojica njegovih prijatelja poginuli na Mijatovića kosi, kada je on teško ranjen.

„Rafalnim pucnjima od strane neprijatelja, tog dana, oko 11 sati, na licu mjesta su smrtno stradala ova dva velika borca. Nismo im mogli pomoći, jer smo se borili za svoje živote. Dok mi živimo, oni neće biti zaboravljeni“, istakao je Hećo, zahvalivši se Općini Novi Grad Sarajevo koja njeguje kulturu sjećanja i obilježava važne datume iz proteklog Odbrambeno- oslobodilačkog rata.

Nakon polaganja cvijeća, u Domu oslobodilaca na Žuči upriličeno je druženje za sve borce koji su došli na obilježavanje godišnjice pogibije rahmetli Mešića i Vražalice.

Godišnjica masakra na Trgu „ZAVNOBiH-a“: Agresorske granate prekinule dječije snove

Na Trgu ZAVNOBiH-a, kod broja 10, u naselju Alipašino Polje, 20. septembra, obilježena je 27. godišnjica masakra u kojem je agresor granatama ispaljenim sa položaja vojske Republike Srpske iz Nedžarića ubio šest građana, od kojih troje djece. Najstarije dijete imalo je nepunih 15, a najmlađe sedam godina.

Tim povodom, delegacije Općine Novi Grad Sarajevo, Savjeta Mjesne zajednice „Alipašino Polje B - 2“, Općinskog vijeća Novi Grad, Udruženja roditelja ubijene djece opkoljenog Sarajeva 1992-1995, Unije civilnih žrtava rata KS, političkih partija, te porodice i prijatelji ubijenih i građani, odali su počast stradalim i položili cvijeće na spomen - obilježje.

Minutom šutnje i učenjem Fatihe prisjetili su se 20. septembra 1992., kada je agresor na ovo mjesto ispalio četiri granate, usmrivši dječake Samira Ibrahimagića (1983.), Enesa Muharemovića (1985.) i Adnana Mušanovića (1977.), te tri odrasle osobe Zorana Drndelića, Željka Lovrića i Rasima Šaškića.

Obilježavanju godišnjice masakra prisustvovali su i učenici OŠ „Fatima Gunić“, koju su pohađala dvojica ubijenih dječaka, dok je najmlađi među njima, trebao da krene te godine u prvi razred.





Godišnjica pogibije „Zlatnog ljiljana“ Safeta Zajke



Dvadeset šesta godišnjica pogibije legendarnog komandanta 2. Viteške motorizovane brigade, dobitnika najvećeg ratnog priznanja „Zlatni ljiljan“, nosioca Ordena heroja oslobodilačkog rata i generala Armije RBiH Safeta Zajke obilježena je polaganjem cvijeća i učenjem Fatihe, uz vojne počasti Drugog pješadijskog voda Oružanih snaga Bosne i Hercegovine na Centralnom spomen-obilježju ispred zgrade Općine Novi Grad Sarajevo.

Članovi porodice rahmetli Safeta Zajke i brojne delegacije sa federalnog, kantonalnog i općinskog nivoa zajedno sa članovima porodica šehida i poginulih boraca Armije RBiH, ratnim vojnim invalidima i veteranima rata, brigadnim generalima okupile su se kod Centralnog spomenika gdje su odale počast jednom od najvećih heroja odbrambenog rata i svim časnim šehidima i poginulim borcima koji su svoje živote ugradili u temelje državnosti BiH. Bila

je to prilika da se sjete herojskih dana, velikih ljudi i velikih bitaka koje su vođene za odbranu naše domovine od agresora.

Udruženje 2.Viteška brigada Novi Grad, uz podršku Općine Novi Grad Sarajevo, njeguje kulturu sjećanja i nastoji očuvati sjećanje na naše komandante i sve poginule branitelje Armije i MUP-a RBiH. Upravo, u čast najboljih sinova naše domovine, cijeli mjesec juni obilježavaju se značajni datumi i događaji iz naše bliske historije, važni događaji iz perioda odbrambeno-oslobodilačkog rata, datumi pogibije ljudi koji su branili ovaj grad i državu BiH od agresora, a nedavno je održana akademija posvećena herojima Oslobođilačkog rata s područja naše općine - Safetu Hadžiću i Safetu Zajki, kojoj su prisustvovala porodice svih 9 bh. heroja, po kojima je snimljena i kasida „Devet heroja“, autora Mustafe Isakovića.

Historijski čas

U Centru za edukaciju, sport i rekreaciju, koji nosi naziv po heroju Safetu Zajki, održan je historijski čas za novogradske osnovce i druge prisutne. O herojskim podvizima rahmetli Safeta Zajke i njegovih saboraca govorio je Sado Šatrović. Šatrović je pred više od stotinu prisutnih školaraca govorio o važnosti da o događajima iz bliske prošlosti upoznamo mlade ljude, jer oni nemaju mogućnost da kroz redovno obrazovanje uče o dešavanjima u BiH u periodu od 1992-1995. godine. Zbog toga je od posebnog značaja mladim generacijama prenositi istinite historijske činjenice iz perioda agresije na našu zemlju, da znaju, da pamte i nikada ne zaborave.



27 godina od pogibije Ramiza Salčina, heroja odbrane Sarajeva i države BiH

Uz vojne počasti 2. rendžerskog voda Oružanih snaga Bosne i Hercegovine i prisustvo članova porodice, velikog broja prijatelja i saboraca rahmetli Ramiza Salčina, prvog komandanta Općinskog štaba Teritorijalne odbrane Novi Grad, te zvaničnika Općine Novi Grad, Kantona Sarajevo, političkih partija i MZ Saraj-Polje obilježena je 27. godišnjica pogibije jednog od najhrabrijih sinova Armije Republike Bosne i Hercegovine koji je svoj život položio za odbranu države od agresora.

Cvijeće na mjestu Salčinove pogibije na spomen–obilježje u naselju Saraj-Polje položila je njegova porodica, te delegacije Općine Novi Grad i Općinskog vijeća, Oružanih snaga BiH, Koordinacionog odbora boračkih udruženja, Ministarstva za boračka pitanja KS, Općine Centar, Saveza brigadnih generala 1. korpusa Armije RBiH, Saveza udruženja „Zlatni ljiljan“ i „Zlatna policijska značka“, Savjeta MZ Saraj–Polje, Ramizov saborac Muhamed Mujezinović, kao i političkih partija.

Prisutnima su se obratili načelnik Općine Novi Grad Sarajevo Semir Efendić, Tajib Delalić, pomoćnik načelnika Općine Novi Grad Sarajevo za boračka pitanja, a o liku i djelu rahmetli Salčina govorio je Muhamed Mujezinović. On je kazao da je Salčin dao nemjerljiv doprinos u vrijeme kada se osnivala Armija RBiH, posebno ističući njegovu hrabrost nakon prvog ranjavanja na kapiji nekadašnje kasarne „Viktor Bubanj“, kada je sa bijelom zastavom došao da pregovara sa agresorima, bivšom JNA. Sedmi dan nakon tog ranjavanja, Ramiz je došao na položaje koje je Armija RBiH držala pod kontrolom kako bi borcima bio podrška.



Sjećanje na sugrađane ubijene u masakru u ulici Žrtava fašizma na Otoci

Delegacije Općine Novi Grad Sarajevo i Općinskog vijeća, položile su, 10. oktobra, cvijeće na mjesto masakra, u ulici Žrtava fašizma u naselju Otoka, u znak sjećanja na ubijene sugrađane. Na to mjesto, prije 26 godina, sa položaja vojske Republike Srpske, iz Nedžarića, ispaljene su tri minobacačke granate od čijih je eksplozivnih dejstava smrtno stradalo devet, a teže i lakše ranjeno 38 građana.

Na mjesto njihove pogibije cvijeće su položili i članovi njihovih porodica i rodbina, delegacije Kantona Sarajevo, te predstavnici Udruženja roditelja ubijene djece opkoljenog Sarajeva 1992 – 1995. godina, Osnovne škole “Mehmedalija Mak Dizdar” i Mjesne zajednice „Otoka“.

Samo dan ranije, sa istih položaja neprijateljske vojske ispaljeni su projektili koji su ubili učiteljicu Fatimu Gunić i troje njenih učenika tokom održavanja nastave na Alipašinom Polju. Ali, 09. i 10 novembar 1993. godine nisu bili iznimka, jer agresori su tokom cijelog perioda opsade Sarajeva sistematski ubijali djecu i civile Sarajeva.

Zbog svega toga, i danas je naglašeno kako su se svi prisutni na ovom mjestu okupili radi sjećanja na ubijene sugrađane i da će to činiti i narednih godina, s namjerom da svi zajedno opominju kako se ovakvo zlo više nikada i nikome ne bi ponovilo.

U ovom masakru živote su izgubili: Elma Geko, Slavojka Govedarica, Semir Haset, Amina Hećo, Ajdin Hodžić, Ibrahim Huskić, Vinko Lončar, Silvijo Mačorović i Božidar Šuka.





Godišnjica masakra nad Bošnjacima u mjestu Sokolina

U mjestu Sokolina, kod Ilijaša, obilježena još jedna tužna godišnjica otkako je agresor, prije 27 godina u autobusu svirepo ubio 48 Bošnjaka iz naselja Ahatovići, Dobroševići i Bojnik i stradanja 18 šehida i poginulih boraca Armije RBiH, koji su u pokušaju proboja prema slobodnoj teritoriji poginuli na brdu Ranovača.

Elvir Jahić iz Ahatovića imao je tek 19 godina kada su ga komšije Srbi, zajedno sa još 55 komšija Bošnjaka zarobili i odveli u logor u Rajlovcu, gdje je preživio 14 dana teških tortura, mučenja, ponižavanja i izživljavanja, jedan je od rijetkih koji su samo Božijom voljom preživjeli zločin koji se desio u mjestu Sokolina.

Elvir je i ovog 14. juna, došao na mjesto zločina kako bi proučio Fatihu ubjenim komšijama. „Nakon 27 godina ponovo smo na ovome mjestu, gdje se dogodio jedan, nadasve gnusni i zvjerski čin nad nevinim ljudima, a kojeg su počinile naše dojučerašnje komšije i prijatelji Damjanovići, Koprivice, Hrkalovići i ostali sa kojima smo živjeli u slozi sve dok nismo napadnuti iz pravca Rajlovca, Ilijaša i drugih lokaliteta, a nakon šest dana zarobljeni i odvedeni u logor u Rajlovac“, započinje svoju tužnu priču Elvir Jahić, stopostotni invalid.

Upravo na današnji dan 1992. godine, neprijateljske snage naredile su mještanima navedenih naselja, koji su bili zarobljeni u logoru u Rajlovcu, da uđu u autobus koji ih je navodno, trebao odvesti na razmjenu. Ali, tada je neprijatelj, umjesto na razmjenu, 56 nenaoružanih logoraša odvezao u Sokolinu, a po dolasku u Sokolinu naredili su im da legnu na pod autobusa, a onda su autobus zasuli granatama, bombama i rafalima. Od 56 zarobljenika osam ih je preživjelo, od kojih je jedan u međuvremenu preminuo, a ostali su živi svjedoci stravičnog zločina.

„Nakon što su napustili autobus, zločinci su ubrzo zatim ispalili tri projektila, potom su u autobus ubacili na desetine bombi, a nakon toga nastavili su rafalnu paljbu po raskomadanim tijelima. Na sve strane letjeli su komadi ljudskih tijela, geleri, meci. Tada sam po drugi put teško ranjen. Imao sam sreću da preživim“, sjeća se Elvir. Nekako je, kaže, uspio dopuzati do obližnjeg potoka, gdje su ga pronašli mještani okolnih sela, koji su uspjeli izvući i tijela ubijenih i spasiti ih od zločinaca koji su se kasnije vratili na mjesto zločina sa najmerom da ih zapale i na taj način prikriju zločin.

Ubijenim Bošnjacima u Sokolini podignuto je spomen-obilježje, Općina Novi Grad ogradila je mjesto stradanja, natkrila i reparirala autobus u kojem su mještani novogradskih naselja dovezeni i ubijeni, kako bi ga zaštitila od daljeg propadanja.



Sjećanje na Zlatnog Ljiljana Smaila Smaju Šikala i njegove saborce



Polaganjem cvijeća na spomen - obilježju i mezarju u Boljakovom Potoku, predstavnici Općine Novi Grad Sarajevo, boračkih udruženja, građani i saborci obilježili su 27. godišnjicu bitke za oslobađanje kote Vis na brdu Žuč i godišnjicu pogibije Smaila Smaje Šikala, dobitnika najvećih ratnih priznanja "Zlatni Ljiljan" i "Medalja za hrabrost", te pomoćnika komandanta za bezbjednost Feriza Tumbula i komandira četa Senada Čolića i Nusreta Brkića.

Rahmetli Smajo Šikalo bio je komandir Vojne policije 2. Viteške motorizovane brigade Armije RBiH i jedan od prvih dobrovoljaca koji su se prijavili da brane svoj grad početkom agresije na BiH. Prvi put je ranjen u borbama kod Elektroprivrede 1992. godine, a posljednji kod Sokolja, kada ga je geler pogodio u glavu dok je pomagao ranjenom saborcu. Nakon sedam dana podlegao je povredama.

Obilježavanju godišnjice bitke za odbranu Žuči i pogibije komandanta Šikala prisustvovali su građani, rodbina i prijatelji poginulih i preživjelih boraca Armije RBiH.

Istinski heroj i čovjek iz naroda

Predsjednik Udruženja Sado Šatrović istakao je da se danas obilježava bitan datum iz perioda 1992 - 1995. godine, odnosno 27. godišnjicu bitke za oslobađanje kote Vis i pogibije Smaje Šikala Zlatnog Ljiljana i nosioca Medalje za hrabrost. „Udruženje „Druga viteška motorizovana brigada“ trudi se da sačuva od zaborava naše istinske heroje koji su se borili za našu zemlju. Za Smaju Šikala mogu reći da je bio istinski heroj i čovjek iz naroda“, kazao je Šatrović.

Među prisutnima je bio i Refik, brat rahmetli Smaje. Istakao je da je obilježavanje značajnih datuma iz naše bliske prošlosti, sjećanje na ljude koji su ginuli i borili se u toku agresije na BiH i koji su branili ovaj narod i državu. „Međutim, sam odziv mještana iz ovog naselja i

naše općine, čast ovim ljudima što su došli, sa općinskim načelnikom Semirom Efendićem i njegovim saradnicima, je jedan dokaz da mi ne vrednujemo ništa. Nije mala stvar dati život, ni onome što je prelazio preko piste, ni onome što je stradao nesretnim slučajem, a kamo li onima koji su svoj život dali u direktnim borbama“, naglasio je Ramiz dodajući:

„Najteža bitka bila je u zoni 2. Viteške brigade i odlučna bitka za odbranu grada Sarajeva, jer su četnici trebali da prođu preko Sokolja, da zauzmu Stupsku petlju i tada bi čitav grad došao u pitanje. Taj dan je bio najkritičniji, tada je mom rahmetli bratu Safet Zajko, komandant brigade, rekao: „Smajo, ako ne odbranimo Sokolje grad pada“, i on je krenuo. Svi su pošli za njim. Na putu do Sokolja ranjeno je nekoliko boraca, a on je poginuo kad su uvezali linije, kad su vratili četnike, kad su vratili naše linije odbrane“.

Smajina sestra Enisa o rahmetli bratu priča sa sjetom, sjeća ga se, kao i njegovi saborci i komšije, samo po lijepom. „Za njega imaju samo riječi hvale. On o svojim dobrim djelima nikad nije pričao, jednostavno je bio takav, činilo se da je hladan, ali je bio jako emotivan. Meni zaista mnogo znači kada od naroda čujem da im je moj brat na bilo koji način pomogao“, kaže Enisa.

Obilježavanju godišnjice pogibije Smaje Šikala i njegovih saboraca, te oslobađanja kote Vis, prisustvovali su i cvjeće položili i predstavnici Mjesne zajednice „Alipašin Most -1“ i Savjeta MZ, Općinskog vijeća Novi Grad Sarajevo, Osnovne škole "Umihana Čavidina", te političkih partija.

Povodom obilježavanja ove godišnjice, danas će se u multimedijalnoj sali Općine Novi Grad Sarajevo održati Akademija – sjećanje na lik i djelo Smaila Smaje Šikala.

Akademija posvećena Zlatnom Ijljanu Smailu Smaji Šikalu i njegovim saborcima

Uz prisustvo članova porodica šehida i poginulih boraca Armije RBiH, dobitnika najvećih ratnih priznanja i demobiliziranih boraca Armije i MUP-a Republike BiH, u multimedijalnoj sali Općine Novi Grad Sarajevo, 6. decembra, održana je akademija povodom 27. godišnjice bitke za oslobađanje kote Vis na brdu Žuč i pogibije „Zlatnog Ijljana“ i dobitnika „Medalje za hrabrost“ Smaila Smaje Šikala i njegovih saboraca Feriza Tumbula, pomoćnika za bezbjednost i Nusreta Brkića i Senada Čolića, komandira čete.

Akademiji posvećenoj heroju odbrambeno - oslobodilačkog rata i pjesniku Smailu Šikalu, prisustvovali su i predstavnici Federalnog ministarstva za pitanja boraca, Općine Novi Grad, armijski generali, ratni komandanti 1. Korpusa ARBiH, direktori novogradskih osnovnih i srednjih škola i njihovi učenici, te drugi gosti.

Gost na večerašnjoj akademiji bio je i prof. dr. Enver Imamović, čovjek koji je cijeli život posvetio izučavanju prošlosti naše domovine i autor naših državnih vojnih obilježja sa Ijljanima.

Prisutnima su se obratili općinski načelnik Semir Efendić, Sado Šatrović, predsjednik Udruženja „Druga viteška“ Novi Grad, a o liku i djelu Smaje Šikala i borbama vođenim za oslobađanje kote Vis i Žuču od agresora, govorio je Safet Kešo, pomoćnik ratnog komandanta za moral 2. Viteške brigade.

Prigodnim stihovima na samom početku, obratio se poznati bosanskohercegovački glumac i direktor Narodnog Pozorišta Sarajevo Izudin Bajrović, a program je upotpunjen izvedbama učenika Osnovne škole „Fatima Gunić“.



Dobrodošlicu prisutnima poželio je načelnik Semir Efendić koji je istakao da porodice koje su izgubile svoje najmilije zaslužuju da posljednjem i najtežem periodu naše historije damo posebnu pažnju. "Za nas je vrlo važno da se slavna epizoda naše historije prenese na naše buduće generacije, i da posebno velika srca naših najvećih heroja, ostanu zapamćena kao primjer kako se bori za svoju državu. Mi smo imali sreću da su među nama živjeli ljudi koji su, onda kada je bilo najpotrebnije, pokazali najviše hrabrosti i najviše mudrosti i snage, i izašli na okolna brda Žuč, Sokolje, Mojnilo i zaustavili agresore koji su od ovog grada htjeli napraviti Srebrenicu. Zahvaljujući njima spasio se ovaj grad i država BiH", istakao je načelnik Efendić. Rahmetli Šikalo bio je komandir vojne policije 2. motorizovane brigade Armije RBiH i jedan od prvih dobrovoljaca koji su se prijavili

da brane Sarajevo tokom agresije. Prvi put je ranjen u borbama kod Elektroprivrede, a posljednji put kod Sokolja, kada ga je geler pogodio u glavu, dok je pomagao ranjenom saborcu. Sedam dana poslije podlegao je povredama.

U bici za oslobođenje i odbranu kote Vis od 5. do 16. decembra 1992. godine i herojskim bitkama za odbranu brda Žuč, u periodu od 16. decembra 1993. do 15. januara 1994. godine, poginula su 52 borca i ta činjenica upozorava da nikada ne smijemo zaboraviti njihovu žrtvu za domovinu.

Smajo Šikalo imao je svega 25 godina kada je svoj život dao za odbranu domovine, a dokazao je da ju je volio više nego sebe. Gazija poput njega i svi ostali koji su dali živote za svoju domovinu Bosnu i Hercegovinu nas obavezuju da ih nikad ne zaboravimo.





Bosanska ljepotica u C fazi Alipašino Polja otvorila vrata vjernicima

Uz prisustvo mnogobrojnih džematlija, predstavnika Medžlisa Islamske zajednice Sarajevo, Općine Novi Grad Sarajevo i drugih zvaničnika i gostiju, 10. augusta, je uz prigodan vjerski program stavljena u funkciju novoizgrađena Bosanska džamija u naselju Alipašino Polje.

Učenjem tekbira i salavata, te klanjanjem akšam namaza još jedna nova džamija na prostoru općine Novi Grad otvorila je vrata svojim džematlijama, a svečano otvaranje Bosanske ljepotice u C fazi Alipašino Polja bit će upriličeno u narednom periodu.

Mnogobrojnim prisustnim vjernicima obratili su se glavni imama Medžlisa Islamske zajednice Sarajevo doc. dr. hfz. Kenan ef. Musić, muftija sarajevski prof. dr. Enes ef. Ljevaković, imam Bosanske džamije Muhamed ef. Tvrtković i načelnik Općine Novi Grad Sarajevo mr. Semir Efendić, a manifestaciju je predvodio Edin ef. Spahić.

U uvodnom izlaganju Edin ef. Spahić kazao je da je ovaj sarajevski džemat osnovan u teškim vremenima tokom agresije na našu zemlju 1992. godine na inicijativu građana i džematlija koji su tada postali prvi organizirani džemat na području Alipašino Polja, a kamen temeljac džamije postavljen je 6. septembra 1998. godine, dok je izgradnja glavnog objekta Bosanske džamije počela 2. decembra 2016. godine. Od prvog aprilia 1993. godine džemat predvodi imam Muhamed ef. Tvrtković. Od 1992. do 1995 godine u mektebu C faza Alipašino Polje u vrlo teškim ratnim uslovima odvijala se mektebska nastava. U tom periodu vjersku pouku je pohađalo oko 300 djevojčica i dječaka uzrasta od 7 do 15 godina. Danas mektebsku nastavu u ovom džematu pohađa preko 100 polaznika mektebske nastave.

Prisutnim vjernicima obratio se Muhamed ef. Tvrtković ističući da je izgradnja džamije najveći poklon muslimanima ovog kraja, 27 godina nakon osnivanja džemata.

Glavni imam Medžlisa Islamske zajednice Sarajevo doc. dr. Kenana ef. Musić kazao je da proklanjanjem Bosanske džamije naš Medžlis i naša zajednica dobijaju još jednu džamiju, još jedno mjesto gdje se odgajaju ljudi, gdje će zajedno Allahu na sedždu padati, te da su džamije najbitnije mjesto gdje se odgajamo.

U ime Sarajevskog muftijstva, muftija sarajevski prof. dr. Enes ef. Ljevaković uputio je iskrene čestitke džematu i cijeloj Islamskoj zajednici Sarajevo i svim muslimanima i muslimankama na izgradnji prelijepe Allahove kuće.

Skupu se obratio i općinski načelnik mr. Semir Efendić. On je kazao da ova džamija, mjesto odakle ćemo širiti pozitivne vrijednosti, mjesto koje će nas učiti da budemo bolji i budemo zadovoljni onim što imamo.

Svečanost su svojim glasom i izvedbama uljepšali čelnici Hora MIZ-a Sarajevo, a brojnim donatorima i vakifima Bosanske džamije dodijeljene su zahvalnice. Nakon oficijelnog dijela programa proučeni su Ašere i Dova nakon čega je klanjan jacija namaz.



Po 500 KM za još 35 porodica sa troje i više djece



U Općini Novi Grad, 21. oktobra, upriličen je prijem i uručenje rješenja za dodjelu simbolične pomoći od po 500 KM za 35 porodica koje su u ovoj godini dobile blizance, treće, četvrto i više djece. Ovakav vid podrške porodicama koje se odluče za više djece, Općina Novi Grad realizira petu godinu s ciljem pružanja podrške natalitetu i osnaživanju porodice. Za tu namjenu iz ovogodišnjeg budžeta izdvojeno je 90.000 KM.

Enisa Šahmanija, majka je troje djece. Ona se zahvalila Općini na pomoći, kazavši da je lijep osjećaj kada znate da neko misli o natalitetu, o mladim majkama, o budućnosti ove zemlje.

„Ovo je lijep poklon i dobro dođe u ovim teškim vremenima. Nije se danas lahko odlučiti za troje i više djece, ali ovo pokazuje da ipak ima neko ko misli na nas i našu djecu. Divno je kada vas vaša

lokalna zajednica finansijski podrži onda kada je to najpotrebnije“, kazala je Šahmanija.

Među roditeljima koji su dobili treće dijete je i Semira Ramić. „Troškovi za bebu su ogromni tako da je svaka pomoć dobro došla. Novac ću potrošiti na bebine potrebe, ali i na ostalo dvoje djece koji su školarci i kojima stalno nešto treba“, rekla je Ramić.

Osim jednokratne pomoći, Općina Novi Grad pomaže i nezaposlene porodilje, a jedina je lokalna zajednica koja za tu namjenu iz budžeta izdvaja sredstva kako bi im barem malo ublažila nepravdu koja im je nanesena u odnosu na porodilje koje su u radnom odnosu. Svaka nezaposlena porodilja od Općine mjesečno prima po 50 KM dok se to pitanje zakonski ne reguliše na nivou FBiH. Ove godine za tu namjenu je iz budžeta izdvojeno 330.000 KM.





Potpisani ugovori za pomoć održivom povratku

Općina Novi Grad Sarajevo niz godina provodi projekat podrške održivom povratku na prijeratna prebivališta. Za tu namjenu iz ovogodišnjeg je budžeta izdvojeno 120.000 KM.

Realizacija projekta ozvaničena je potpisivanjem ugovora sa 23 korisnika - udruženja i pojedinca, te devet memoranduma sa udruženjima i općinama čiji se projekti odnose na izgradnju infrastrukturnih projekata.



Obnova kuće povratniku

Hasan Grebić, povratnik u Zvornik, predsjednik je Udruženja za održivi povratak Podrinja kaže da svaka pomoć dobro dođe, ali da je za svakog pojedinca povratnika neprocjenjivo saznanje da neko misli na njih i njihove porodice. Priča nam da će pomoć Općine biti iskorištena za obnovu kuće jednom povratniku u romsko naselje. Život i suživot u Zvorniku je dobar, međutim izostala je svaka vrsta pomoći povratnicima Bošnjacima od institucija RS-a.

„Udruženje je registrirano 2006. godine i uglavnom se bavilo stipendiranjem studenata, međutim od kako je to preuzelo Federalno ministarstvo za izbjegla i raseljena lica, imamo pomoć i od njih, jedino nemamo nikakvu pomoć iz Republike srpske. U proteklih više od 20 godina od njih nikada nismo dobili ni fening“, ističe Grebić, dodajući da se povratnici dobro snalaze, te da je suživot također zadovoljavajući. Do sada je Udruženje stipendiralo oko 400 studenata, a svakodnevno pomaže povratnike na razne načine.



Motokultivator za povratnike u Drinsko kod Višegrada

Među potpisnicima ugovora bio je i Ramiz Gušo, povratnik, ali i predsjednik Udruženja za povratak u Drinsko, mjesto kod Višegrada. On se u rodno mjesto vratio 2003. godine. Kaže da povratnici u ovu višegradsku mjesnu zajednicu lijepo žive. Izgradili su džamiju, ogradili sva groblja i izgradili spomen - obilježje šehidima i poginulim mještanima ovog područja. Svaka pomoć puno im znači.

„Ova Općina prednjači u mnogim projektima pa i u podršci održivom povratku. Pomoć će puno značiti našim povratnicima u Višegrad, jer smo nabavili motokultivator koji će moći koristiti svi povratnici. Od samog povratka Općina Novi Grad nas prati donacijama, a imamo donaciju i od Federalnog nivoa za asfaltiranje puta. Sve to će mnogo olakšati život ljudima koji tamo žive i koji su obnovili svoja imanja“, kazao je Gušo.

Sredstva za kupovinu udžbenika i školskog materijala

Kako je kazao pomoćnik općinskog načelnika za boračka pitanja, rad, socijalna pitanja i zdravstvo Tajib Delalić ova lokalna zajednica kontinuirano pomaže povratnike na prijeratna mjesta prebivališta, u vidu izdvajanja novčanih sredstava za obnovu vjerskih objekata, kupovinu stoke, poljoprivrednih mašina, građevinskog materijala i izgradnju kuća, ali i za nabavku udžbenika i školskog materijala. Jedan dio sredstava izdvaja se za infrastrukturne projekte, popravku puteva, elektrifikaciju, vodu, popravak zajedničkih objekata.

„Sredstva su dobili ljudi koji su prijavljeni u mjestu za koje su aplicirali. Trideset dva udruženja i pojedinca će dobiti podršku održivom povratku, od kojih danas ugovore potpisuje njih 23, dok će preostalih devet biti potpisani u narednom periodu. Pedeset pet aplikacija ispunjava uslove, tako da namjeravamo rebalansom budžeta osigurati još 50.000 KM za pomoć i preostalim aplikantima“, izjavio je Delalić.

Podrška projektima nevladinih i neprofitnih organizacija humanitarnog karaktera

Za finansijsku podršku projektima 19 nevladinih i neprofitnih organizacija humanitarnog karaktera iz budžeta Općine izdvojeno je 100.000 konvertibilnih maraka.

Ugovore je sa predstavnicima organizacija potpisao Tajib Delalić, pomoćnik načelnika Općine Novi Grad Sarajevo za boračka pitanja, rad, socijalna pitanja i zdravstvo. Predsjednik Udruženja oboljelih od multiple skleroze Goran Muzurović istakao je da Općina Novi Grad pokazuje kakav primjer treba da bude lokalna samouprava u odnosu prema svojim građanima, pogotovo onim sa specifičnim potrebama. Među devetnaest odabranih projekata, koji će biti finansirani iz budžeta Općine, a koji će se realizirati u narednom periodu su i projekti Udruženja „Out Loud“, koje kroz kreativne radionice okuplja osobe treće životne, te obavlja kućnu njegu za stare, bolesne i iznemogle osobe na području Novog Grada.

Finansijsku podršku Općine Novi Grad dobile su i humanitarne organizacije „Merhamet“ - OO Novi Grad, Crvenog križa Općine Novi Grad Sarajevo, Srpskog humanitarnog udruženja „Dobrotvor“ Sarajevo, kao i Udruženje oboljelih od cerebralne dječije paralize Kantona Sarajevo, zatim Udruženje paraplegičara i oboljelih od dječije paralize KS, Udruženje za podršku osobama sa intelektualnim teškoćama na području Kantona Sarajevo „OAZA“, Udruženje – Udruga „Pomozi.ba“, Udruženje majke djece sa posebnim potrebama „Radost života“, Udruženje umjetnika, sportista i osoba sa invaliditetom „MISS“, „Servisni centar za podršku porodicama djece i osoba sa poteškoćama u razvoju „Dajte nam šansu“, Udruženje plivački klub „SPID“ Sarajevo, Udruženje „Dobro djelo“, Udruženje za psihosocijalnu promociju i pozitivnu afirmaciju humanih vrijednosti „Momentum“, Udruženje za podršku djeci sa teškoćama sluha i govora „EHO“, kao i Udruženje slijepih KS, te Udruženja RVI - Novi Grad Sarajevo - Fond za brigu o djeci bez roditelja.



Pomoć teško oboljelim građanima

Iz budžeta Općine Novi Grad kontinuirano već nekoliko godina izdvajaju se znatna novčana sredstva za liječenje teško oboljelih građana. Za tu namjenu ove godine izdvojeno je 250.000 KM. Prema riječima Tajiba Delalića, pomoćnika općinskog načelnika za boračka pitanja, rad, socijalna pitanja i zdravstvo, broj zahtjeva za pomoć iz godine u godinu se povećava, a među zahtjevima teško oboljelih građana oko 70 posto odnosi se na žene koje se liječe od karcinoma dojke.

„Prevashodni cilj je dodijeliti sredstva građanima koji kupuju skupe lijekove koji se ne nalaze na esencijalnoj listi lijekova, potom za operacije i liječenje u inostranstvu. Općina je u ovoj godini za te namjene iz budžeta izdvojila 250.000 KM. Program je nastao kao odgovor lokalne zajednice na iskazane potrebe građana i njihovih učestalih zahtjeva za dodjelu pomoći pri kupovini skupocjenih lijekova, plaćanju operacija, te finansijske pomoći prilikom neophodnog liječenja u inostranstvu“, ističe Delalić.

Svjedoci smo svakodnevnih apela za prikupljanje sredstava za

liječenje teško oboljelih građana, kao i činjenice da se za liječenje nekih bolesti, kao što su hepatitis B, maligna oboljenja, leukemija, multipla skleroza, dijabetes i slično, ne izdvajaju ili se sredstva izdvajaju u veoma malom procentu. To je zaista poražavajuće, imajući u vidu tešku ekonomsku situaciju u kojoj se nalaze naši građani. U želji da se tim ljudima barem malo olakša njihova borba Općina je od 2003. godine počela provoditi Program pomoći oboljelim. Od tada do 2018. godine budžetom Općine obezbijeđeno je 3.807.866 KM, a tim sredstvima se pomoglo u liječenju 5.086 građana naše općine.

U prošloj godini za pomoć u participaciji liječenja utrošeno je 400.000 KM. Finansijsku pomoć dobio je 1.221 teško oboljeli građanin. Od toga se 151 zahtjev odnosio na djecu ispod 18 godina starosti. Sredstva su dodijeljena za liječenje u inostranstvu, kupovinu lijekova i ortopedskih pomagala, medicinski tretman u BiH (operacija, banjsko liječenje).




NOVI GRAD





OPĆINA NOVI GRAD
SARAJEVO



CENTAR ZA KULTURU



Dobrinja

• Likovna sekcija •

• Muzičke sekcije •

• Dramska sekcija •

• Literarna sekcija •

• Novinarska sekcija •

• Radionica glume •


Vila Hadžihalilovića

Trg grada Prato 2 A,
Tel: 033/774-593 i 033/774-596

www.novigradsarajevo.ba

★ najnoviji filmovi ★ vrhunska tehnologija ★ besplatan parking ★

ZA CIJELU PORODICU



NAJNOVIJI SVJETSKI FILMSKI HITOVI

NA NAJSAVREMENIJOJ DIGITALNOJ OPREMI

VEČERNJE PROJEKCIJE ČETVRTKOM, PETKOM I SUBOTOM U 20 SATI

DJEČIJE PROJEKCIJE SUBOTOM U 13 SATI I NEDJELJOM U 13 I 17 SATI



DOBRO DOŠLI!

www.kino.novigradsarajevo.ba



DOM OSLOBODILACA

DOBRO DOŠLI



00387 33 774 590



Vladimira Preloga bb
71000 Sarajevo



info@lokom.ba

**ŽELIMO VAM SRETNE
PREDSTOJEĆE PRAZNIKE**



Općina Novi Grad Sarajevo